

H E N R I C I
N E V V T O N
E P I S T O L Æ
O R A T I O N E S,
E T C A R M I N A.

THE NEW YORK

LIBRARY

ASTOR LENOX

TILDEN

FOUNDATIONS

HENRICI NEVTON

S I V È

DE NOVA VILLA,

SOCIETATIS REGIÆ, LONDINI,

Arcadiæ Romanæ, Academix Florentinæ,

Et ejus que vulgò vocatur della Crusca,

S O C I I,

EPISTOLÆ,

ORATIONES, ET CARMINA.



Posteris, an aliqua cura nostri nescio: nos certè
meremur ut sit aliqua, non dico ingenio,
(id enim superbum) sed studio, sed
labore, & reverentia Posterorum.

Plin. in Ep.



LUCÆ, Typis Dominici Ciuffetti. MDCCX.)(Sup. Permissu.

1755

1755

1755

1755

1755

1755

1755

1755

1755

1755

1755

1755

I N D E X

EPISTOLARUM.

- L** *Uca Albizio.* 11. 18.
Carolus Aldrich, Henrico Newton. 70. *Carolo Aldrich.* 71.
B. Averanio. 7. 24. 37. *idem Henrico de Nova Villa.* 23.
J. Averanio. 40.
P. H. Barcellino. 4. 10. 13. 21. 25. 26. 28. 29. 32. 34. 36. 38. 41. 42. 44. 46. 48. 50. 51. 55. 62. 63. 65. 68. 75.
Columbino Basso Vallis Umbrosæ Abbati. 47.
S. Bianchio 31.
Calixto Traguriensi. 43.
Alphesibæo Cario Arcadia Custodi 65.
S. I. Carvallio. 22.
J. Clerico. 20. 60. 64. 72.
G. Cupero. 14. 33. 52. 53. 69. 76.
F. M. Duccio. 19.
Eugenio Principi. 12.
J. Fontanino. 35.
G. Grandus Henrico Newton. 57. 77.
Guidoni Grando 58.

L. Ma-

INDEX EPISTOLARUM.

L. Magalotto Comiti 27. 59.

A. Magliabechio 25. 17. 54. 56.

N. N. 39.

D. Tassioneio . 8.

G. Polhil. 3.

J. Regalio 15.

C. Roncaglia 78. 79.

A. M. Salvino. 9. 20. *Salvinus Henrico de Nova Villa.* 67.

T. F. Sanio. 6. 16.

J. J. Scheuzero 61. 74 *idem Henrico de Nova Villa* 73.
Domino Johanni Sommero. 1. 49.

JJ. Urso Marchioni. 45.

ILLUSTRISSIMO DOMINO
D. JOHANNI
SOMMERS
BARONI DE EVESHAM.
HENRICUS
DE NOVA VILLA. S.

LONDINUM.

I.



Uum per literas suas, Illustrissime
Domine, Martinus vester, com-
munis Amicus, Virque optimus;
& cujus vita professioni respon-
det, me pro solita benignitate
minime celaverit, meas ex Italia
Epistolas; seù pro veteri Amicitia, qua me ab
ineunte ferè ætate dignatus fueris; sæpiùs recrea-
veris, multisque modis ornaveris sublevaverisque;
seù pro rerum, ac personarum novitate, non
multùm Tibi displicuisse: Studium incessit adden-
di etiam, & reliquas, juxtà temporis ordinem;
A ut

²
ut Tibi, & negotiorum meorum, & otii quoque
mei ratio, & quasi quædam Historia constet.
Tibi inquam, Summo in Patria Amico, summo-
que itidem Viro : Cui & dignitatem olim, quan-
tumque in te fuerat, opes, atque famam, præsen-
tis, ac futuri sæculi bona, accepta tulerim. Et
cui quis alteri majus debere potest, quàm hujus
vitæ subsidia, & ornamenta, & quasi Nominis
æternitatem? Cui enim is ignotus esse potest, qui
Sommero notus; quemque is inter interioris ad-
missionis amicos tam diù receperit? Præstiterit di-
gnitate, & eloquentia, & rerum magnitudine
Cicero; Vivit tamen Atticus, vivetque, & ab
Amico, & Fautore Immortalitatem mutuatur.
Sciat omnis posteritas, illum me inter suos admi-
sisse, qui Privatus, (quàm anteaesti temporis,
& nascentis consuetudinis, ac amicitiae lætus re-
corder!) in Academia, inter studia, & in Urbe,
ac Foro deinceps, & vitæ innocentia, candore,
& facilitate morum, scientia linguarum, artium,
atque rerum, parique facundia, longè æmulis,
longè invidis præstiterit. Hæc & ipsi hostes dixe-
rint, omoibus quippè nota, & ab omnibus cre-
dita. Qui sibi tantummodò, id sciens loquor,
nec Tu aliàs paterere, Summo regni munere,
non esse dignus videbatur : Qui invitus demum
ad illud accesserit, eidemque ultra septennium,

inviētissimo Sapiētissimoque Regi Gulielmo, & Universis Hominum ordinibus, gratus, acceptusque, magno decōri, ac præsidio fuerit : & ab eo tandem, bonis mœrentibus, ac indignantibus, non invitus quoque, non reluctans discesserit. Id Hamtincurti vidit, agnovitque mirabundus, stupensque Tallhardus, tunc apud Anglos Legatus ; idem mox versis rebus, belli fortuna, & jure, apud eosdem, fortissimi Herois Malebruggi captivus, neque malorum fortiter tolerantium exempla amplius inter Veteres requirebat. Diuque quidem illud vacabat, maximorum olim commune votum, & multum quærebatur, neque inveniebatur Successor. Dein equidem incidimus in tempora, tristia, Virtutibus infensa, & Reip: magis quàm Tibi adversa. Tu verò tandem, de malitia hominum, deque ipsa invidia triumphasti : atque inauditum antea nostris Annalibus, neque solum Reipublicæ Atheniensis, Romana, ac Batava, optimis, & de se optimè meritis Civibus ingrata, ipsos Inquisitores accusationis pudit. Nunc verò sine titulo magnus, & potens, nec unius anni Consul ; sine fascibus nostrum regis Orbem ; qui Scotis adjectis, coalitisque in unum Gentibus ; non situ quidem, sed moribus, ac mutuo metu, & solito accolarum odio disjunctis ; quantum vestra superant facundia, sapien-

tixque trophæa, illa bellica quæ sola majoribus
 nostris nota; amplior sanè, potentior, illustrior-
 que, & Magnitudine, & Viribus; quodque majus,
 Consiliis redditur. Incunt ergo sæculo, Britan-
 niæque nostræ, nunc verè Magnæ, immò Maxi-
 mæ gratulemur; cum nobis ante oculos, sint,
 Pax domi, & securitas, & tanta Triumphorum
 series. Si quæ à nobis gentibus quies quandòque
 dabitur, sperandum est non brevem eam futu-
 ram, quasi castrorum ferias, sed veluti in perpe-
 tuum duraturam. Britannici Majestatem Imperii
 comitèr observabunt omnes; vicinos amor, vel
 fœdera; longiùs remotos, distitosque, pudor con-
 tinebit. Te latus interim sequitur Senatus; cum-
 que Patribus, optandum magis antea quàm spe-
 randum, immò opus penitùs desperatum, optime
 convenit Populus. Domi concordia, foris trium-
 phos parit; nobisque nostri non imputabunt
 Posterì, quòd sit unius Principis ferè totus Occi-
 dens; neque pars Galliæ tantùm; Hispaniæ, Ita-
 lia, Belgium, ac Novus Orbis. Quid verò tali,
 ac pro talibus precemur? me interim Cives inter,
 ac Exteros unà cum ipsis plaudente; quam ut,
 quum se Sapiens à Reipublicæ administratione in
 futurum subducat; nolitque infido mari se am-
 pliùs committere; (nisi aliquando Patria bonis-
 que postulantibus se pristinis invitatus reddiderit

5
curis) otio simul , ac gloria fruatur : utquē in
suis commentariis Posterī demum legant ; quæ
Majores nostri , ac præsens ætas , fortiter felici-
terque manu ; quid suo Ævo , & ad Patriæ , ac
universi commoda in perpetuum , ipse consiliis
egerit. Florentiæ. Prid. Cal. Sept. 1706.



AN-

A N T O N I O

MAGLIABECHIO. S.

II.

CUM Tibi, Illustrissime Magliabechi, cui tantum ipse, tantum Orbis Literatus debet, non admodum displicuerit oratio, quam Optimi Principis Natalibus, pro muneris ratione, coram ipso habuerim; eodemque favore, & animi benignitate partes Epistolæ exceperis, quam unâ cum eadem docto cuidam, pioque viro, amico, & populari meo, in Angliam nuper transmiserim; placuit illam integram Tibi mittere, cum & Italiæ vestræ quodammodò præconium contineat; neque de ipso Magliabechio penitus fileat: Et quis de Italia post Virgilium? Quis de Magliabechio, quem omnium gentium eruditi colunt, & reverentur, satis pro dignitate eloquatur? Quorum sanè alterius solo, cœloque; si quod in me est ingenium, & quàm parùm eo præstare valeam, ipse mihi sum conscius, quasi totum acceptum refero, alterius libris, sed multo magis sermonibus, cujusvis ingenium crescere, alique possit. Quod si in Patriæ laudes, longius ibi, quam

quàm par erat, excurrerim; id solummodò Italorum candori, & Magliabechio præsertim imputandum, qui tam magnifica sentiunt, tam magnifica de nostratibus, ferè quotidie loquuntur, disseruntque. Non te præterit, quid enim aut non legisti, aut non tenes memoria? Arma, & Artes eodem tempore, Cæsare Julio, & Trajano Imperantibus, Romæ floruisse, Imperantibus etiam, & Fœminis, penès Anglos Armorum fuisse, & esse arbitrium, Elisabethæ Baconem, suum contigisse, & tot Vatum nomina, Annæ tot viventia decora Reipublicæ Literariæ, quorum pudori, silentio parcendum. Sed à Græcis, nam vestra quoque erat Magna Græcia, & Romanis Veteribus, literarum initia, progressus, consummatio: quæ in Italia quoque, quasi primæ suæ originis conscia, memoresquè, volventibus annis, ac sic in fatis erat, eodem simul, & rerum natura concurrente, conspiranteque, post tot sæcula, quibus cuncta ferè tenebris, & barbarie involuta, & depressa fuerant, denuò renatæ sunt, & viguere: Ita quicquid in artibus præstitimus, id omne vobis debetur: Majores vestri Orbem terrarum bello subegerant, pacaverantque; quorum vestigiis Posteris insistentes, artibus etiam instruxerunt, erudieruntque. Linguarum cognitio, quæ cæteris dat aditum, Philosophia, Eloquentia,

Poe.

Poesis, Architectura, Pictura, Statuaria; quæ ad
 usus, quæ ad eruditas voluptates faciant; quibus
 vita secunda, locuples, grata denique, & beata,
 & operibus felix, & tantum non æterna redditur
 efficiturque, vestra sunt Gentibus, & Humano
 Generi concessa munera: Et, si quid adhuc in
 literis obscurum, atque difficile; si quid aliis inau-
 ditum, atque incognitum, aut minus notum,
 quodque non subito, neque adeo tam promptè
 occurrat, ad Magliabechium ab ubique doctis,
 statim confugitur; ab ipso maxime responsa pe-
 tuntur; & qualia vellent, ac sine mora dantur.
 Vale. Ex Ædibus meis Florentiæ xij. Kal. Nov.
 1705.



G U L I E L M O

POLHIL. S.

LONDINUM.

III.

Peragratis Germaniis, & conterminis terris, alibi quidem satis fecundis, alibi Sylvis montibusque incultis horridisque, quibus aer semper gravis incumbit, & inde pingua ut plurimum Incolarum Ingenia: Venetiisque, situ securo magis quam salubri, non tam citò quam optaveram relictis: tandem prætervectus Padi Ostia, spem inter metumque dubius anxiusque, ob infesta proxima littora, & fluviorum exitus, ab Hostibus Gallis; per mare superum, lætus in Latium adpuli; ubi à molestiis tam longi itineris, & præsertim maximam partem, asperissima hyeme confecti, cœlo soloque mitiore felicioreque, & ingeniis formandis à natura factò, celebrique, paululùm demum recreato, rediit quasi pristinus animo vigor, simulque veterum studiorum amor. Ut verò longiùs processì, crevit ille equidem, & mihi ipsi quasi Italus, (utinam dicere liceret Romanus, sed qualis, qui olim fuerant Romani!) videbar: ac brevè

B post,

post, fixis Florentiæ Laribus, ut meliùs in Urbe Gentis primaria, ac eadem Principis Sede, negotia ad Legationem *mibi ab Anna Regina apud Cosmum Tertium M. Etruriæ Ducem injunctam*, spectantia procurarem; recurrebat demum, satis sanè longo ex intervallo, & pristinæ Amicitia, & pristinæ consuetudinis memoria: quum nos admodum Juvenes, nondum periculis expositi: nondum negotiis defessi pænè oppressique, Tu Londini, Rurive, ipse Oxonii, scribendi invicem commercio atque hoc eodem etiam sermone, frueremur, nemini obnoxio, utrique nostrum jucundo, mihi certè & utili, & nunquam obliviscendo. Inde ergo est, quod oratiunculam, quam nuper habui, ad M. Ducem die ejus Natali, Tibi amico veteri si-
doque, & ab ineuntibus annis, studiorum meorum hortatori semper fautori, mitto. Nec ipsi Principi, sit dicto venia, neque Genti, ejusmodi rerum haud incuriosæ, penitùs displicuit. Sed favent Itali, quos inter nefas omittere florentem hic studiis Magliabechium, alienis laudibus; nec apud illos Britanni, licet ultra Montes, & in alio quasi Orbe positi, ampliùs pro Barbaris habentur; Baconi, Boyliique inventa pro merito extollunt, oblatis gaudent, & læti gratique utuntur. Non Hippocrati, aut Galeno, suove Malpighio, vel rerum usu, vel perpetuitate Famæ, Harveius V Vil-
li-

lissusque cedunt. Et multa adhuc expectant à Summo Mathematico ejusdem mecum Cognominis, (inde aliquoties contigit ex errore nominis, me quoque non meis laudibus ornari) præsertim verò Mundum, qualem Deus, ipsi quoque Hobbesio, Æternus Geometra, ab initio formaverat, atque Sapientissimus Creator in mensura, & numero, & pondere disposuerat; sed intellectu facilem, non solum Mathematicis, nec quidem illis ex plebe, legendum; intuendumque; sicque ille demum optimè, sibi, Patriæ, omni denique Posteritati consulat. Adeo ut jam pænè jure affirmare possim, si rectè judicent Itali, ibi terrarum, hoc sæculo, Philosophiæ certam sedem poni, inque Anglia constitutum hujusmodi scientiarum domicilium. Non idem quidem in Sacris sapimus omnes, sui sunt Ritus Gentibus, & multum nonnunquam diversi. Sed eadem in Litteris ubique placent, & placitura sunt, si suos Veteribus honos reddatur, si Majores imitentur Posterì, & deuo Cicerones, Virgilios, Liviosque, Rerum Pondere, Nitore Verborum, Stylo Genioque, scriptis exprimant. Id certè minimè assecutus sum. Sed Ingenio deficio, non Materia. Inde erat, & id solum obtinui, quod non supra verum surgebat, aut extendebatur Oratio, factisque dicta exæquabantur; ideoque fortè, nec aliam ob causam, pla-

cuerat illa, atque jam legitur describiturque : Et
 oh utinam cum Plinio tuo meoque, alii quoque,
 [ille quidem de Posteris, cui Scriptorum æterni-
 tas ante oculos, quibuscum mihi nihil intercedit
 negotii] aut ita judicent, aut ita errent ! Utinam
 & ipse eodem modo, aut judices, aut erres, qui
 mihi ferè cum uno alteroque, non est magna
 ubivis, Bonorum seges, & aliorum studiis ex æquo
 faventium numerus, instar omnium es. Id præ-
 mium anteaucti laboris, si tam parva laboribus ac-
 censenda sint : is stimulus ad novos aggrediendum
 perficiendumque, & unus erit, & optimus. Vale.
 Florentiæ . Kal. Octob. 1705.

PETRO HIERONYMO

B A R C E L L I N I . S.

R O M A M.

I V.

TU Illustrissime Barcelline, Romæ moraris,
 quæ olim Imperii, & Legum, & ab eo dein-
 ceptis tempore, Sacrorum, ac Scientiarum sedes; &
 inde quasi ex specula, oculos ubique conjicis, &
 Florentiæ Magliabechium, Literarum nunquam in
 Italia deficientium præsidium agnoscis, meque
 etiam,

etiam, quantum negotia permittunt, & injunctum
 Legationis Munus, earundem, & unà literatorum,
 Cultorem sanè, & admodum admiratorem, depre-
 hendis. Tecum, & Fontaninus, cui Vindici suo,
 quantum debet Mabillonius, qui posteriorum qui-
 dem temporum, & majorum per Europam monu-
 menta, variaque scribendi genera, ferè unus à situ,
 & ab interitu vindicabat; quod verò solus non fue-
 rit, obstitit adhuc Fontaninus! quantum verò, &
 alterius, & suo nomine, non tantum severiores illæ,
 sed amœniores quoque debent literæ; quantum, &
 ipse, tuo beneficio viri non minùs humani, quam
 eruditi, libri, magni, & delicati admodum ingenii
 foetus, huc mihi, nihil tale ab illo expectanti,
 neque ullo officio promerenti, modò delati, Anti-
 germonius, & Tassii Vatis defensio Amyntas,
 abundè demonstrant: Tecum etiam Passioneius,
 & qualis hodie Vir ille, qualis olim futurus! In
 quo minimum est, Summi Pontificis affinem esse,
 non tamen inter minima ponendum, doctissimo
 Sacrorum Principi placuisse; sed quem brevè pro
 dignitate, Orbi Literario spectandum, suo in-
 Gellio dabit Grovonijs: ibi etiam, ea gloria no-
 stro decimo octavo Sæculo, non quidem priori-
 bus illibata, sed perfecti, absolutique operis serva-
 tur, qui novum nobis annum, verumque compu-
 tabunt: Neque novum est Romæ, Cœlo etiam
 ut

ut Terris, Leges imponere, hîc etenim utrisque
 Julium imperavit Sydus: hîc quoque tot alia
 cernas Literarum lumina, quæ se præter, viden-
 da, suspiciendaque, omnia Mundi miracula ipsis
 suis in ruderibus complectens, Roma exhibet.
 Quam me quoque juvaret, aliena licet sacra, sub
 reformato nomine profitentem, magnos illos, &
 antiquos Pontifices, Leonem, cujus sanctitas, &
 facundia, olim Attilæ Tyranni, Dei verè suo
 ævo flagelli, arma de manibus excusserint, Gre-
 gorium nostrum, quippe Anglorum Apostolum,
 in Clemente Undecimo, denuò viventes, loquen-
 tesque audire, & à Clemente, pænè dixerim, sacra
 eloquentia superatos! Quam velim Divi Petri Ba-
 silicam, dignam Principe Apostolorum Sedem;
 quàm velim sacras Lateranenses Ædes, Ecclesia-
 rum Matrem venerari! Quàm velim etiam intue-
 ri, ac tractare libros, meas sanè, & innoxias deli-
 cias; & monstrante tuo Zacagnio, Vaticanam co-
 piam, & magnificentiam admirari! Quo verò
 gaudio, qua mentis superbia, & exultatione, loca
 oculis, veltigiisque premerem, ubi vox pænè divi-
 na Ciceronis, & eloquentia supra humanam audita
 est? Quo in Theatro Populus Virgilio, ut Au-
 gusto, surrexit Universus, & veneratus est? Julii
 qua parte Fori, Bucephalo, Major insidebat Ce-
 sar, & de victore Mundi, ac Domino A'lexan-
 dro,

dro, in Dictatore suo, Victor Gentium Populus, triumphum egit perpetuum! Quo me Roma rapis? Sed parce mihi, Vir optime, quique Veteribus, studiisque faves, id unà mecum à Te ipsa Roma pro jure suo videtur postulare, ut quum de Urbe æterna, quæ nullam habuit superiorem, quæ nunquam parem habitura est, gentium omnium patria, ac domina agatur, paulò lætiùs, magnificentiusque loquar. Tunc quidem, nec pudet, pigetve, supra me efferor, neque tum aut mei sum compos, aut ampliùs esse velim. Non mihi Anglus, aut Britannus esse videor, alterius Orbis Incola, sed quasi unus è Civibus suis, Romæ, & inter Antiquos illos versari. Cùmque post tot, & visa, & videnda Urbis miracula, quibus Hospites suos Roma, inter venerandas pulcherrimasque ipsas, proh dolor! veteris Urbis reliquias, & ruinas, & novæ cultum, ac magnificentiam, adhuc detinet, & si per ipsos liceret in perpetuum detineret, vesperti demum, non tam lassus, quam mirabundus, lætus, doctiorque redierim; quæ nova voluptas, quantum animo, & gaudii, & scientiæ accedet, eruditissimos Barcellini, suavissimosque sermones excipere; & ab ipso audire, quæ oculos, mentemque, tanta in rerum copia, & quasi turba, effugerint: quæ memoranda siue Ducis, siue mea culpa, præter-

ric-

rierim; quæque observare haud ipse potuerim, quæ tamen observatu, & memoria erant dignissima? Has literas novo ineunte anno, felicibus, uti par est credere, auspiciis scripsi, cum tuas biduo ante Roma vij. Kal. Jan. datas, & libros quos miseris, paulò post gratus, atque lætabundus acceperim, in pignus certissimum, summumque benevolentiae, & amicitiae, quas maximè, communia conciliant studia, & recti amor; molestiarum sanè, curarumque levamen, & condimentum, & liceat addere, ingenii quamvis multùm mediocris, alimentum optimum, uberrimumque. Die verò Saturni proximo, in Angliam scripturus, ut quam primùm tibi parentur, ac demùm Romam advehantur, Principia Philosophiæ Mathematicæ, non ità pridem à Clarissimo Nevvtono Equite publici Juris facta, quocum nihil mihi commune præter nomen, & quod cum aliis omnibus habeo commune, famæ ipsius cultum, & reverentiam. Hæc habui in antecessum dicere, fruiturus interim quasi quadam anticipatione gaudii, & voluptatis, Te quandòque, & Romam unà videndi, colendique. Vale. Florentiæ Kal. Jan. 1706.

A N T O N I O

MAGLIABECHIO. S.

V.

QUod inter Augusti dicta, celebre ferebatur, *Festina lentè*, id nunc mihi quoque usurpandum, cum in moræ pretium, binas ab Optimo Magliabechio, priores vigesimo septimo Februarii, alteras heri, Florentia datas, Arni etiam, sed Pisis accola, epistolas acceperim, & quales, Dii Boni, quàm suaves, quàm doctas! Adeo ut ipse difficilis aliàs, ac morosus mearum rerum interpres, exactorque, nunc mihi aliqua ex parte placeam, cui, Magliabechio non displicuisse conceditur; qui meas demùm aliquid putat fuisse nugas: sed non tam facilem habeat Dominum, qui Te, officio molestus, non tuo tempore interpellavit, abstulitque quod dare non potuit, famæque se meæ interposuit: in partem enim famæ, neque minimam veniunt, quibus sua penès Magliabechium servari, ab ipso legi, & quod penè supra vota cujusvis, aliis etiam tradi legenda contigit: sed nimium pro parvis, qualia sunt illa, quæ nihili sanè habenda, pretium dumtaxat

C

ab

ab accipientium affectu trahunt. Tua verò me docent, quæ in lucem, & in ora hominum nuper dederit, Illustrissimus, & dignitate, & meritis Cuperus; nec suis tantum, sed, & alienis etiam operibus, clarus, & insignis. Quid Urbi quoque, quid Orbi, & Tibi obtulerit Romanus Vignolius; redivivum sanè in Columna iterum, & Vignolio Antoninum, suo Sæculo dictum, neque ex Adulatione, Pium. Sed tamen malè me habet, non tam benè hyeme præterita valuisse Magliabechium; non id equidem immortalibus interitum minatur, quales sunt Docti, & Sapientes, quique sanè pro Bono publico, aut immortales revera esse debent, aut proximè saltem ad immortalitatem accedere: interim velim illos, vegetos esse, valentesque, non curis, non morbis distractos, anxiosve; nam quantum otii, ac valetudinis illis datur, id Orbis Literarii inter lucra recensendum est.

Fontanini, a me semper colendi, Tibi Literas demum remitto, gratas, & memoria mei, & illustri testimonio.

Hic multos admodum, & in multis, immò in omnibus, Doctos inveni; qui non solum sibi, sed, & Publico etiam sapiunt; magnique putant, & est equidem, alios instruere, & erudire moribus, & scientiis, & in quantum possint, sibi quoque

que pares facere ; atque omnes interim tui memores, Famæque tuæ, quæ ubique diffunditur, neque intra Hetruriam vestram, aut ipsam denique Europam includitur, cultores. Interfui sæpius prælectionibus eruditis, piisque, intersum, etiam quotidie sermonibus ; & inde semper doctior, meliorque redeo. Abstineo sanè nominibus, cum cuncta sint tibi, & Orbi suis meritis nota ; neque ausim meum interponere iudicium, quod, & difficile, & molestum, atque invidiæ, superbiæque plenum, planèque supra vires meas ; sed maximè obstat, quod Summis Viris parem gratiam verbis referre haud potuerim.

Ipse die Mercurii proximo, Liburnum cogito ; ubi pro more Gentis meæ à Nostratibus excipiendus, indè inter Coœivia fermè tempus extrahendum est, non nunc bonæ mentis alimentum : ibi enim de Commerciis, non de libris disputandum, non de Vestra, aut Veterum Sapientia, sed de arte nummos comparandi : & si de novis loqui contigerit, quæque peregrè, aut domi accidunt, non de Literariis agitur quarituræ : post Græcorum enim tempora, & qualia mihi nuper tecum unà, & cum Reverendo, ac admodum erudito Landio nuper Florentiæ obtigerant, paucisque aliis, quibus recensendis supersedeo, ne ambitiosè agere videar, inter dapes, &

fercula rarò de literis sermones habentur . Veniet
breve tempus , cum licebit iterum inter Convivia,
& lætari simul , & sapere . Vale . Pisis. viij.
Idus Mar. 1706.



PETRO FRANCISCO

S A N I O. S.

VI.

Venia opus erit, doctissime, optimeque Sani, si seriùs aliquantò, quàm Dignitatis, aut Muneris ratio postulaverat, responsionem acceperis; quod equidem partim acciderat, ex scripti mole, unde memorialem libellum fuisse, aut saltem in Jure Dissertationem credideram; neque enim aut cogitare, aut suspicari potui, id mihi solùm tribui, meique unius in illo partes agi; aut me denique potuisse sufficere cuilibet in laudis materiem, nedum tam amplæ, ac tam magnificæ, præsertim ejusmodi Viro, qui.

Totos dat Tetrica Dies Minerva; partim verò ex Officiis acciderat, quibus primò in hanc Urbem adventu, seu Principi debitis, seu Amicis, distinebar, atque occupatus eram; adeo ut in aliud tempus magis opportunum, minusque sive negotiis, sive molestiis distractum, illam differre necesse habuerim: sed cum ad me paulatim redire, & plus mihi, studiisque vacare contigerat, in primis animum cupido incessit, Tua interiore
cura

cura legendi, quæ adhuc inter alia præ manibus erant : longius tum sanè admiratio processit, neque sine causa, cùm materiam omninò tantùmque adeo, opus superaverit : & simul Votum, & fermè necessitas imposita, pro viribus respondendi affectui tuo, erga amicum maximo, & utinam, aut non possem, aut non debeam adjicere, nimio, cui me libenter, verèque fateor, neque accipiendo, neque reddendo, parem fore. Et unde obsecro accidit, hominem exterum, tanti tibi, Italise videri, æstimarique? Anne quod vos morum humanitate, civili prudentia, & rerum, hominumque notitia, cœteris in Orbe Gentibus, præstare crediderim? Sed in eo omnes mecum contentientes habeo : Anne quod Principem vestrum, Optimum Cosmum, quem ipsi, ut Dominum reveremini, ut Patrem amatis, illum à Literatis ubique agnitum, ut suum, ac Literarum præsidium, atque Statorem, illum à Religiosis in Exemplum vitæ cunctis propositum; sed, & illis quoque ipsis Religiosis, nunc stupenda planè, & grata Populis rerum vice, sumendam ab Aula in Principe vivendi regulam; & inde petendum in posterum morum magistrum, & animo, & scriptis coluerim? Sed, id quoque mihi in Commune, cum Civibus suis, cum Exteris, & præsertim cum Anglis convenit, qui non tam illi

pe-

peregrini esse videmur, quàm sui, quàm populares; neque interim de me quoque filere, aut possum, aut debeo, qui ea comitate ab ipso, quoties me ad Aulam publica vocant Officia, tanquam domesticus, & ex suis unus excipior. Anne communia studia in causa fuere, Antiquitatis amor, ac Juris reverentia, Cultusque Veteris? At Italia universos, Antiquitatis amantes, aut invenit, accipitque, aut demum facit, talesque suis reddit. Anne verò quod quandòque, uti non tantùm à Sapientibus, sed ab indocto etiam rudique Vulgo, non rarò observatum est, & frequentibus constat Exemplis; secreto atque incognito affectu, & quasi vi quadam ab ipsa natura impressa, ac insita, cui non facile possit obsisti, neque est qui velit reniti, impelli, conciliarique invicem animas, neque alia sit amandi causa, ratioque, præterquam amare: Fato igitur (ut ita dicam) non meritò, hoc acciderit. Fato ut alia multa gratis imputetur: Nec quid amplius in causa sit, quæro; gaudeo sanè, lætorque me hac in parte inter felices, neque adeo benè merentes, haberi, censerique. Vale. Liburni. 16. Kal. Apr. 1706.

²⁴
B E N E D I C T O
A V E R A N I O

PISIS ELOQUENTIA PROFESSORI. S.

VII.

PAUCIS abhinc diebus, Optime Averani, me vir doctissimus Johannes Clericus, Literato Orbi variis, ac utilibus admodum operibus in omni ferè argumento notus, laudatusque, literis suis Amstelledamo missis interpellabat; neque me promissionis sibi olim per communem amicum factæ, de amplianda Grotii Anthologia, brevi per ipsum edenda ad usum, & in gratiam eruditorum, immemorem esse ulterius sinebat: Et ipse in hæc fermè verba, promissum, resque quasi suas repetenti respondebam.

Certè quantum in me erat, & Pisis prius, ubi me primum selecta Bibliotheca tua deprehendit, & Florentiæ nuper egi; ut locupletior aliquatenus, adeoque utilior, gratiorque prodiret Anthologia Grotiana; & si mihi fidem Viri Insignes servaverint, Averanius Eloquentiæ Pisis Professor, ac ipse utraque facundia excellens: & Salvinus Florentiæ Græcarum etiam Literarum cum laude Interpres, utraque lingua, latina, & sua, & verè sua Hetrusca, Vir Doctus, neque injucundus Poeta,
ope-

operam non malè, neque adeo infelicitè collocari.

Quam cara res sit fides, præsertim inter literarum sacris deditos, bonos viros, multum famæ, & exultationi hominum dantes, quis te, qui tanta illis tam feliciter credidisti, & me etiam pro bonitate tua eorundem participem facere voluisti, meliùs novit? Quàm verò nunc tenear adstrictus, etiam ex Batavia, & Orbe Oceano adfito, jam, & tibi constat. Patere igitur nomen tuum, cum Opsopæo, cum Stephano, Huetio, cum Clerico, unà, & cum ipso Grotio legi, celebrarique; & extrema Britannia, Orbis alter sciat, quantum Itala vis præstet, ut olim armis, sic nunc, & pacis artibus. Hic apud vos Musis Græciâ extorribus, quasi altera incunabula, Larès sui, & certa sedes. Vobis ergo incumbendum, ne penès alios in posterum sit Imperii Majestas, & alibi quàm in Italia literas dominari. Sed benè de Republica sperandum, sufficit Majoribus Averanus; & ipsi quoque victorem læti, gratique, fausta, & felicia omnia canentes, optantesque prosequemur. Optimum interim, Doctissimumque Fratrem Josephum, nostra Juris sacra sequentem, ipsorumque decus, in vota mea credo pronum, facilemque habiturum, operisque, precumque adiutorem; cui digna sua virtute præmia, idest summa opto, precorque. Vale. Florentiæ. viij. Kal. Jul. 1706.

D

DO.

D O M I N I C O

PASSIONEIO ABBATI, S.

VIII.

CUM tu, doctissime, Illustrissimèque Passionei, qui Musas summa cunctorum in Urbe, & per omnes Provincias laude colis severiores, meas tanti putes esse nugas; nisi Anapæstos equidem mediocres, quales sanè expectandi ab illo erant, qui amœnioribus literis fori strepitu, ac negotiis occupatus, multo abhinc tempore, nuncium planè remiserit, suasque sibi res habere Musis permiserit: sed ne in totum tempus peiret, neque nihil agere viderer, unà etiam adjunxi Lyricos optimos Senatoris Filicæ, & tantùm ignobiliore materia depressos: neque tamen ille dicere veretur; oh quantum imprudentibus imponit!

*Me Laudas, Ego Te: Peccavimus Ambo: Sed impar
Culpa est, plus justo laudor, & ipse minus.*

Sed licebit semper Poetis suo Jure uti: quidni? cum, & ipsa Poësis sit ars fingendi: neque doli, quos illi nectunt à Prætorè, inter malos recensentur. Sed non opus est pluribus ea in parte disputare; quum enim hæc legeris, citò dictis Fides constabit. Vale. Florentiæ. xv. Kal. Jul. 1706.

AN-

ANTONIO MARIÆ

SALVINO. S.

IX.

INter juris delicias te ne, optime Salvine, tædium, vel oblivio amicorum cepit? Tibi interim non visus, & multum de tua querens absentia, Florentia hodiè excessit, Romæ suæ, Italiæque nova literarum spes, ac honor, Juvenis Passionejus: sed tandem venit à Batavis, & ab extremo Oceano belli nunciatoria, neque renuoquin id quoque mihi imputes, a Clerico Epistola; qui nolit te diutiùs quiescere, sed tecum unà in partem famæ, ac laudis consortium venire, simul Grotianam Anthologiam ampliando. Me, & meministi, olim sponsorem dedi, te fines Imperii literarum hac in parte promoturum; cave precor, ne vir bonus adhuc, malæ læsæque fidei posthac insimulet. Et vide quæso quanta sit Operis dignitas, utilitasque, ad quod te voco. Celebris dicit Auctor, Grotius videlicet, totam in eo hominum, rerum, artiumque quasi historiam à Platone, & supra, usque ad Justinianum per mille annos, & ultrà, hoc est, quasi ab initio

Literarum ad finem usque, ea Mundi ætate, qua maximè valuerunt artes, & ingenia, contineri: & ipse quoque dixerim, tot eorum omnium, quasi tabellas pulchrè depictas, hic etiam cunctorum oculis in publico exponi; non tanquam privatam possessionem detineri, quamvis fuerit illa Principum, amplam quidem, sed tamen unius, vel paucorum saltem, & à paucis quoque perlustrandam; atque inter eas, admodùm multas à Magistris: hic Poetarum quasi Apellium, Zeuxium, Parrhasiorumque manus cerni, & inter magnos Opifices, aliquando, & imperatorias, atque adjicere quoque liceat, laureatas; Romanosque etiam in hac artium arte, de laude, de præstantia, cum Græcis, & sua quoque in lingua, ac facundia, non hic muta eloquentia, sed viva, sed spirante, certantes. Quanta eruditæ menti gaudia ad summum, & supra se etiam elatæ; uno quasi intuitu videre cuncta, per tot sæcula, per tot gentes, per Orbem Romanum, & per Universum sparsa? hic, & restare quasi adhuc, in temporis omnia perdentis invidiam, aspicique tot monumenta veterum, quæ dudum oculis periere; antiqua rimari, non arida, non inamœna, ut aliàs pleraque; sed quasi pulcherrimas picturas bono in lumine collocatas, literarum historiam, non inter desiderata ampliùs computari, & ingenii quasi humani, per
gra-

gradus suos, initia, incrementa, statum, occasus, lapsus, finesque cognoscere. Non potes posthac otio indulgere. Sed quid hæc ad Salvinum? nunquam ille cessat, sed intentus semper publico bono, in studia semper incumbit. Velim tantum, ut hæc etiam sibi placeant, quæ omnibus postea placitura sunt; sentiatque Clericus, (Orbi Literato, tot per annos, multisque adhuc precor superfit!) libris suis universam fermè sapientiam, complectentibus, maximoque alios juvandi, instruendique studio, cognitus atque præclarus; meas ad Salvinum preces sua, ac publica causa non frustra, aut inutiles fuisse. Vale. Florentiæ: xij. Kal. Jul. 1706.



PETRÒ HIERONYMO

BARCELLINI, &c. S.

ROMAM.

X.

MEas de Concione sua ultima literas, Optime Barcelline, quibuscum consentientes habeo cum Catholicis vestris, qui à Lutheri quoque Calvinique sunt partibus, in manus Summi Pontificis devenisse, ex tuis postremis constat, neque admodum displicuisse, suo etiam à Passioneio, lætus didici. Juvenis ille non tantùm amore omnium, sed, & veneratione quadam complectendus. Quantus ille, & ipsi etiam Magliabechio tuo stupori erat, indivisus lateri penè comes, atque alter alteri admirationi! Sed mores doctrinam superant, & summa etiam ea in ætate sapientia, summæ comitati cedit. Jam verò hinc discessit, Florentia non minùs, quàm Roma secum Doctorum animos, ac vota auferens. Interim me Romam vocas, ac Urbis Majestatem coràm sistis; neque minùs multorum, uti ais, ea in parte desiderium, & amicorum adeo mihi, studisque nominum; quæque alia, aut fallendo, aut incitando
ani-

animo, nimiùm illuc propendenti inserviant. Et velim equidem Urbem adire, spectareque, plures etiam ob causas; unam plurimi sanè faciendam, quod te ibi adhuc morantem salutare possim; neque inter postremas ponendam, quod visum indies minui sentiam, neque illud minimum incommodum, solumque adhuc quod mihi in Hetruria agenti contigit; cui inter maxima vitæ emolumenta est, interdum legere, interdum scribere, nunc mihi, nunc amicis placere: imò vita est ipsissima; atque interim oculis perlustrare, quæ mox animo possim repetere, exiguo ægræ mentis solatio.

Hæc intereà mecum cogitanti, sed non id equidem cogitanti, versus mihi exciderunt, & quasi ex contactu, novo neque expectato morbo, laboravi. Legi Poemata nuper Senatoris Filicæ, mihi dono data à viro summo, & ipso quoque Poeta: & inter legendum, sentiebam mutationem, neque mihi minus mirandam, quàm quas olim in Ovidio puer legeram, & legendo stupebam, delectabarque; sicque repente ex Ministro, ut dicunt, Legatoque poeta qualis fiebam, atque prodibam! Sed neque juxta illius transformationes, longiùs recessi à meipso, aut commisso mihi munere, parumper agens Legati, ac Ministri, measque partes, & in conjecturis futuri, politico, ac
vati

vati proprior, quàm poetæ. Utque Principi pendet tributa Populus : sic ego Imperiorum Principi, ac Dominæ Romæ, quos fructus hæc terra, sua olim, tulerit defero, & mei interim vice tibi Poema vicarium substituo, sistoque. Illud comitatur aliud verè Poema, quod Romæ Judicium, neque ipso aureo Augusti Sæculo reformidaret, solaque impari materia, atque minore detritum sit, depressumque. Vale. Florentiæ. x. Kal. Jun. 1706.



LUCÆ ALBIZIO

SANCTI STEPHANI EQUITI. S.

P I S A S.

XI.

MEmini, dum Pisis nupèr, Humanissime,
Doctissimeque Albizj, magna cum animi,
tum oculorum quoque voluptate, in ampla tua
pulchraque versarer Bibliotheca, me non tantùm
sacra, per varia scribendi genera, docentes; non
tantùm civilis sapientiæ conditores, quos inter
post legum latores, quibus ipse accenseo Cicero-
nes, Grotiosque, meritò computes Thucydides,
Sallustios, Tacitosque Historicos, aliosque, si qui
fuerint, humano Generi, eiusdem Dignitatis, &
usus; neque tantùm naturalis quoque magistros,
quos penès solos diu philosophiæ nomen, & Re-
gnum, quibus, & nunc etiam annumerandi sunt
Mathematici, seu Geometriæ, ex quo vir magnus,
Anglorum, sæculique decus, eodem mecum no-
mine, sua ediderit Principia Philosophiæ Mathe-
matica; sed, & Poetas, sive dulces solùm, sive,
& sublimes, seu mentem demulceant tantùm, si-
bique, ac rebus concilient, seu extra se rapiant

E
esse.

efferantque, sive veteris Ævi, seu recentis; sed
 Majores illos, ac Parentes, & vultu, & viribus,
 atque valetudine referentes, & suum quoque lo-
 cum, neque infimum obtinere, læto equidem
 animo, observasse. Neque tantummodò mihi li-
 cuit hæc gaudia ipso in loco capere, hisque men-
 tis deliciis foris satiari; sed, & domi etiam, ruis,
 & tibi amicorum opibus, copiisque, uti. Non
 solus Sanctus Cyprianus instruxit mentem, Ec-
 clesiæ disciplinam, moresque Christianos docen-
 do; non solus Pallavicinus Cardinalis, qui prio-
 ris sæculi mala retulit, & incassum tentata reme-
 dia. Hæc lectores videmus, agnoscimusque, &
 frustra dolemus posteri. At, & aliquando quo-
 que cum Vestræ Bargæo, statim, ac animum à
 gravioribus studiis remittere placuit, Minerva si-
 mul, & Diana comitantibus, per campos discur-
 rere liberos, ferasque agricolarum hostes, & in-
 noxias prædas intercipere, atque capere videbar;
 at mox versa penitus scena, sub ejusdem quoque
 signis, oh quantum vatibus licet! quanta vis nu-
 merorum! quasi militare, & triumphantem, in-
 gredi Solymam; sacrum venerari solum, & sepul-
 chrum, cui cedunt Regum Palatia, & præ quo
 ipsum sorduit, quamvis caput rerum, Capito-
 lium. Tantum enim inter utrumque interest,
 quantum Coelos inter, & terram, quantum inter

infinitum, & punctum hoc nostrum, de cujus
 tamen portiuncula quadam, & quantilla rerum
 pars ipsa etiam Europa, si cum Universo Terra-
 rum Orbe conferatur, tantis animis, tantis cædi-
 bus, tanta tot Populorum, Gentiumque clade,
 ac ruina certatur: cùmque, ut plurimum, tanta
 etiam post certamina, tantasque strages, Orbis
 noster saltem, qui Christianus audit, & quam
 benè nobiscum actum esset, si re ut nomine, sed
 oh quam sibi adversus dissimilisque! optata frui
 pace permittatur. Sed me longius à me ipso abri-
 piunt, auferuntque publica mala. At, ut dicere
 incepì, ab affectu tuo erat in illa amœna studio-
 rum, in quæ prono flumine, sive volentes, sive
 nolentes, seu principes, seu vulgus Literatorum
 ferimur omnes, alii aliis, prout accidit, felicio-
 res, quòd Anapæstos, quos invita, ut ajunt, Mi-
 nerva, at certè invito, atque nolenti proximus,
 vixque meus nuper effudi, tibi munus exiguum
 offerrem, istiusmodi literarum amatori, atque
 Auctoris causa, fortè non admodum displicitu-
 ros. Sortem non potui, usuram solvo infra cen-
 tesimam certè, ac ejusmodi, quæ nisi valde fal-
 lor, neque contra leges sit, neque cum bonis
 præceptis pugnet: sed cùm juxta veteres, & va-
 tes præsertim bonos Viros, ac æqui, bonique pe-
 ritos, & amantes etiam, beneficia non sint ad

mensuram reddenda, & quasi ad trutinam expendenda; unà tibi donum fero, quod, & mihi tu quoque possis imputare, Oden scilicet Senatoris Filicaïæ, sui Sæculi Horatii, & Romani instar illius; quippe qui ferè solus inter nostrorum temporum Lyricos legi dignus sit. Vale. Florentiæ, iij. Kal. Jul. 1706.



EUGENIO SABAUDO

IMPERATORI, &c. S.

XII.

Tibi, invictissime Imperator (si cui alii, nomen illud, non tam potestatis, quàm ut olim, ac initio, summæ virtutis, ac gloriæ devictis hostibus partæ indicium, meritò debetur) qui pridem ad Danubium, & quanto Terrarum intervallo ! formidatam Christianis Potentiam, inspectante ipso, indignante, & dolente Multipha Orientis Tyranno, Gallosque nunc iterùm Imperii Romani hostes debellare potuisti. Inter Aquilas, Tubasque aliquando Mamiliani, Trajanî Imperatoris Exercitus regentis, Romani Consulis Carmina legebantur, & Plinii Hendecasyllabis apud eundem locus, & meritæ laudes tribuebantur : semper etenim favebant Arma Musis, & Musæ invicem Armis, inde quippe Argumentum illis, & præsidium. Neque eo tempore, uti nec Augusti Ævo, quo, & ipse Germanicus Romani Robur, Decusque Imperii, non tantùm Belli artibus, sed, & hac etiam facundia, cum Auctore, ac Principe Gentis, ac Orbis Julio eminebat, se
in-

indignum versus scribere Consul credebat, neque Dux ipse versibus delectari, & animum aliquando inter castrorum curas istiusmodi Comitibus remittere, reficereque. Redeunt tandem Sæcula Armis, literisque Inclyta; neque viventibus triumphantibusque Eugeniis, unquam deerunt Vates. Tu Princeps, sic ipse scribis, lætus audis, quasi interfis, Anglorum triumphos; nosque Eugenio Principi læta omnia, ac felicia precamur. Tu surgenti Carolo Austriaco, & Majestatem Nominis implenti, faves: Tu Cognato Amedeo fortissimo Principi, fideique præclaro, at veterum instar Heroum, multum prius adversis exercito, te vindicem paras: Gallique Adventum Tuum, & sibi cognitum Nomen timent. Jam patet Athesis, ac Mincius, & Addua, & à Fonte Padus, Victorem suum læti expectant. Jamque hostes fugam meditantur, seque post Alpes præcipiti retrahunt gradu. Tu quoque partem Carminis facis, & quantum in te fuit majus opus unus occupasti. Hanc laudis materiem, non interituram, Scriptoribus præstant Hæroes: Hæc ab alteris, otii penduntur tributa eis, quibus otium ipsum debetur. Florentiæ. Jul. 1706.

PETRO HIERONYMO

BARCELLINI, &c. S.

ROMAM.

XIII.

CArminis, sit modò Optimum, Humanissime Doctissimeque Barcelline, breve gaudium, plausus vagus, & incertus, fructusque nullus, aut saltem exiguus, & periturus. Orationis verò gratia, præsertim sacræ, sublimis, & divinæ, qualis nuperrima Summi Pontificis, perpetuò durat, inque secula ibit, Posterisque non minùs, quàm adstantem, præsentemque Populum summa voluptate afficiet, instruetque. Non enim Romæ solùm, nostroque Ævo consulitur; foris, & in publicum emittitur, legiturque Oratio, Apostolorum Principe, ipso Clemente, atque Urbe digna, in qua olim Cicerones, Pliniique in Civilibus Controversiis, Leones Gregoriique, suorum temporum sequentiumque judicio Magni, in Sacris Concionibus, dominabantur, & animorum habenas tenuerunt. Quibus orantibus nemo sanus in sua potestate, aut erat, aut haberi voluit: Et nunc quoque parùm abest, quin in
Ope-

Operibus suis superstitēs, Literarum, ac facundiæ Regnum quasi etiamnum teneant, neque parum etiam moribus contulerint. Sed nondum eo tempore, Humano Generi patuerunt Christianæ Religionis Myſteria, Maieſtasque Rerum primis illis, ac Orbi, aut prorsus incognita, aut minùs credita : defueruntque poſtremis, infelicitate temporum, afflicta à Barbaris, & ferè everſa cum omni bona arte, Italia, Veteris sermonis puritas, ac nitor : nunc ſimul florentibus literis, ac ſacris, & ad ſummum perductis, in uno Clemente, collectis viribus, erumpunt, conſpiciuntur, effulgentque : qui diu ſupra omnes elatus, ac omnes longè ſupergreſſus, cum ſe ſolo certare, ſe ſolum ſuperare potuit. Oh quàm pulcherrimum, quàm diſcillimum, quàm utiliſſimum quoque certamen ! par bene compoſitum, cum Clemente Clementis ipſe. In commune ergo ſui Populi, & Diſſitarum Gentium, ac publicum Urbis, atque Orbis bonum, ſecum ſæpiùs contendat, ſe ſæpiùs vincat. Vale. Florentiæ. iv. Id. Auguſti 1706.



G I S B E R T O

C U P E R O. S.

DAVENTRIAM.

XIV.

B Inis à Te Literis, Illustrissime Cupere, mense Aprili, ineunte quasi apud Anglos anno, amicè provocatus, eodem quasi nunc ad finem vergente, apud illos præsertim qui tempora castris computant, nolui quoque officio meo deesse, quodque minimum sit, par pari saltem rependere. Auguratus sum antea bona, ac fortia Cupero, sociisque consilia, Malebruggio Duci prælia felicia, nec prioribus cedentia; nunc evenere cuncta, & ubique etiam ferè supra vota. Tunc sanè scripsi lætiùs, elatiusque, atque ut dixi, quod fortè in causa erat, recens à carmine, quippe cujus menti obversabantur, Anglorum Batavorumque triumphus: & ex eventu res quidem versibus responderunt. Calpe enim, Barcino, Taurinum, tot instar Victoriarum, servata: Timent Hispanix, Debellatum Belgium, sequitur Insubria: alterumque Carolum, non Magno, non Maximo, Austriaco quoque, Minorem, penè victum, Vi-

cto.

ctorem Orbis demiratus est. Et quanta Ducum Nomina, Rovignius, Petroburgensis, Eugenius, Malebruggius, & inter Principes, Sabaudus. Nostro Sæculo Magni, Maximi apud Posteris futuri: præsertim si inter Annalium Scriptores, novituri sint Sallustii, qui Majestati Rerum sufficiant, & dictis Facta exæquare possint. Interim ipse, & id quoque supra vires, munus exiguum, carmen illud mitto, Vaticinium quasi meum, si non id quoque nimium, Florentiæ eo tempore Cælo soloque quasi poetico effusum: ex titulo, futuri indicem; à materia, præteritorum, gestorumque memoriam. Cui faciles precor Lectores, faventem verò Cuperum: sed certè nimium est sperare, cum Vatum Italorum Sæculique nostri facilè Principe Filicaia, unà Eruditorum apud Batavos Proceres Principem, (sic cum Roma sua sentit ipse, literis, ac sacra Eloquentia non minùs quam Dignitate præstans Clemens Pontifex,) consentientem quoque habere. Vale. Gen. vi. Idus Oct. 1706.



J O S E P H O

R E G A L I O . S.

FLORENTIAM.

X V.

Tibi, doctissime, jucundissimeque Regali,
 magis quam ipsi Catullo, qui sacras non
 minus, quam humanas calles Literas, & Musas
 cum Religione feliciter componis, prior iste con-
 venit Titulus; alter quoque tibi, meo nomine ju-
 reque, cum ingenio prono adeo atque effuso in
 laudes Patriæ meæ, Magnæque Patriæ Parentis,
 Annæ Reginae, me tuum planè in posterum quasi
 Beneficiarium præstiteris. *Stimulos dedis Æmula*
Virtus; neque voto, ac mente saltem, re licet,
 beneficiis superari. Misi igitur Epigramma, vel
 speciem potius Epigrammatis, unâ cum Carmine
 Senatoris Filicæ, ut inde, atque ex Tuis æsti-
 mes, quantum nativo, verèque Florentino Ingenio,
 adscititium, insititiumque cedat. Oh quanta Flo-
 rentiæ laus, & Florentiæ solius post Athenas, ubi
 Natura cum Arte certat, utrum ibi sæpius feli-
 ciùsque nascantur Poetæ, quam fiant! Hospites
 etiam vestros eadem aura afflat: quisquis adytum

semel intraverit , statim vaticinatur. Non amplius nostri compotes sumus , gratiasque ipsas carmine reddimus. Oh quando Florentiam red-
dar ego , quando Amicis , quando mihi ? Exilium
est Genua. vi. Idus Oct. 1706.



PETRO ANTONIO

S A N I O.

FLORENTIAM.

XVI.

QUantum tibi debeo, doctissime humanissimeque Sani, si non ex tantis antea erga me præstitis, ex quo primùm Florentiam delatus fuerim, seu in Urbe præsentem, seu non semel longiùs remotum, officiis constiterit, in testimonium certè, literæ iueunte octobri Genuam missæ, admodùm amplissimum accederent. Nunc mihi demum ex discessu patet, quàm multos, magnos, bonosque Amicos, quamque mei omnes suprâ fidem amantes, vestra in Urbe reliquerim, & sanè adhuc frustrâ Genuæ requiro hominum eruditione, ingenio, sapientia insignium commercia, & colloquia, quibus Florentia supra omnes in Italia, & fortè in Europa Civitates abundat: Quibuscum tempus fallere, & à quibus instrui simul, ac erudiri, toties lætus, gratulansque solebam. Me verò nun eruciat, neque nunc primùm, desiderium Comitum Magalotti, digni ipsius Cosmi Principis Amicitia; summis in Republica honoribus; Cultu
à Li-

à Literatis ubique, & in omni parte studiorum. Quis enim mores Gentium, Politicorum Myſteria, regendi Populos artem meliùs rectiùſve novit? Hanc illi ſcientiam, Patriæ Patrum propriam, Civiumque in commune natorum, famamque ſummæ Virtutis comitem, compararunt Itinera, Legationes, Principum Aulæ, ac Concilia, verè optimæ non nomine tantùm, Sapientium Prudentiumque ſcholæ. Civilem Sapientiam Rerum Naturæ cognitio antecellit, inque omnium complementum, Divinarum quoque, ſubſequuta eſt. Neque hæc tantùm intra ſe continuit, ſibi ſapere, ut multi præſertim ex Magnatibus, ſive ex deſidia, ſive ex ſuperbia, contentus; ſed vel Publico, & in commune dedit, vel quantum in ſe eſt, paratus eſt dare: Solùmque pudor obſtat, & ne malè feriatis inanem, aut moleſtam, anxiamque gloriam captare videatur; quin omnia, omnes, proprio cuique ſermone, edocere valeat: ſed unus ſufficit cunâis Etruſcus, idemque non indignus à cunâis comparari; in quo regnat ille, Philoſophus, Politicus, Theologus, & quo non altiùs aſſurgere poſſit Ingenium Humanum, Vates quoque. At quis de Vatibus loquens, de Te, Divine Filicia, ſilere poſſit, atque tunc non ſtatim Antiquorum meminerit; aut quis tum non ſe quaſi aſpicere credat, & admi-

retur simul Horatios, & Petrarchas, hoc est Romam Veterem Augusti, Romamque denuò in Etruria renatam, atque reviviscentem; quodque nunquam antea visum, in uno, ac eodem conjunctos, ac spirantes: ipsumque ad se lætam Urbem attrahentem; Orbemque dehinc, si suus non fallat Apollo, attracturum? Quibus verò in oris, non auditus, non cognitus, non celebratus Magliabechius? adeo ut Florentiæ, ubi tanta illarum, quanta non alibi terrarum copia, & præstantia, consensu Eruditorum, non ferè opus sit Bibliothecis; quique, uti illæ esse debeant in consulentium commodum, Universis semper quasi apertus, facilisque aditu; atque Universis itidem utilis? Et quantum mihi quoque gratulor, quòd in area domus, libris undique, & Doctorum Virorum cœtu stipata, ac referta, apud eundem pridem viderim, ac postea agnoverim, in operibus loquentem, & futura cum nostro Sæcula, ipsosque Doctos instruente, Literis, ac comitate, non minùs quàm Natalibus, Illustrem, Patrem Quirinum. Et certè maximè Nobilium dos est, non scientia tumescere, ac inflari, nec se plus ceteris æstimare, quia plura sciunt: sed certè eo quoque nomine, pluris semper ab aliis æstimandos. Quem autem non ad se trahunt, eruditæ eruditi Principis Cosmi Deliciæ, ducti de marmore vivi vultus,

tus, & spirantia Cæsarum signa; inque Numismatis solum servatæ quasi nunc quoque Livii, Tacitique Historiæ, & totius Romani Annales Imperii; commissæ fidei curæque Bianchii, quarum omnium quidem ille mens est, quæ magnam agit molem, & per quem isti, Dii Gentium, adhuc vivunt, & nobiscum colloquuntur. Sed de Veteribus disserenti, & Antiqui Ævi Reliquiis, sanè nefas omittere Senatorem Bonarotam, Maximi Michaelis, solius ferè nostros inter homines, Veterum quaquaversum verè Æmuli, & Opera Operibus exæquantis, stirpem, qui Urbem Æternam ita tenet, suamque adeo fecit, in Inscriptionibus, Marmoribus, ac Columnis; ut ipsum Civem planè Romanum esse, sed Superiorum Scæculorum crederes, ante Gothorum, Vandalorumque Barbara Tempora, tantum ruinis Imperii, Artiumque, malè nota, vixisse. Vetus etiam Græcia, quæ Victorem suum cepit, Artesque in Latium intulit, quibus Roma Varrones, Cicero-nes, Virgiliosque debet, hic quoque suum agnoscit Salvinum, quos Ille omnes, ut pluribus profit, Etrusco Idiomate, Latinum Parentem viribus præferente, dulcedine etiam Græcum provocante, exprimit, nobisque reverà in Academia Orbis nobilissima, utilissimaque, feliciter representat. Quò, necdum fessum, quippe Vos inter versan-
tem,

tem, rapitis, in Mathematicis præstantissimi, Vincenti Ambra, Cognomentum Philosophi, & apud vulgus quoque imperitum meritò consequute; & Viviani Avunculi, in literis, & bonis, Heres, ac Successor, Panzanine Abbas? Quò Targeone, quo non alter penitus, distinctiusque rerum cognoscit Causas, atque Mirantibus Plaudentibusque monstrat; novam certamque à Sole, nostri Anima Mundi, condens Philosophiam? Quò Medice Papa, cui sua secreta, Natura, salutem Princeps, Publicæ Vinculum, commisit? Quò, Adimare, quasi in Monte Musarum, dum ibi residet, positus; & ex secessu, instruens Mundum, atque hinc in Vitam quasi alteram futuramque rapiens attollensque? Utque hæc inter, cum optimo Senatore Bartolino, sermones miscere juvat, lenire molestias, & labores, & miti, ac hilari sapientia, diem transnittere, nec perdere, sicque vita Beata, atque ipsis Principibus invidenda frui! Ut circumjacentes Villæ, atque extra Urbem, & numero, & magnificentia, sed sine Turba, sine strepitu, Urbs fermè altera, & aspectu, & pulchritudine, at quæ maxima voluptas, paucis licet ritè intellecta, & verò paucioribus à superis permessa, secreto, & secessu placent; cæterisque longè, mihi saltem præstans, liberioris Aeris, situque nobili, Vitelliorum, à me semper memoranda, semper

honoranda, Patruī nomine, at præsertim Nicolai
 Nepotis, magnorum vestigia Avorum, non sine
 laude legentis; cumque se quotidie, moresque,
 quasi in speculo, ad optimi Principis exemplar
 componat formetque, haud inviti cedent majores,
 interquæ exempla, & ipse aliquando erit. Sed me
 tempus, & charta deficerent, inque Volumen,
 quasi nondum esset epistola excresceret, si om-
 nium Nomina proferrem, digna hac in parte
 proferri, quæque mihi solum cognita: sed quan-
 ta est turba reliquorum, colloquiis, aut amicitia,
 sed non Orbi, meritis, & fama ex meritis, orta,
 incognitorum? Et quot etiam sunt, quos ni-
 mia modestia, & pudor, non boni semper
 consultores in literas Patriamque, adhuc quidem
 Publico subtraxerunt, & invidere? Sed non de-
 rit aliquando occasio, aut locus, nominandi cele-
 brandique Virtutes nunc omittas: & Sanium
 ipsum, licet invitum, suisque laudibus obstantem,
 apud alios saltem deprædicandi: Tunc audiet,
 conjunctam cum Jurisprudencia Facundiam,
 Amœna studiorum negotiis interjecta, musasque
 invisentes illustrantesque forum: Inque eo ipso,
 Urbanitatem candoremque, non, uti Plinio olim,
 & oh utinam falsò! ac uni observatum, malitiam
 prævalere, neque loci mores, in vitam transire.
 Sed, & Pisæ etiam hoc anni tempore, in Floren-
 tiam

tiam transmigrarunt, hoc est, ipsæ literæ (quid enim Pisis nunc superest præter Academiam?) in Professoribus suis : & id quidem magnum, imo maximum ; quum multò latius sit ab illis Imperium, minùs certè invidiæ obnoxium, magisque sibi securum, aliisque utile : quàm cum Respublica olim, classibusque potens, victricia per Italiam, ac circumjacentes positasque longius Insulas, perque ipsum Orientem, arma circumtulerit ; quando ubique, & ubivis, non tempore, non loco impeditæ, imperent Artes, & scientiæ. Et quis quæso Venerabilem Patrem Rossum, vel sublimitate, & varietate eruditionis, vel elegantia, & candore morum, vel gravitate, ac puritate vitæ superat? Certè dignus non semper Claustris includi, vel Academiæ spatiis circumscribi ; neque se tantum, vel Amicos, sint quoque quamplurimi, in otio erudito quamvis, quodque multò ipsi jucundiùs præstantiusque, Religioso, delectare : sed præesse populo, & denuò repræsentare Sæculo Veteres Ambrosios Augustinosque. Quid Grandio in Mathematicis acutius subtiliusque, & instar miraculi, Poeta audire, inter Mathematicos, paucos vestris numeris celebres? Quis duobus Fratribus Averaniis par, vel secundus, & eruditione, & eloquio, utriusque Latii linguæ? Laus illa Prioris Ævi, & fermè nobis incognita,

Jurisprudentiam cum Eloquentia conciliare : Et
 quantò minùs frequens inter Canonum Peritos
 reperire Vates, quæ folius, multas inter alias præ-
 clarasque Melioruccii laus est; cui olim Ecclesia
 Forumque, & quot Sæculis, atque adhuc desi-
 derata, debebunt Juris Sacri, ac Canonici Dige-
 sta, methodo, ac ordine faciliiori, parique facun-
 dia, ac viribus, cum illis nostri Civilis, veterum-
 que, verèque Romanorum ! Oh quales hæ, quan-
 tæque causæ mihi nunc Florentiam cunctis in
 Orbe locis præferendi ! Et, oh parce mea Patria ;
 tuus quandòque totus ero ! Et interim quam pau-
 ca desunt, unus, aut alter Amici Placens Uxor,
 carique, & dulces liberi ; oh utinam, & vos quo-
 que olim unà mecum illa teneat ! quodque si om-
 nia decssent Florentiæ, ibi tamèn Nobilissimus
 Anglus, Civis meus, ingenio, sermone, scriptis,
 bonis artibus, elegantia vitæ, atque morum faci-
 litate, tantùm non Italus, at Florentinus ; & utri-
 que nostrum amicissimus Derchamus. Vale. Ge-
 nuæ x. Kal. Nov. 1706.



A N T O N I O

MAGLIABECHIO. S.

FLORENTIAM.

XVII.

L Iteras, Præstantissime Magliabechi, eruditissimi nostri Clerici, nunquam à me satis pro suis in Rempublicam Literariam meritis æstimandi prædicandique, ut interim missa faciam, quæ nimia comitas in Hospitem vestrum expresse, eodem tempore mihi cum suis ad Te quoque, Genuam delatas, nunc demum transmittito; ut quam verè, quamque magnificè etiam in eisdem de Magliabechio sentiat, inde quoque non minùs quam ex alteris illis agnoscas. Quas quidem, priùs tuo etiam beneficio hic redditas, summa cum animi voluptate, summo etiam cum fructu legi. Et id quoque mihi multò lætius accidit, quod ipse fortè, utrique paulò ante incognitus, utriusque quasi amicitie conciliator, atque sequenter fuerim: Amicitie inquam, & commercii Literarii, quæ non solum vobis ipsis grata sint futura, sed nobis quoque, & Posteris etiam utilia:

Ta-

Talis quippe conjunctio pariet prolem Literariam, & ejusmodi filii heroum, ipsi quoque heroes erunt, & à minoribus semper colentur. Video etiam ex scripto, quàm optimè mecum conveniat, de meritis deque laudibus Itatorum Cl: Clericus: ipse equidem eadem sensi, eadem semper experientia ductus sensurus sum, dixique in Epistola priùs ad te cum Florentiæ unà adessemus data, quamvis iste meliùs feliciùsque, suas in literas, victurasque illas contulerit. Uno sum fortè superior, beatorque, eòque lator superbioque admodum, quod mihi ex hac legatione concessum, ipsos accedere, ac noscere posse, vivas audire voces, & oh utinam neque ipsis quoque ingratas reddere! adeòque non tantùm operibus, sed, & sermonibus delectari atque proficere; Illi pridem fama notus, & cui non fama notus Magliabechius? at nunc quidem, & Litterarum etiam commercio; sed quanto loci, quanto temporis intervallo! ipse pro libitu ad eundem accedo, ad colloquia admittor, à quibus tamen nunquam libens, nunquam non invitatus discedo. Audio frequentèr de omnibus differentem, & de omnibus doctè; nunc solum, nunc eruditis summisque Viris omnium ferè Gentium, medium atque interpositum, & ipsis quoque quin etiam confitentibus, ante abitum eruditionibus. Video sparsos
un-

undequaque librorum thesauros, verèque, & pro numero, & pro æstimatione thesauros, neque tamen ibi conditos, & quasi otiosos, atque in spectaculum factumque tantùm, sed in usum paratos; & sibi, ac amicis, uti Philosophum vita, non sola professione decet, communes. Hos consulere quando lubet, licet; humanitati enim solum cedit eruditio. Solis quasi instar, vapores colligit, qui in pluviam ad publicum bonum, ac in aliorum, & indigentium usus, ac commodum descendant. Nunc cum illo inter Bibliothecas versor, quas ipse omnes, ut suam propriamque novit percurritque; & quasi cum Magni Ducis, cura cæterarum etiam sibi, & sibi uni, commissa fuisset. Nunc Quirinum viventis eruditionis, pietatis, ac comitatus specimen, Te socio, inter libros convenio suspicioque, propriis aliquando, sui que ingenii fetibus augendos. Veniet ipse in numerum illustrium Auctorum, veniet, dixeram? quasi in Mose suo, non etiam nunc legeretur, semperque legendus sit. Nunc peragro loca, Savonarolæ olim vestigiis pressa, pro Dei Servo, oh titulum supra Regum fastigia! suo Sæculo habiti creditique; quæque proximis temporibus, quasi adorata à Carolo Cæsare, qui ipse postea in Claustris, vitam privatam, sanctam, suam, sapiens Purpuræ, ac Imperio prætulit! Nunc cum eodem

dem Ruris carpo delicias, ac honestas voluptates, & unà ad Veteres scandimus Fesulas; quarum quoque, seu temporis, seu vicinorum nimis præpotentium metu, vel injuria, jam ipsæ periere ruinæ: atque inde simul ascendimus Montem Franciscanum, cujus ad pedes, & in conspectu jacet patetque tota Florentia tua, mihi sanè altera Roma, rerumque pulcherrima; ubi testimonia adhuc servantur, tentatæ olim improspere cum Græcis, in Sacris, Concordiæ; atque eorundem fidei, nimium cum majoribus suis convenientis, mendacis fallacisque, monumenta. Nunc autem cum paucis, quos inter doctissimus, gravissimus, jucundissimusque simul Landius, literis facetiisque cuncta condiens; & quid mihi cum turba, cum unus sanè mihi sufficiat Magliabechius, si unum dicere liceat, cujus in pectus veteres cum recentibus migrarunt omnes? Pauperi adsidemus parcæque, qualis mea, mensæ, brevibusque dapibus; quas soli Hospites commendant, gratasque reddunt. Hic optima fercula, socratici sermones, vinumque quidem, proprium, suæ Hetruriæ faventis, Cœli donum; quo, & prisca Catonis fertur caluisse Virtus, neque qualia omni ævo Germanorum pocula, quibus ingenium obruitur, non reficitur, non assurgit; sed Platonis, sed Horatii æmula, ubi Philosophiæ, Musis, Gratiisque
lita-

litatur, erumpuntque cum Virgilii Jopa, in superum, naturæque rerum, inventorumque, sapientum, memoriam atque encomia. Sed ista Florentiæ solum inveniuntur, Florentia sola ergo in Votis, ubi Magiabechio, ubi studiis, ubi Legationis etiam mihi ante alias creditæ negotiis, una quasi, ac fixa, leta, & secura sedes. Vale: Genuæ. x. Kal. Nov. 1706.

LUCÆ ALBIZIO

SANCTI STEPHANI EQUITI.

P I S A S.

XVIII.

TUas mihi semper gratissimas, Albizj Eques, literas præterita hebdomade Genuæ accepi, lætus quodocunque ab Amicis convenior, commorantibus seu Pisis, seu Florentiæ, eruditionis, ac urbanitatis sedibus, benevolè equidem suaviterque de salute mea, & de publica una quærentes, & sanè nunc quoque, ut, & olim,

Omnis in Italia Fatorum vertitur Ordo.

Belgium equidem, ut antea, Belli, ac Armorum; neque minùs Hispania, ut sæculo abhinc, & amplius

H

plius

plius segnitiei, ac desidie Domicilium. Vincit
 verò, ut Mari, sic, & Terra quoque Anna An-
 glorum Domina; & pro veteri Regis Henrici
 Octavi dicto, cui adhæret illa, cæteris præest.
 Sed jam hic castris, hyems, & multum frequen-
 tes, & tantum non continui imbres, adeoque
 rupta aquis itinera, finem imponent; relictis in-
 terim in potestate hostium tantummodo, cis Mon-
 tes Susa Agri Pedemontani Oppido, (nunc enim
 Montis Ferrati Casale obsidetur) Cremona, ac
 Valentia Urbibus, & Mediolani Arce, quæ tamen,
 & ipsa brevi Cæsarianis, [sive à Gallis Italia cum
 Duce pulsis fugatisque, fractis jam Viribus, suc-
 curri non possit, seu fame pressa, contra quam
 Virtus militaris parum aut nihil prodest,] suc-
 cumbet cedetque nobis, & unà fortè cum Capite
 Tota Insubria. Interim ipse valeo, quantum quis
 valere queat, libris, ac amicis planè destitutus.
 Attamen memoria subinde recurrit, eorum quos
 Florentiæ reliqui, & inter eos quoque Vestrati-
 um Pisanorum, qui uti audio, suas nuper repe-
 tierunt Sedes Cathedrasque, & Academiam ite-
 rum illustrent, & convictu ac colloquiis doctis-
 simi humanissimique Albizii, mutua cum volu-
 ptate, fruuntur. Redeunti ergo ex Villa, misi,
 quæ modò Florentiam, de ipsis tunc in Urbe equi-
 dem agentibus, ad Jurisconsultum, & Amicum
 Sa-

Sanium scripseram; ut & constet me memorem
 illorum vivere, me semper optimi Albizii, &
 optimis dediti, memorem victurum. Vale. Ge-
 nuæ. Idib. Nov. 1706.

FRANCISCO MARIÆ

D U C C I O,

LAURENTIANÆ BIBLIOTHECÆ EX PRÆFECTO.

FLORENTIAM.

XIX.

NON tantùm fas sit aliena voce, doctissime
 Ducci, de Literis certè, ac de me quoque,
 si non id levius, optime merite, aut verbis Viri
 boni, ac nostrum utrique amicissimi Laurentii
 Magnolfi, sed & meis etiam, manuque ac scri-
 pto, ut animo testari, quantum tibi ob collatum
 Orosium, missumque dein Cl. Clerico inter Bata-
 vos studijs juvandis nato; atque ob novum dein-
 cepti priori additum beneficium, pingendo for-
 mandoque veteres tam affabrè characteres, sicque
 ipsas quasi venerandis membranas, uti ille loqui-
 tur, eruditis hominibus, alioque quasi in Orbe

H 2

po-

positis, repræsentando, & meo, & illius, & publico etiam nomine debeam. Sed non hisce contentus ultrà pergis, sentisque de eo quam par est magnificentius, in quo nihil quis laudare possit, præter studium benè de aliis merendi, quodque optimè velit & literis, atque viris doctis piisque, quos inter, nec notæ, neque meriti postremi, Franciscus Maria Duccius. Neque parùm refert, cæteras inter eximiasque Notes, callere Artem, qua vitentur errores, scriptoresque antiqui sibi pares, atque ad veritatem exprimantur. Quot varias, ac discordantes Lectiones; quot verbosas ac inamœnas planè disputationes; quot volumina, quantosque Criticorum labores; exscriptorum tantummodo vitia, sive ex incuria, sive ex inscitia, nobis immerentibus dolentibusque pepererunt! Quibus, & quanto melius, ac quanto studiorum compendio lucroque, Orbis Literarius caruisset? Quantumque temporis, posterioribus Sæculis nati, perdidimus omnes; quando de vocibus literisque priorum negligentia, si non autem, ut dictum est, turpius, & inde fermè necessariò, tantopere litigatur; cùm ad res ipsas evolvendas cognoscendasque, vita etiam vivacissimi non extendatur, neque sufficiat? Perge ergo, præstantissime Ducci, benè mereri de Genere humano, in lucem emittendo Veterum Libros, latitantes adhuc, &
de

delitescentes in tua quasi Laurentiana Bibliotheca; ut optimi posthac Codices, sine istiusmodi impedimentis, magis quam Commentariis, quæ intentionem legentium ut plurimum frustrentur tantum, atque minutiis frangant debilitentque animi vires, alioque avocent; legantur intelliganturque, ut minori certè incommodo, sic majori forsitan cum fructu: neque amplius pro Criticorum fastu, pars prima, ac tanquam præcipua Doctrinæ habeatur, de syllabis ac verbis, [id solum reverà fit] rixari; quo Fama inutilis, ac publico noxia; istiusmodi Scriptoribus comparetur, qui sibi magni, imò maximi esse videntur; at verò aliis, atque prudentibus præsertim, non rarò molesti aut inepti. Vale. Genæ. Prid. Non. Dec. 1706.

JOANNI CLERICO.

AMSTELEDAMUM.

XX.

Genua non ita pridem, amplissime Clerice; ubi adhuc ipse hæreo infelix inter Legationis moras, parum interim, si tamen aliquod; agendo, quod vel ad Literas, vel ad negotia spectet,

Æt, Salvini professoris, & græca, & omnigena eruditione, atque ingenio quoque tum domi tum foris clarissimi, Emendationes, & Correctiones in primum Anthologiæ librum, ac rursus in Epigrammata quædam adhuc inedita, & ab Holstenio in Stephanum laudata, Amstelædamum transmiseram; quas demum sequitur inserta huic Epistola, præterita modò ætate, ut meam apud te fidem liberarem, Florentiæ scripta ad ipsum tum fortè ruri longius quam pro more agentem. Hunc verò non tantùm inter Criticos, sed & inter Poetas quoque recenseas; qui sanè idem, & Quintum Calabrum atque Theocritum, hunc rura, & amores Pastorum, illum autem Homeri æmulum, ac vestigia Iliados prementem, Heroesque canentem, & Bella, præter alios fere omnes Epicos Græcos Poetas, Etrusca lingua reddidit æquavitque. His quoque postea adjunxeram literas optimi Viri Francisci Mariæ Duccii, cum aliquot versibus Orosiani Codicis ad formam M. S. prout ipse postulabas, delineatis, atque nunc etiam meas, ad eundem quoque, ipsarum comites. In quibus postremis, si de Criticis Grammaticisque minùs equidem honorificè senserim, id precor imputes, homini aliquatenus negotiis immerso, qui- que libros ipsos Veterum tractare, ac perlegere velit, nudos simplicisque, quam cum vel Scali-
geri

geri Salmaſſique ſuper eiſdem notis , aut huius
 verboliſis admodum , ac ingentibus Commentariis ;
 doleoque multum , ipſo quoque præeunte , Magni
 Scaligeri vices , qui cum ex illis Heroibus unus
 fieri potuerit , & ad eorum magnitudinem famam-
 que aſſurgere , maluit ferè , Sæculi vitio in imo
 monte , & quaſi inter Literatores , aut ſi id majus ,
 inter Literatos , ſi non ſolum præcipuè ſaltem con-
 ſiſtere , & par maximis , ſe infra , locum occupa-
 re . Non ita Magiſtrum ſequutus Grotius , qui
 tranſitu tantum hæc quaſi delibavit ; quare in al-
 lum poſtea Commentarii , & variorum annotationes
 editæ conſpiciuntur . Sed neque alios perſe-
 qui velim , quam iſtos Aucupes ſyllabarum , ver-
 borumque unicè tortores . Cui enim non lecti ,
 quibus non placent , quem non erudiunt , de arte
 Critices libri ? Is equidem Parraſianorumque ſcri-
 ptor , inter recentes , noſtrique ævi Quintilianus
 alter ; qui de auctoribus iudicia , ac eloquendi præ-
 cepta , non ſpiritu minori , neque minori ſacundia
 protulerit , quam Veteres , Dii illi Literarum ,
 quam ipſi Cicerones Demotheſesque . Quantum
 adhuc præſtitit , quanta & in futurum præſtitu-
 rus eſt , & nobis poſterisque ſuis ? Ille verè Philo-
 logus , Anthologiam dabit Grotianam , multò
 quam antea locupletioſiorem , multò emendatiorem ,
 & ſuis & aliorum laboribus . Ille quoque Oro-
 ſium

fiam dabit, qualis ab initio fuerat. Illo magistro
 novimus ipsi, venturique noscent, quid ætas hæc
 nostra in literis ubique Gentium egerit, quantum-
 que profecerit, seque super priores extulerit;
 (neque enim Natura aut hominum ingenia ad-
 huc effœta sunt) in mathematicis præsertim di-
 sciplinis, & Arte Medica; quid etiam in com-
 mune potuerit volueritque conferre; totasque de-
 mum Reipublicæ Literaræ vires, consilia, cona-
 tus, finesque uno intuitu conspiciamus. Inde prius
 in Bibliotheca sua Universali cuncta Eruditorum
 Opera, quasi in tabella ad vivum sæculo exhi-
 buit, ne quid ipsi nesciremus, & uti olim de Se-
 neca dictum, vel legenda ideo ad exercendum
 utrinque iudicium; in Selecta verò, in subsidium
 studiorum mole librorum ac numero jam labo-
 rantium ac fermè fatiscentium, ea sola quæ vi-
 ta sunt digna, vita, ac immortalitate donavit,
 usui simul, ac brevitati prudenter æquè, & beni-
 gnè consulens. Vale. Genux. xv. Kal. Jan.
 1707.

PETRO HIERONYMO

BARCELLINI.

ROMAM.

XXI.

ME sanè imprudentem confiteor in errorem incidisse, aliosque etiam incogitantiae meae nimium poenas dedisse, cum Mogarini certè nomen non alibi quam apud Auctorem inveniri possit, ac Poeta demum pro suo jure, quid enim non Vatribus licet, & honestum est! & carmen, idem finxerit, & titulum nomenque. Quod jam tandem cum nova etiam voluptate agnosces ipse ex incluso poemate, à quo cæteris initium; quibus quasi nunc totus conferitur hortus, musis musarumque cultoribus gratissimus; ac omnium ni fallor, quique aut fuerunt, aut futuri sunt, pulcherrimus: non opus est ut quis de præsentibus loquatur, Versaliensibus, aut Tiburtinis vestris; hic enim semper præsens erit, atque unus, in quem tantummodò, nec Anni tempora, (crede mihi, nunc quoque, at multò quam antea, certius Vaticinanti) neque tempus ipsum potestatem habet. Prima quidem in India, juxta Lusitano-

I

rum

rum Goam (dabo enim historiam rei que gestæ
 seriem) floris incunabula, inde Petri Regis bene-
 ficio, Etrusci Agri, ac Horti Castellani inquilinus,
 Cosmo tantum Principi diu floruit placuitque,
 nunc verò, & ipsi, & omnibus, quippe inter
 perennes relatus, cœlique solo, si ita loqui fas sit,
 insertus insitusque poetici, æternitatem Filicaia
 debet. Navigavit quidem Cadaver, siccato flore,
 meam nuper in Angliam, ac nostra quoque, ab
 eodem, perpetuo hic in Musarum Republica Di-
 ctatore, civitate donatum : sed versibus conditum,
 manet ac semper manebit, & supervacuus sepul-
 chri honores spernit. An verè dixerim prius, non
 illi anni tempora obesse, non aeris, seu frigidi ni-
 mium, seu humidi inclementiam, ex accepto heri
 Carmine, ipse iudex æquus sententiam feres : vide
 ergo, & mecum mirare, ut ipsa hyeme, hyemem
 contemnat, neque id tamen mirum, in Filicaia
 etenim,

Solemque suum, sua sydera novit.

Hæc sunt Xenia, quam jucunda, quam grata?
 ineunte novo anno, à Filicaia, conciliante Illu-
 strissimo Comite Magalotto, eodem cum ipso Se-
 natore spiritu, ac cum Laurentio olim Mediceo,
 affecto afflatoque, Musis mihi que data ; nunc
 equidem verè *feror altus* ! hæc etiam nostra sunt,
 & certè placitura Barcellino meo. Vale. Genuæ.
 Kal. Jan. 1707.

DE

DE MOGARINO

AD BRUMAM.

Gelsomino
Indiano.

B Ruma : anni senium te ego ,
 Naturæ ac sterilem dixi opere à suo
 Desistentis inertiam .

Parce . Ut nil aliud spina puerpera est ,
 Quam non edita adbuc Rosa ;

Sic hyberna quies aut Opus , Embryon
 Aut saltem est operis rude ;

Fecundumque tuo nil magis ocio .

Planta en frigus ab Indica

Defendunt paleæ : jam viduum est caput ,
 Et sopitus odor filet .

Quid tu ? Pictor opus fingere cœu solet
 Intra sparium , haud secus

Clausam trunco animam clam reparas , novos
 Florum in folliculos modò

Erupturam . Helice nunc re aded in gravi ;
 Arctos nunc tibi serviat ;

Planta omnesque poros , ut magè ferveat
 In venis calor , obfera .

Quàm caule uberior de Mogarinio
 Mox florum exiliet seges !

Quæve illis cupiet non redimirier

Nupta, innuptaque tum coma?

Jam te non cvetulam, Bruma, sed innubam

Decantabo Puellulam,

Sponsabo & numeris tunc ego te meis.

SIMONI IGNATIO
CAVALLI,
ORDINIS SANCTI STEPHANI EQUIITI.

PISAS.

XXII.

Miratus sum equidem prius, & quis non unà
mecum miretur, Illustrissime Ignati Ca-
valle, in Triremibus, interque Nautas, inveniri
conspicique posse, nobiles adeo atque doctos Ju-
venes, novamque quasi institutam in Etrusco Mari
Academiam, Alterasque Pisas; sed non mollem
natamque studiis sedem, non curis, non periculis
vacuam: quæ tamen, neque fallor, olim Patriæ
dabit, & pacis decora, & belli etiam præsidia.
Id nempe nobilissimi Ordinis institutum, ut Sancti
Stephani Milites, artes primum domi, securi in
umbra & otio ediscant; illarumque dein suique

ex-

experimentum foris, interque maris undas, contra perpetuos ferosque Christianæ fidei hostes faciant; priusque belli ac periculorum comites, quam duces fiant. Ita quem ineunte anno præterito Pisis in celeberrimo Collegio, seu Palatio potius, atque ita verè est, ubi pro dignitate habitant, & excoluntur artes, & scientiæ, Christianis circumdatum Philosophis, & nobilium corona juvenum eodem tendentium, atque ad parem aspirantium famam, cum nova summaque mentis voluptate discentem, ac disputantem, & Theologi etiam partes, quis faciliè credat? non minore quam illi ipsi etiam laude, acumine, & facundia, sustinentem implentemque, suspexeram; paucos intra menses, diversum quasi in Orbem delatum, armis simul litterisque intentum, nihil minùs, ipse cogitans, neque aliud quam iter maritimum Genuam versus susceptum prosequi, quò me Civium negotia, & maximæ Reginae jussa vocabant, in eadem nave Divi Patroni sui nomine superbiente, qua Magni Etruriæ Ducis beneficio ferebar, letus atque mirabundus deprehendi. Oh quam felices dixerim, seu bella vocent, qui pro aris patriaque pugnent; sive mari se subducant hostes, suasque apud oras tutius latitent; otium illud maritimum, legendo atque observando, neque inertia, vel ludo tantùm; aut
 nihil

nihil aut turpiter agendo transmittant; vel quod proximum, dies magis fallant, quam vivant! Hujusinclytæ veritatis, Tu modò, Eques nobilissime, exemplum in hoc ipso tuo itinerario maritimo, tam doctè, tam facetè, tamque prudentèr pieque confecto, & in publica commoda emissò, cujus etiam & me voluisti, ut priùs quatrìdui Comitem, sic & nunc esse participem, præclarissimum sanè utilissimumque dedisti. In eo solùm culpandus, quod me longè supra meritum extuleris; in quo tamen aliquatenus mihi, licet non sine rubore quodam, plaudo gestioque, cum me Tibi virisque bonis, exterum hospitemque vestrum, præsertim studiorum causa, non penitèns displicere sentio. Vale. Genux. viij. Kal. Apr. Die Deiparæ sacro. 1707.

B E N E D I C T U S

A V E R A N I U S

HENRICO DE VILLA NOVA, &c.

GENUAM.

XXIII.

Q Uidam amici mei edendas curarunt, Henrice Clarissime, decem dissertationes, quas vernaculo sermone conscriptas proximis annis in conventu doctorum hominum recitavi. Quærenti mihi cui potissimum hoc opusculum dedicarem, tu statim occurristi, cujus humanitas, & benevolentia, qua me complexus es, ad hujusmodi munusculum tibi offerendum me invitaret; dignitas, & amplitudo, & eloquentia, eruditioque sperare cogeret meos hosce labores sub tui nominis umbra tutò in lucem prodituros, & non vulgare lumen à tua claritate in posterum accepturos. Velim igitur me certiore facias de tua voluntate, rescribasque an tibi cordi futurum sit obsequium meum: mihi autem nihil accidere gratius potest, quam si annueris votis meis. Cupio enim, & etiam atque etiam à te peto, ut observantiæ, & amoris erga te mei finas aliquod extare monumentum.

mentum, quod si fieri possit,

Canescet Saeculis innumerabilibus.

Sin autem imbecillitati meae tantum sperare non licet, & quominus immortalitatem nominis consequar,

Frigidus obstiterit circum praecordia sanguis,

Pervelim, ut saltem qui nunc homines vivunt, intelligant me tuarum virtutum esse maximum admiratorem, nec praestantiae tuae quemquam antepondere. Vale. Pis. Frid. Id. Apr. an. 1707.

B E N E D I C T O

A V E R A N I O, &c.

P I S A S.

XXIV.

DIE modò Veneris praeterito, Optime Doctissimeque Benedicte Averani, quo tuae semper & merito acceptissimae, tum Auctoris causa, tum argumenti reddere erant literae, proximoque Saturni, inter Legationis Officia, instantibus Tabellariis, quaeque Comiti Petroburgensi nuper in Hispaniis à Partibus Caroli Regis Armorum Duci, hincque Taurinum properè disceden-

denſi, præſtanda quoque fuerant perfectis, neque mihi ipſi morem gerere, neque grati animi, atque munere tuo quali ſuperbientis, indicia proferre prius licuit. Et quod quæſo grandius præſtantiusque beneficium Alter in Alterum conferat, quam nominis famam & immortalitatem, quas tuis ſanè operibus inſertus, atque indè monſtratus, quis ſibi non tum ſperare, non vindicare valeat? Neque credo quenquam ita ſecreti, ita ſilentii amanti, ut illi faſtidio ſit, poſtumam certamque anticipare Laudem, aut apud Poſteros ſaltem noſci, ac tenebris & ſepulcro ſic extrahi, tollique humo,

Victorque Virum volitare per ora.

Et tu quidem ille es, qui hoc potis, aut nullus; quem latinè dicentem, vel Ciceronis Roma ſuum facile, ac libentè agnoſceret; quem etiam intenta ac acri ſilentio deſixa audit; atque peroranti ſocio aſſurgit ſequè inclinat Academia Florentina, ac jure miratur tum veteris tum recentis ſuæ linguæ, ac ſacundiæ principem. At nonne tunc ipſe inſanire videor, qui ejuſmodi viro Orationem, Genuæ licet paulò ante in Senatu pronunciata, mittere audeam! curas quippe inter ac negotia, atque ab Hoſpite tantum, peregrino & Britanno, non populari veſtro, non Cive Italo formatam, quibus ſermo iſte & eloquentia nativæ ſunt ac propriæ dotes. Sed tamen & ad illum quoque

accedit, cujus eruditio comitate, mansuetudine, atque summa modestia, quæ sola res in ipso culpanda, miscetur ac temperatur, qui neque inter eos sit, quorum meminit Plinius, neque nostris temporibus quandòque omissum, qui *Amicos suos carpere, Judicium vocant*. At fortè & imprudentiæ etiam arguar, nec tam civiliter egisse, qui demum Pisas Concionem transmiserim, qua pristini renovantur dolores, victæque Gentis pudor; quasi & nunc quoque ipsæ liberæ forent, nisi sit,

..... *Libertas gratior ulla,*

Quam sub Rege pio.

Sed longè superior elapso, nostroque sæculo, Urbs illa videtur altera victrice sua, neque domina; cùm in hac artes & studia floreant, & celebrentur, isti non nota, quodque multò pejus, ac opprobrio majori sit, non equidem æstimata. In Academia igitur triumphat de Ligurum Republica Populus vester, & à vobis Literarum Professoribus habent, quod non ampliùs Genuæ invidcant Pisæ. Vale. Genuæ. xii. Kal. Maji 1707.

PETRO HIERONYMO

BARCELLINI, &c.

ROMAM.

XXV.

Post nimias sanè laudes, addis insuper, *sed*
 *de hac ad te iterum*, de nupera scilicet
 mea concione in senatu scribens, Optime Barcel-
 line, benignitate sanè ad culpam propius acce-
 dente, sed ita clauditur epistola; ac mihi nunc
 Genua Florentiam discedenti, non amplius libe-
 rum erat, novam expectare scribendi gratiarum-
 que unà agendarum materiem. Romanis verò
 auribus, atque in Urbe ipsa, Angli hominis Ora-
 tionem, ac aliis quoque scriptam, inque ocio de-
 mum lectam, non displicuisse, magna exigui
 operis merces, præmiumque summum. Hinc de-
 nuò crevit audacia, & novum mittendi, aliisque
 numeris Opusculum, seu veriùs, habitu tantùm
 mutato vetus; nec tibi, neque Romæ priùs inco-
 gnitum: idem Titulus, *Vaticinium*, iidem sensus;
 & oh cum vestro secundo, de eo quoque aut
 idem sit vobis cum priore Judicium, aut idem
 saltem error! Ibi quoque iterum legas Nostrada-

K 2 mi

mi Carmina ex suo Gallico, in vestrum propriè sermonem, Romanum scilicet, versa: Ibi quoque & repetitam cernas, audacter sanè, post cladem etiam in Hispaniis acceptam, Caroli Regis magnitudinem, & Britanniae nunc verè Magnae, olim maximae futuræ, Imperium: Scis enim optime, neutris quidem ipse accensendus,

Non ea vis animi, neque tanta superbia,
omnia poetis licere, omnia vatibus esse certa. Interim fas sit mihi optare, Caroli Regis accessionem brevè fore Neapolim, atque inde pacem saltem Italiae redituram.

In votis equidem desinere volebam, sed cùm etiam præ manibus erat, & aliam prioribus, multùmque quidem diversam chartam addidi; quando etiam Italiae, invitus mærensque loquor, præ aliis ferè Gentibus, non parùm intersit, & ad famam etiam spectet, non adeò frequentèr committi homicidia, hasque adeo terras, tam Populorum genio ac indole, quam soli Cœlique natura felices, ejusmodi flagitiis non pollui, neque Summi Numinis iræ vindictæque eo nomine subijci exponique. Satis Bello peccatur, ut Pax sit quoque cruenta; & ipsa itinera, atque avia locorum, Urbibus atque hominum Cœtibus tutiora. Vale. Genuæ. iij. Id. Jun. 1707.

PETRO HIERONYMO

BARCELLINI.

BONONIAM.

XXVI.

NON adhuc vidisse Romam, non sua in Roma Barcellinum, & mihi damno neque modico, summoque dolori fuit; non tamen illi potuisse modò iterum occurrere, vocesque mutuas gratasque invicem reddere, Florentiam quasi meam nuper delato; & pristinum dolorem renovavit, & ampliùs indignationem magnoperè accendit. Irascebar autem meritò Genuensibus, qui tantùm, reditum meum, alteram quasi in Patriam, morabantur; adeoque in longum differebant Amicorum occurfus, doctorumque sermones, ac consuetudinem virorum, quos Cives suos aut Incolas tenet, hæc Urbium pulcherrima, sinuque suo domestico amplectitur semper fovetque. Quanto verò nunc magis, cum tu interim aliò discedis, & hìc non visum, Bononia, quasi alius Orbis, quasi ultimi mei Britanni, nunc destinet, novoque hospite gaudet, suisque læta adscribit. Tibi interim, Vir optime, munere priùs
in

in Urbe egregiè functo, jam sacrum cum Dignitate otium alibi contigisse gratulor; ideoque spero atque opto Bononiam, tibi nunc ipsius Romæ vice, in studiorum æquè oblectamentum ac adjuvmentum successuram. Multum etenim refert, quo loco vivamus, qua consuetudine utemur: ita sanè aliud, in Urbe Rerum Domina, ac in Ponto, Ovidio Ingenium. Vellem certè, civitatem illam alteram, sibi semper parem futuram, talemque reverà, qualis erat superioribus sæculis, quum ubique gentium, pro Legum Domicilio habebatur; vel qualis denique etiam nuper fuerat, suo in Malpighio. Ibique demum pingui in solo, tuo fruaris ingenio, & quali nunc frueris optima valetudine; atque si precibus locus, diu duratura; ne desit Publico, ac cæteros inter amicos, mihi quoque profuturum, Doctrinæ, Morum, Mansuetudinis etiam Christianæ, Exemplar. Vale Florentiæ. iv. Id. Jul. 1707.

ILLUSTRISSIMO COMITI

LAURENTIO

MAGALOTTI.

FLORENTIAM.

XXVII.

ME novum, meumque jam annum inchoantem, Genua primum ex diuturna mora, & in longum extractis, ac quasi sine fine negotiis minus grata, & deinceps itinere tum maritimo, tum terrestri, tutò citòque expeditum, Tua tandem, nobilissime, atque mihi amicissime quoque, Comes Magalotte, Florentia excepit; suisque deliciis, & Amicorum præsertim doctorumque hominum consuetudine, quos inter utrosque, Tu plurimum meritò emines, recreat admodum reficitque. Quam verò juvat Angliam, seu nunc lubet cum Patria vocare Magnam Britanniam, antiquam matrem, quasi iterum agnoscere, & repetere in Etruria; notas invicem audire voces & reddere; sæpiùs interesse eruditorum coetibus sermonibusque, quibus ali pascique, ac quadantenus, suoque modo, & in quantum mea fert mediocritas, accrescere quoque possit ingenium;

me-

meque ita frui planè vita, pridem sanè per vices
 tantum usurpata, priore melioreque; sicque una
 in Florentia, quod vix credendum, vix equidem
 optandum erat, neque alibi reperiendum, Oxonia
 simul & Londino, hoc est studiis, & Republica
 rei, negotio atque otio, inque cumulum, valetudine
 quoque in integrum restituta, gaudere lœtarique? Hicque
 modò Academiâs, quam numero dotibusque varias! Seu
 publicas, seu privatas, frequentare; & ubique adesse recitationibus
 nobilissimorum operum, quibus & Veterum mores,
 atque ingenia denuo, hodierna æmulari Etruria;
 modò me in arctius contrahere, & in uno Comite
 Magalotto, omnes quasi simul invisere, simulque frui
 Academiis: nunc autem curis de Republica quasi vacuum,
 & immunem, aut illis saltem paulisper sepositis,
 amico, vel libro comite, spatium inter prata, & nemora,
 turba, calorem, molestiarumque, brevi illo, at gratissimo
 certè intervallo penitus expertem; nunc colles
 supinos facilesque tueri, atque inde subjactam
 latè planitiem, urbemque ipsam, & juxta sparsas
 hinc inde ex omni parte frequentes pulcherrimasque
 villas, & ludentem errantemque per campos
 vallesque Arnem, ingeniorum semper vatumque
 altorem, in proximo spectare; nunc temerè viridi
 in ripa, sub umbra musis amica sedere,

&

& mecum nonnunquam sine arbitro certare numeris; mox domi redditum, in horto, rus penè alterum revifere, ac interim dapibus inemptis, folique fructibus vefci; folitoque dein, meoque acquiefcere lecto; & fomno repetere, quæ non invifus, non pœnitendus, priùs obtulerat dies. Sic hic quoque precor Annus, publicas inter curas, atque otium fubinde, non inhonestum, aut indoctum decurrens, nec Patriæ quidem inutilis, neque mihi omninè injucundus tranfeat. Sic Te quoque, optime Virorum, confcio, neque credo penitùs improbante, mihi veftra in Patria vivitur, fic verè vivitur Florentiæ. Vale. Ex ædibus meis Florentiæ. vii. Aug. juxta ftylum Julianum 1709.

PETRO HIERONYMO

B A R C E L L I N I, &c.

BONONIAM.

XXVIII.

Nihil credas, Optime Barcelline, mihi meisque optatius unquam, aut gratum magis contingere potuiffe; quam tibi, vel quibus ipfe benè velis, quod in nobis fit, præftare officium,
L
Ne-

Neque quod foemina sit, quod minor, quod ferè vidua; (quod absentes enim parùm mortuis distant conjuges, id nimium expertus loquor) quæ omnia supplicem etiam Judici conciliare debeant, tantum apud me valent, quantum fermè unius Barcellinus. Solum at mihi dolet displicetque, quod tantummodò inutile nomen præ me feram, quodque sanè apud alios vix aliquid possit, nedum apud Judæum, ac præsertim Liburni commemorantem; cum & Gens illa vafritie, ac dolis multum ubique se æstimet; neque alibi magis, quam eo loci rixis litibusque abundet. Sed tamen ibi non deerit quoque Auratus noster promovendo negotio, quantum ab illo, Mercatore scilicet, suisque ac sociorum negotiis implicito, expectandum sit, aut vir acer admodum, & in jure ac eorum artibus versatissimus, Illustrissimus Alexander Catalanus, amicus meus, patroni atque advocati partes impigrè suscepturus; & ob injurias ipsi modò illatas merito illis infensior: Sed neque te latet, vir perspicacissime, Jurisconsultos, bonos quidem viros, sed non nunc Cincia lege obligatos; dum aliorum agunt, suam etiam plerumque rem agere; atque in Foro præsertim, ex longissimi temporis præscriptione, vix quidquam gratis fieri. Utcunque verò, expediantur litis instrumenta ac mandatum; atque huc tandem transmittantur,

tur, seu Bononia, cujus, ut ex fama prius, jam autem & ex literis patet, tu quidem breve gaudium eris; sive Roma, quæ læta simul ac grata redeuntem excipiet, atque novis insuper honoribus imperiisque ornabit augebitque. Experiemur sanè vires, brevique videbimus, an sit ibi juri, an sit & gratiæ locus: Sententiam demum impetrabit causæ æquitas, & fortè amici, ne sit longius dilata; at certè beneficii vice erit, à Judice citò dimitti; atque ita à Causidicorum Legulejorumque aliquando ineptiis, sit verbo venia, at sanè semper molestiis, absolvi atque liberari. Vale. Florentiæ..... 1707.

E I D E M.

R O M A M.

XXIX.

QUod tu mihi injunxeras, optime Barcelline, id equidem nefas non præstare; neutiquam vero eventum, quod à nobis minimè pendeat. Unum interim metuo, ne egregii Juvenis, de Rege Carolo, deque Patria bene meriti laudes, ut olim de Agrippa, Italo quoque, & à summo etiam vate, cive suo dictum, ingenii culpa ipse

L 2

dete-

deteram. Superest tantum, ut te neque in amicū Gallianum pietatis, neque me mei in utrumque obsequiū pœniteat. Vale. Florentiæ. Id. Sept. 1707.

ANTONIO MARIA

SALVINO.

XXX.

ITerum, optime doctissimeque Salvine, ad notas atque benignas confugio manus, ut sit qui luctus legat meos, neque me nimium Dolori meo concessisse credat. Quæ ergo peccaverim, precor, non parcens, neque amici instar, emendes; multa quidem aliàs, occupato, & dolenti quoque condonaturus. At non solum mea Patria materiem lugendi, sed & vestra etiam Etruria, altera quasi Patria, maximam nuper in Filicaiâ Senatore, & Vate amisso, omnibus equidem præbuit. Id argumentum ut mæroris gravissimum, ita certè tuo, Vir magne, civiumque suorum ingeniis haud impar: & ille dignus, cujus quod nunc unum superest, colatur grata semper, ac quasi consecretur memoria. Vale. Florentiæ. Pr. Non. Oct. 1707.

SE-

SEBASTIANO

BIANCHI.

XXXI.

NEutiquam mirandum, præstantissime Bianchi, aliqua in Inscriptione heri visa minus placuisse tibi viro peritissimo omnis antiquitatis, quæ quum multa olim opera magnifica, curam tuam, tuumque sub Optimo Principe Cosmo Decus, equidem produxerit; ea quoque paucis, ut plerumque, vocibus, & sua quadam majestate, commendaverit posteris. Sed mos alius, ac admodum diversus, postea obtinuit; ac quædam quasi verborum pompa, in simplicioris styli, & uti videbatur rudioris quodammodò, locum ferè successit. Media ergo quadam via nobis fortè incedendum est, inter simplicitatem illam scilicet Veteris ævi, cultumque ac luxum, ut ita dixerim præsentis; atque aliquid etiam nostrorum hominum auribus concedendum. Satis longo etenim tempore, deliciis quibusdam, pompæque sermonis aßueti sumus, & inde penitus recedere, non omnibus certè, neque plurimis quidem placebit: & uti ille dixerat olim, quid si ad populum

lum provocabunt Lectores? Quique veteres tantum spectant, (quod sanè in se melius) caveant interim, ne & ipsi ab aliis, licet minùs peritis, attamen numero præstantibus, inter Novatores etiam habeantur. Obtinet non rarè, imò frequenter Martialis illud,

Mallem Convivis, quam Placuisse Cocis.

Cui precor non Cæsaris Commentarii, nudi illi rectique, ac ipso Cæsare, Imperii Romani (ut verè Magnus Scaliger) ac simul Sermonis Principe, dignissimi, non & olim placuere, non etiam & semper placituri sunt; sequentibus autem admirationis, quam æmulationis, verius materia? Aliter tamen Livius, imperante quoque Augusto, scripsit Historiam; omnia orationis adhibens ornamenta, atque inter Latinos, Historiæ etiam pater agnoscitur. Deflexit à severitate Antiquorum Cicero, & lætiores Orationi intulit locos, atque copia præstitit; adeo ut non tantum summi Oratoris famam, dum vixerat, assequutus fuerit; sed ut apud Posterios, sub eodem nomine, & ipsa etiam contineatur Eloquentia. At fortè quis dixerit, me, hoc obtentu, vitiorum errorumque meorum agere, aut quærere Patrocinium: Non tamen ipse ideo contumax futurus sum; semper enim melioribus cedere paratus, & Bianchium sanè pro magistro quoque habiturus. Vale. Florentiæ. xv. Kal. Nov. 1707.

PE-

PETRO HIERONYMO

BARCELLINI.

XXXII.

TAndem literas ab Excellentissimo Comite Daunio, quales fermè optabam, hoc vespere accepi, hispanico ut vides sermone conscriptas; multo equidem cum verborum in me honore, neque minori in Gallianum tuum affectu. Et sanè ipse libenter crederem, Germanica, idest optima fide missas. Id certè meretur summa Viri virtus, Neapoli sine vi recepta, Cajeta armis capta, totoque demum Regno pacato; nunquam satis deprædicanda. Fausta ibi quidem omnia & læta; non ita Florentiæ, quæ nuper in Filicai Senatore maximum suum decus amisit. Et carminum dabit illa brevè pro more proventum in Academia: Sed quis defuncto Vati, aut par erit, aut secundus? Quis etenim illum, jucunditate, sublimitate, proprietate, judicio æquaverit, nedum superaverit? Non erat ab Horatio ad Filicaiam alter Horatius, ut idem quasi denuò renasceretur, duo ferè millia annorum requirebantur. Omne sæculum suos jactitat bello Heroes; & quotidè

tidiè fermè nascuntur aut fiunt Principes. Novem Lyrici aliquando, sed non erat alter Pindarus apud Græcos : neque inter Lyricos Latinos, si Quintiliano optimo Ingeniorum Judici fides, alius post Horatium vel legi dignus. Idem erit judicium de Filicaia posterorum, ut idem quoque fuerit unà Viventium; id enim ejus magnitudini, & felicitati etiam accessit; quod superstes ipse, ac citra mortem & funus, omnium utroque Latii Sermone, & Carmine, tum Veteri, tum novo, facilè princeps agnosceretur. Ultima illi Carminis materia, Virgo Deipara : quo etiam mortem, nondum morbo affectus, brevi venturam prædixit sprevitque, Nosterque adhuc, alteram vitam, veramque Patriam, totus ac unicè spirabat. Inde paucos post dies, lenta febris correptus senex, viribus infirmior, mente vegetus, parque sibi ad ultimum quasi spiritum, nobis ac sæculo, cum maximo omnium ordinum dolore, ereptus est. Et ille tibi olim, ac Romæ, in Mogarino suo cognitus ac laudatus. Ipse verò non tantùm summum Poetam, atque omni alia laude Virum insignem desleo, sed Amicum quoque; neque hic tamen tam meum, quam publicum Luctum refero. Vale, Florentiæ. xv. Kal. Nov. 1707.

GISBERTO CUPERO.

DAVENTRIAM.

XXXIII.

ANtonii Magliabechii communis, & nobis atque literis amici beneficio, tuas, præstantissime Cupere, Kal. Oct. modò præteritis Daventriæ scriptas nactus, inde & Te benè valere, publici boni ac communium studiorum, neque me tua adhuc excidisse memoria, & mei quoque causa, non parùm sanè lætabar. Utque illis benevolentiae in me summæ, civilis prudentiæ, atque eruditionis exquisitioris plenissimis, aliqua saltem in parte satisfaciam; scias nondum typis impressum Numismatum indicem, satis amplum quidem pro materia ingenti variaque, à Fittono pridem confectum, neque tamen hic pro dignitate sua imprimendum censent, quum ærea tantùm, aut pauca ex argento, Græcorum, contineat; in quibus etiam, Latini sermonis quam Græci peritior, nonnunquam fallitur. Sed planè novus alter, atque plenus, à rei Antiquariæ peritissimo, Sebastiano Bianchio, cui, isti thesauri, unà cum tota illa Magni Ducis superba admodum, ac erudita

M

dita

dita suppellectili creduntur, paratur equidem, at-
 tamen qui tardè, pro mole sanè Operis, procedat. Et liber iste, si in publicum prodierit, cuncta etiam Cimelia Medicea, Tibi certo læto, atque unà Orbi Literato exhibebit. Tuque sanè, tuusque Spanhemius, eis in litteris, adeoque in omnibus, illustria in perpetuum nomina, sæculum docuistis, quantum illæ ad Historiam, ad mores Principum ac Populorum, ad omnem denique antiquitatem probe perfectèque intelligendam conferant. Inter alia verò ac plurima, quæ in hac Urbe Florentia, (quantum illa Tibi meritò, ut de me interim sileam, hoc nomine placet ?) ac Palatio, quasi Musis Gratiisque dedicato, in augmentum Literarum, atque Ornamentum, quotidie sunt ab optimo Principe, cui gentilitia est, & quasi Hæreditaria virtus, ad liberos quoque posterosque unà cum principatu ventura, animum artibus intendere promovendis, novos prioribus addere thesauros, Gemmarum, Statuarum, Inscriptionum; & quæcunque vel animos vel oculos eruditiorum elegantiorumque hominum læto spectaculo pascere aut oblectare valeant, novæ etiam Cameræ ac receptacula apparantur; ubi meliùs distinctiùsque in suorum Exterorumque gratiam commodumque, locentur disponanturque antiquorum Romanorum domesticum Instru-

strumentum, quod ibi magna copia servatur visiturque, Inscriptiones veteres, quæ prius ex omni Italia advectæ, aut frequenter admodum, & nunc quoque in agro Etrusco, reperiuntur effodiunturque, res Arte etiam, vel Natura spectabiles, quas inter nefas erit omittere, cum alibi frustra, par quid, aut simile, per cunctam Europam quæras, omnes fermè insignium Pictorum ubique gentium effigies, sua manu depictas, ab Eximio Raphaelæ ad Carolum usque Marattam, qui nunc in Vaticano sub Maximo Clemente artem, quam olim manu instruxit ornavitque, non minori quoque hodie cum laude ac utilitate, mente regit; quos inter, Vestrates Rubenius, Vandikius, Vanderfeldius Roterodamensis, ob Malebrugium Ducem celebris, & quot alii? multum eminent; eisdem parietibus inclusas, eisdemque illustrantes videbis, atque mecum admiraberis: Id verò primùm, inceptum auspiciis Magni istius Leopoldi Medicei, Cardinalis, & Philosophi, uti testantur Inscriptio, & Epigramma, quæ brevè legentur insculpta statux ibidem principe loco ipsi nuper à Serenissimo Nepote dedicatæ, studia ac magnificentiam Patruī Majorumque suorum piè ac feliciter æmulante, & quidem supergresso. At fortè prior illa, infra simplicitatem ac majestatem Veterum videbitur, posteriusque, acumine multum Græcis, &

Romanis cedit Ingeniis; adeoque ea his tantùm inservi, ut nova quædam Literaria, & Sequioris ævi fœtum. Par autem sanè priori optimoque, & post Horatium quoque, (quum legem minimè futuris posuerit Quintilianus) cumque illo simul legi dignus, in Patria ac alibi Terrarum, atque à te etiam, vir summe, tanti æstimatus, Filicia Vates ac Senator, uno paulò plus abhinc mense, Sæculo, non Famæ defuit vivere. De quo equidem melioribus destitutus, (neque tamen silere penitùs aut debeam, aut possim) pauca exscripsi adjunxique, quæ recens à funere, atque luctui planè impar, licet & negotiis eodem tempore occupatus, & penè oppressus, in amici cuiusdam sinum effuderam. Cùmque in tuis etiam facta sit mentio Clypei Voodvvardiani, aliquando Cuperi Commentariis, illustrioris multò futuri; ejusdem etiam descriptionem carmine effictam misi; & nisi valdè fallor, neque civium meorum indole, neque Italo prorsus cœlo indignam. Unum tantùm in eo notandum, quod in amici laudes effusior fuerit auctor, nimiumque in ea parte, ingenio, pro more sanè Poetarum, indulgens.

Feriæ nunc quidem sunt in Orbe hoc citra Montes, & Belli, & Negotiorum, & quasi animorum quoque; attamen multi credunt dolentque,

que, Neapolim hoc anno, nobis, Tolonam atque unà forte pacem eripuisse abstulisseque; dum Hispania interim, quæ Caroli est, ægrè ac vix spiritum trahat; & de Catalonia pœne desperandum fuerit, ni laboranti Provinciæ præstò aderint nostra Palatini Militis ex Italia auxilia. Paria ut vides tuis retuli, & oh quam velim, ut mole, sic etiam & Pretio. Vale. Florentiæ. xvii. Kal. Dec. 1707.

PETRO HIERONYMO

BARCELLINI, &c.

XXXIV.

SI non sit Tibi, Optime Barcelline; gratulandum, quod tu nunc Romam teneas; at Romæ sanè mihiq; gratulandum erit, quod te illa teneat; Negotiis quidem adhuc publicisque curis occupatum, at deinde multò gratiùs feliciusque otio, ob honestissimas justissimasque causas ac rationes, propter ætatem scilicet, ac merita, majori cum dignitate ac lætitia, iterum restituendum. Omnes certè Patriæ commodis, ac utilitatibus obstricti tenemur, neque nobis solis vivimus;
in

in ultimos annos licet quidem manus injicere, & reliquias saltem vitæ nobismetipsi aliquando vindicare. Tibi ætas matura rebus, vegetaque, ac agendis sufficiens. Non potes adhuc bona cum gratia vacationem munerum, ac laborum petere; neque habes legitimam secedendi causam, aut excusationem. Prius quidem oportet eorum præesse rebus, quas nunc summa cum fide laudeque tractas procurasque. Vacare interim curis, interesse negotiis debes; ad quæ via optima libris sternitur studiisque; hic verus illorum usus cernitur; hinc anteaactorum laborum ratio benè constat; huc omnis studentium spes tendunt: suaque hæc ad extremum, ubi Virtuti locus, præmia consequuntur.

Quod Ravennæ impressa tandem fuerit! Dedicatio libri, qui ipse interim Florentiæ typis mandabatur, & nunc unà hic cum Præfatione compingitur venditurque; latiùs ea ratione spargitur beneficium; atque eo nomine iterum quoque Romæ multum à Nobis imputandum est. Decem verò abhinc dies, librum ipsum cum chartis aliquot eòdem spectantibus, per tabellarium hinc ad Vos discedentem, transmisi quidem ad illustrissimum Abbatem Fontaninum, Tui nondum Urbem versus à Bononia discessu cognito, cujus etiam antea officiis, à doctissimo Aulo-

etore, Antigermonium. Suum acceperam; multoque cum fructu, uti alii omnes, perlegeram. Nunc Tibi, quoque non magno intervallo idem destinatur, & Petrarcha (quem huic Argumentum operi benè scis dedisse) pro suo jure apud te locum, defensi ab altero Amyntæ, occupabit; supplebitque non minor Hæspes, neque planè invitus, Talli Vatis Vices.

Heri etiam vespere, quo manum amicam aspexi, literas quoque dedi ad Novum Neapolis Proregem, Comitem Daunium; & Dignitatem illi gratulatus sum, qua Genti, quæ ipsius consiliis armisque nuper tam facilis cedebat, præter Cajetam suo malo tandem edoctam, regendæ admovebatur: atque iterum ea occasione, nobilissimi fortissimique Juvenis, Galliani tui, mentionem injeci.

Sed ne vacuæ sint penitus literæ, neque sine munere, (ut & olim apud Orientis Reges) Roma sit adeunda; suæque, Urbi Antiquitates, Veterisque Ævi Reliquiæ, semper in pretio futuræ sint; adjunxi versus, in Clypeum antiquum, nunc etiam Londini Servatum, non domi quidem, sed in Italia natos; & si rectè sentio, antiquam illam artium matrem, & numeris, & spiritu, genioque proximè referentes. At condonabis quædam Amico, & Vati quoque, ad amicum suum scribenti.

Læ-

Lacior illi sanè materia, quam mihi nuper oblata: multum quippe interest Triumphos inter & luctum. Et discrimen etiam in ipso carmine apparet, mihi satis est doluisse mihi, at aliis, at Barcellino, in eo non displicuisse, id supra vota, id beneficii, id præmii loco æstimandum computandumque. Cur me igitur ad majora viribus vocas, qui vix minimis, & ne vix quidem sufficio? Maximum illum Virum, ac humanum pœnè fastigium supergressum, laudent illi, qui & ipsi laudari velint, quodque multò rarius, etiam laudari mereant. Vale. Florentiæ. x. Kal. Dec. 1707.

JUSTO FONTANINO.

XXXV.

Literæ quas iij. Non. Decembris Romæ dadas, adeo multa nocte viij. Id. in manus venerunt, ut non priùs potuerim, aut grati, aut læti animi testimonium proferre. Et pridem cognovi ex communibus Amicis, Magliabechio, & Barcellino, quam benè de me, & antea etiam, senserit, Romæ suæ, ac eloquentiæ decus, Fontaninus: id verò gaudium nunc, & meis quoque ocu-

oculis usurpo, & Doctis adeo notam, lego re-
 goque manum. Mihi tanè dolet, parvum, si ex
 mole tantùm spectetur æstimeturque munus, Præ-
 lectiones Averanianas, nondum Romæ advectas,
 aut uon saltem partem adhuc Bibliothecæ Fonta-
 ninianæ fieri; quibus, ab incomparabili Viro, ne-
 que iudicio minùs quam ingenio præstanti, vete-
 ris quafi ævi inter Lynceos Italos Principi Petrar-
 chæ, novum additur decus, & lumen; qui ta-
 men, Romano sermone, sibi sæpiùs impar vide-
 tur, quum nos certè nuper Florentiæ amiserimus,
 & sui sæculi ornamentum, & sæculorum etiam
 memoria dignissimum, *Senatorem atque vatem*,
 Vincentium de Filicaia, Etruscæ simul, & Latinæ
 Principem Lyre; quique non tantùm Carminis
 dulcedine, sed & magnificentia spiritus excellens,
 ac uti alter ille Pindarus, verbis ac figuris felicis-
 simè audax, (neque Buchananos, aut Casimiros
 exceperis) omnes ferè post se reliquerit. Nam &
 non rarò assurgit, & materiem ac argumentum
 semper implet. Oh parce cultori tuo, qui per
 Te vivit, atque sui superstes erit, Divine Filicaia;
 nondum ad laudes tuas assurgenti, nondum lu-
 ctui suo, nedum publico satisfaciendi! & iusta
 quidem nuper eidem fecit Averanius ille noster,
 neque hic pro more mentitur sepulchrum. Tu-
 que, Vir Optime, in tuis etiam monstrasti,

N

quan-

quantum & ipse Illi; quantum & Vobis omnibus debeam, atque futuri quoque temporis debitor sim futurus; idque rectè nondum edito opere, non pessimus quidem ea in parte Vates, apud Ipsum, ut videbis, auguratus fueram. Et si à laudato Viro laudari non minima æstimetur felicitas, quanto certè majus, a laudata Gente, non penitus laude indignum censerì? Non equidem cum Imperio Italia excessit Doctrina; non quod longè Doctrinæ prævalet Ingenium; non quod omnium quoque maximum, Judicium. Hæ prius Romanorum Artes, hæ Italogum adhuc; non unquam Gothicæ, non Vandalicæ Virtutes. Sed absit ut credam, hæc mihi uni dicta, de me scripta fuisse, ab Auctore magno: ab eo etenim ita tantummodò formantur Legati, quales esse voluit, quales esse debent, descripsit ille solùm, ac mente præcepit: Xenophontis sanè Exemplo; cujus in Cyro legimus, non tam illum Asiæ Domitorem, quam numeris omnibus absolutum, ac perfectum planè Principem. Utcunque verò res ceciderit, hac demum mercede placet, hyberno tempore, & flagrante bello, maris hostiumque tentasse pericula, Germaniæ frigora, ac Hesperia solis pertulisse: Ac si bonorum, & Fontanini, sui que similitum, benevolentiam ad ultimum servare possim, id in Patriam aliquando, bono cum Deo, reditu-

99

turo, & summo Ornamento, & declivioris dein
ætatis, non minori solatio erit. Vale. Florentiæ.
Idibus Dec. 1707.

PETRO HIERONYMO

B A R C E L L I N I.

XXXVI.

IN Vita certè communi, Mi Barcelline, ple-
rumque Ufu venit, ut benè Negotiis tempe-
retur Otium, & Otio distinguantur Negotia; ne
& illud alitèr ignavum atque inutile, nobis ac
publicæ rei cedat; atque hæc non intermissa,
mentem atque unà Corpus nimium prægravent.
Non pessimè ergò faciunt, qui ad studia nonnun-
quam, pro levamento laborum recurrunt; quæ
non tantum publicas non impédiant curas, quin
easdem quoque multò suaviores; nosque ipsos
etiam ad illas ferendas, fortiores alacrioresque red-
dant. Idque non illibenter sæpius experior, nam
& negotiis frequenter admodum, uti scis ipse,
pro munere hic distringor; & multo quoque ab-
hinc tempore, quasi Uni, parùm sufficeret Flo-
rentia, in partem curarum Genua etiam accessit:

N 2

adeo-

adeoque illa non rarò, ac per intervalla tantùm, sed ferè continuò, occupant distrahuntque animum, qui tamen, aliquando, ut vides, contrà nititur, ac parumper, quasi in se redit; eoque brevi, ut per ætatem, secessu, lætatur reficiturque; novasque quodammodò vires acquirit. Cur non igitur nobis, si tu quoque idem senseris, cum Catullo vestro demum exclamare liceat libeatque,

Rumoresque senum Severiorum,

Omnes unius æstimemus assis.

Quod verò Tibi, ac eruditissimis Romæ Viris, tantùm placuerit, civis mei ac amici Carmen, id sanè mihi gratissimum, tum Argumenti, tum auctoris causa, qui & ipse quoque inter exempla erit, quam parùm amœniora studia gravioribus detrahant. Quæ tamen, amor tuus, cui nonnunquam & optima cedunt judicia, erga me expresserit, id gratiæ solummodò adscripserim, quæ Amici fortè, non Historici virtus est. Id Cicerò quidem à Luceio petivit, atque suo demum in Crasso, non sibi quoque alienum esse duxit, sub alterius persona, summi Oratoris, suamque describere eloquentiam: mihi verò meliùs convenit, Martialis illud,

Pauper videri Cinna vult, & est pauper.

Bona igitur fide, ipse egi, quum & Poetam laudaverim simul, & excusaverim. Tentavi denuò
ad

ad conciliandum Galliano tuo , prout ex literis constabit , animum Proregis ; acceptis interim ex Neapoli plenis in me benevolentiae alteris , ab eodem . Neque , ut ille olim dixit , *erubescit* epistola ; aut ipse equidem vereor , ne obsequium in te meum , mihi vitio in posterum vertatur . Sit felix ille tuus , non moror importunum , non ineptum censerī : Fides aut minuet , aut penitus opprobrium levabit , si non & solatio quoque , atque etiam non minimo Decori fuerit . Jam credo acceperis legerisque cum summa voluptate eruditum facundumque admodum Petrarchae Interpretem , Benedictum Averanium ; & cum venia quoque Dedicationem , quae omisso nomine , cui-libet , & ipsi etiam placuisset censori . Brevis incipiet Annus , quem Tibi , literis , Rei Christianae felicem precor . Vale . Florentiae . xiiij. Kal. Jan. 1707 .

B E N E D I C T O

A V E R A N I O.

XXXVII.

Feriarum tempus , non me adeo immemorem
 esse finit officii mei optimum erga Avera-
 nium , quominus ipsi non pro more tantum,
 plurimam adprecer salutem; neque mei minus,
 quam Reipublicæ etiam literariæ causa , cui ille,
 toto vitæ suæ cursu, inoffenso equidem, utili,
 laudatoque, tot ac tanta bona contulerit, atque
 mihi insuper, in operibus suis, famam quoque,
 quæ quasi vita erit altera, neque casibus obnoxia.
 Plurimos ergo ipsi annos optans, & simul morbis,
 ac periculo immunes vacuosque, (quò me &
 privata officia, & publica ducunt commoda)
 commune cunctis, neque soli Scholæ Pisanae,
 profuturum peto Beneficium. In ævi igitur Usus,
 & in longum superfit ille, qui bella tandem in
 otio describat, eodem spiritu, quo prius gesta
 fuerant, eademque sermonis puritate ac elegantia,
 qua res memoria dignissimæ, ritè ad posteros
 transmittantur, quæ sanè maximorum Scripto-
 rum, neque laudes adeo frequentes: aut quod
 cer-

certè multò humano Generi melius futurum sit
 feliciusque, atque longè magis cum moribus ge-
 nioque Scriptoris conveniet, ita patriam quietem,
 ita pacis bona, ore calamoque facundo ostendat,
 concilietque cunctis, (id verum, id optimum
 eloquentiæ ac Oratorum munus) ut in posterum
 melius edocti, vix reperiantur, qui sponte in bel-
 la ruant, quæque semper bella sequuntur, mala
 atque icelera. Sicque post graves adeo, quibus
 nostra tamdiu concussa est Europa, tumultus, de-
 posito cum Armis bellandi studio, paulatim man-
 fuescant mores, & in quantum fieri possit, denuò
 aureum recurrat Sæculum, inque sua ita Princi-
 pia tandem aliquando Orbis redeat. Fuerint hæc
 demum somniantis vota, atque successu caritura,
 sanè non multùm abhorrent, ab hoc tempore
 læto, festo, pioque, non à votis quoque, non ab
 ingenio certè optimi Averanii. Vale. Florentiæ.
 pr. æræ chrif. 1707.

PETRO HIERONYMO

BARCELLINI.

XXXVIII.

Verum est, Optime Barcelline, non ampliùs inter Vivos conspici Averanium, solùmque in scriptis vivere, atque fama nunquam intermoritura superstitem. Deslevimus paulò ante, in Senatore Vatem, & quasi hoc parùm fuisset, geminatis cladibus, totaque suada quasi simul ablata, impræsentiarum in Professore Oratorem quoque amissum deflemus: adeoque amicæ nunc Civitates, imperioque unà ac dolore conjunctæ Florentia, Filicaiam, Averanium, Pisæ lugent, Academia, & ipsæ literæ, utrumque. Et ad hæc domestica fermè vulnera, novum tuumque, minimèque igitur mihi alienum, jam quoque in cumulum accessit, ex abrepto fratre, ac tali fratre, tibi, sanguine, communibus studiis, ac eadem religione, conjunctissimo; quemque ipse priùs ingenio, ac eruditione præstantem, ex Dantis nostratis, (civis penè Florentinus scribe) Poetæ vindiciis, tuo olim munere, cognoveram colueramque. In luctus certè, ac funera nati sumus, venietque
tem-

tempus, neque hac mundi ætate, proque variis rerum vicibus, ac calamitatibus, quibus & universi, & singuli semper sumus obnoxii, longinquum adeo, cum & nobis ad plures abeundum erit, & vita functos eadem pietate sui prosequuntur. At spero, non morte quasi aliena, & improvisa, qua huc Roma perlatum est, ex fama recenti, & oh utinam falsa! cives meos & amicos, florentibus quoque annis, & tibi etiam non visu tantum, sed & consuetudine cognitos, exteris in terris, patriaque procul, ereptos, atque in trajiciendo Lirci Flumine, à Neapoli ad vos redeuntes, aquis abreptos absorptosque, periisse: Sed tamen tuus ille Innocentius, ac illustre meorum par Amicorum, non violenta, non subita, sua saltem morte defungebantur: exhibant de vita; non rapiebantur; solo in Patrio, domi atque suis in penatibus, inter propinquorum amicorumque amplexus, pia inter desideria, ac pietatis officia, reddebant animas, volentes scientesque, & inter vota precesque, summo Rectori, ac bonorum remuneratori, sistebantur. Parati itineri, viam ingrediebantur, qua solummodò ad Cœlos iturus, quæque magna hinc Discessuris felicitas, nihil defuit, quod exiturum volebant. Sinu quoque suo, condit corpora, parens communis, ex terra producta: neque invidi amplius, laudes alienas meri-

ritasque legunt superstites, quas sepulchris, suorum pietas inscripserit; atque ita ad pares etiam capeffendas virtutes, sub illustri exemplo, incitantur formanturque Posterì. Vale. Florentiæ. xii. Kal. Feb. 1708.

N. N. S.

XXXIX.

QUam rectè, Vir Reverende, de Virgilii Polione senseris, quam benè quoque ac magnificè expresseris, quæ sentis, aliorum esto iudicium, eruditione atque pietate præstantium. Neque Veteres semper equidem errasse circa Sybillas, aut falsos fuisse Patres, vel solæ tuæ Sicelides Musæ, argumento esse possunt. Et Virgilio debemus, & maiestati carminis, nemini prorsus imitabilis, ipsas aliquando vixisse Sybillas, atque etiam inter Vates recensendas fore: Vaticinia quoque earundem, uti vides, neque ea, aut obscura, aut ambigua, sed clara, & illustria, ad suam ille refert ætatem, & Augusti Principis tempora; quibus certè, & ipsi benè novimus, *Magnum Jovis Incrementum*, novam veramque de Cælo progeniem,
in

in terras demissam, ad pacandum regendumque Orbem patriis virtutibus, novosque etiam ad mores, sed reverà antiquos, atque primi aureique sæculi, inter mortales introducendum restitutumque, & ad Leones, ut Virgilianos sensus unà hic cum Verbis conferre liceat, cum Armentis, idest, homines cum hominibus, conciliandos. Ita de Humani Generis statore, hoc est Messiae Regno, Prophetæ quoque loquuntur, & Isaiam, & Cumæam Virginem, pari fortè modo, ritè explicaveris. Sanè certum est, Sybillas apud Gentes, eodem quasi ævo, quo apud Hebræos, Prophetas, extitisse; & longè siquidem antea, eodem tempore, atque eisdem in regionibus, Moysen, ac Balaamum simul vixisse, & paria quidem in hac ipsa materie, prædixisse; si non & clariora, posteriores. At quidem, ut ad Isaiam, sublimioris Regiique planè spiritus Vatem redeam, propius sanè in suis, ad ipsius effata, Musa Maronis accedit, (quod miror adhuc adeo cunctos fugisse Interpretes Vaticinium hoc præsertim ad Christum trahentes) quum dicit, hunc suum Heroem, perfectorem Naturæ, Mundi Melioris Restitutorem Dominumque, infelicem demùm futurum, atque miserum; spretum denique undequaque, ac à Deo quasi derelictum, sorteque equidem tristi, ac lugenda maximè conspicuum,

Incipe parve Puer, cui non rifere Parentes.

Nec Deus hunc mensa, Dea nec dignata cubili est.

Cui quæso hæc conveniunt; non sanè Pollioni, non Pollionis filio, nec ipsi quidem Augusto; neque alii alteri, quam Illi solùm, qui cum Vate sacro, & unà, *Princeps Pacis, & Vir Dolorum* futurus erat? At me contineo, cùm non adeo multis hæc nostra forsitan sint placitura, sed neque turbæ scribo, contentus certè paucis Lectoribus, imò uno solo; cui imputandum, si quid ipse auctoritati ejus obsequutus, seu me malè ad Exemplar conformans, seu non passibus æquis ducem sequens, in hac parte deliquerim, aut via aliquanto deflexerim, atque aberraverim. Vale. Florentiæ. xii. Kal. Feb. 1708.

JOSEPHO AVERANIO.

XL.

Pietas mea erga optimum Benedictum tuum, optime quoque Josephæ, illum tibi studio- rum olim, ac individuum vitæ socium, & mihi quidem Hospiti vestro exteroque, multis officiis priùs, sed maximè postremo, (ex quo mihi nunc
non

non penitus petire licet;) cognitum, atque semper colendum, hoc qualequale Epigramma expressit. Felix sanè, si brevi adeo tabella, summas ejus virtutes, animumque tam laudis capacem, quam minimè avidum, imò contemptorem planè, aliqua saltem ex parte, assequutus fuerim; atque parvo, quo potui, carmine, quod Fratrum Averaniorum nomen solùm verè præstare poterit, Posteris commendare voluerim. Vale. Florentiæ vii. Id. Feb. 1708.

PETRO HIERONYMO

B A R C E L L I N I.

XLI.

G Ratulor Romæ, atque Tibi simul, Optime Barcelline, quod se quoque hodiè æmuletur Illa, neque in nova, veterem ampliùs desiderari permittat; quin etiam, & Philosophorum quoque disputationibus ferveat, quæ vix quidem Antiquæ, aut saltem rariùs, laus fuerit. Tum sanè recitabantur, admissis amicis, & nonnunquam Populo, Orationes, & Carmina, in eum ferè solummodò finem, ut vel adstantium plausus

fus ex conquisitis undique auditoribus emendica-
 rentur; vel ut illa saltem emendatiora, (quod &
 ipsum quoque non improbandum) ad Posteror
 venirent. Altum interim de eis silentium, quæ ad
 veram sapientiam, atque scientiarum Augmenta
 pertinebant. Nunc verò denuo, ac postliminio,
 ad Urbem quasi accedit Tusculum, & in Sancti
 Eusebii, non uno nomine Tui Doctorumque ho-
 minum, Conventu Concessuque, novi demum
 Cicerones, Varronesque, de summis rebus, lite-
 risque reconditis, disputantes introducuntur. Læti
 undequaque accurrunt Cives, eruditi quidem illi,
 ac sapientes, quales eo loco spectari debent, qui
 pro Sacrorum Sede æstimari velit, quales deni-
 que, qui Principe Leone, Civitate Longolium
 donarunt, atque in Capitolio perorantem, uti al-
 terum Ciceronem, frequentes admirantesque cir-
 cumstiterunt. Et ego quidem paucis abhinc die-
 bus, Apathistarum hic Academix, per horas ali-
 quot, non invitatus interfui, ubi cum soluta Ora-
 tione, numeris quoque astricta, & utroque ser-
 mone, adhibetur, gratisque vicibus miscetur :
 seria joci temperantur, ac quodammodò exhila-
 rantur : sui que sæpius, per omnes sapientiæ, ac
 eloquentiæ gradus, experimentum non sine laude
 faciunt Ingenia Florentina. Et tunc quasi in sce-
 nam prodierunt, magna nomina, Salvinus, &
 Cor-

Corfinianus, extemporali facundia, ac differendi
 subtilitate clari, atque Sybillæ ibi pro more, ne-
 que aliter, quam anus illæ fatidicæ, satis etiam
 obscuræ, interpretes, unde tamen materies, eru-
 ditis facetiis, multò sale, multo & candore tinctis
 imbutisque, multaque insuper rerum notitia, at-
 que exquisitis admodum Literis, ferè conditis,
 uberrima certè suppeditatur: adeo ut ad aurium
 voluptatem, studiorum quoque fructus accesserit:
 At quantum, & ipse quoque Apathistis debeo,
 quem, doctissimum jucundissimumque Audito-
 rium, ingredientem, Carmine exceperint, ac sa-
 lutaverint: Liceat sanè Poetis, supra verum qui-
 dem efferri, hanc licentiam, velimus nolimus,
 usurpabunt illi; ideoque semper cum venia au-
 diendi legendique. Elati quippe ipsi ac sublimes,
 mediocria fermè spernunt, ac ad summa quæque
 nituntur: quamobrem opera sua, sui que juris,
 esse omnia credunt, non nisi perfectæ, atque ab-
 soluta cerni volunt. Ac prout his, alteris quasi
 Diis placet, fingimur formamurque cuncti. In-
 terim sub Vatibus, tanquam inferior, subsidet;
 neque eorum magnitudinem capit, aut ad can-
 dem assurgere valet, ipsa natura humana. In
 Pallade, Venerem quoque effingunt, tantùm sol-
 liciti, ne quid simulachro desit. At de illis lo-
 quens, non & ipse tibi abripi, ac longiùs efferri

videor? Quum tamen minimè de via decedo; hoc modo etenim inter Academicos, atque Apothistas adhuc versor, quorum æternitati nuper nobilissima Oda, ac prout ipsius quamplurimæ, divina, quantum contulit, quondam sui Corporis Decorisque magna pars, summus ille Vatum Filicaia, qua eorundem Dotes, justas & inde spes hominum, in sublime extulerat, ac famæ commendaverat? En tibi in fidem, ac veritatis testimonium, ipsum jam quoque canentem, sibi que superstitem sisto! Cujus quidem nunc tandem cunctorum manibus teruntur, ac voce cantantur carmina, quibus semper Etruria nostra meritò superbiat, seu puritatem sermonis, seu suavitatem cum spiritu, cumque ingenio summo, par etiam judicium conjuncta mireris, invidiam inde aliis gentibus motura; cùmque sua prodierint quoque Latina, non vanus augur erit, quisquis dixerit, illa oblivionem ferè cæteris inductura, si non & ipsis quoque veterum reliquiis. Hinc igitur sine veritatis dispendio legas, quæ de Filicaia, ac Averanio nuper nostro, studiis etiam, sed itinere diverso, facundia quippe, ac dicendi persuadendique artibus, eandem quasi laudem assecuto, longe majora de me certè meritis, nocte, & inter somni moras, mihi modò exciderant Epigrammata. Neque interim moror, an si ita fortè aliquibus

bus ineptior videar, an etiam & omnibus, ingenio cedere; quum officium, ac grati animi testimonium, solummodò præ oculis versata fuerint, ac penitus unicèque mentem occupaverint. Sint minùs frequentia precor, hujusmodi doloris, ac pietatis nostræ argumenta; neque ipse, Vir optime, ampliùs in hac parte, amicorum officiis, opus habeas: melius certè erit, non indigere solatiis; multùmque placet, quod nuper in mortibus Populàrium meorum falsus, atque gratissimo demùm errore deceptus, fuerim.

Editionem Florentinam Operum ingeniosissimi viri J: Case, emendent si velint Neapolitani, & additis optimis Quadrimani præsertim, Severini, ac Callopresis suorum commentariis, locupletiolem in publicum emittant; neque equidem displicent bella, modò non convitiis more mulierum agantur, quibus imperium Literarium augebitur.

Me suo nomine Barcellinum salutare noster Magliabechius velit, Te meo quoque idem præstare erga Illustrissimum Fontaninum ipse peto: illi quidem interim, renovatam salutem, huic continuam, optimam utrique, & Amicitix, & studiorum ergò exoptans.

Hæc verò scribenti, intervenit Dalmata, Ditionis Cæsareæ, Juvenis, & Franciscani Ordinis

Presbyter, at quid ipse velit ex adjuncto libello melius constabit : ceterum non indignus videtur auxilio tuo, & patrocinio, atque ita longiore in Italia mora, ne diceſſu tam feſtinato, ſtudia interrumpantur, & concidant, præſertim cum perficiendis, uti omnes norunt, nullus in Patria locus inveniatur. Vale. Florentiæ. viij. Kal. Mar. 1708.

PETRO HIERONYMO BARCELLINI.

XLII.

Quod te potiſſimùm annitente, optime Barcelline, ſemper adeo facili, ac propenſo admodùm ad benefaciendum ſubveniendumque aliis animo, ſupplici iſti Dalmatæ, ſui tandem Romæ, gratiam in Italia ulterioris moræ fecerint, neque ſpem omnem erranti Juveni, (ſi de eo vera omnia narrantur) penitèſ abſciderint & in meliùs quoque, ſi velit, ex Literis proficere; cui fanè multum conducet, Philoſophiæ, hoc temporis intervallo, uti olim de ſe prodidit Socrates; ac certè multò plus, ſacris operam dare, quod
in-

innumeris ferè omni ævo exemplis constitit ; neque ferè aliter fieri potest , si in Mores plerumque , studia transeant ; id mihi quidem gratum , illi utile , neque tibi opprobrio futurum spero : Nec hìc sanè meis partibus defui , si sint ullæ meæ in hoc negotio partes . Quid demum præstiterim denique , tibi obsequens , aut quid sanè præstare debuerim , hæc ad ipsum adhortatio docebit ; brevis quidem , & si Londini fuisset , atque Anglus alter esset , monitori in ea , ac Judici propior .

Interim quod benè cedat studiis , & Literis quantum in me est , promovendis , quibus animum tantùm , non vires conféro , munusculum mitto , si ita tibi tuoque Zacagnio placuerit , Vaticanas quoque auctarum opes ; cum & locum eidem priùs etiam inter Mediceas dederit , Summi Principis benignitate , Magliabechius noster . Hospitem verò , vos versus iter facientem , carminis quoque commeatu instruxi ; utque similis conditionis comes non deesset , majoris cultus causa , Inscriptionem etiam ad Magnum Etruriæ Ducem adjeci . Ex eis autem facìle constabit , quid ipse de vero Auctore , nam antea sub ficto pioque nomine latuit ; deque ipso Opere sentiam ; docto sanè , si quod aliud , ac laborioso , atque ingenii , imò sublimioris : in quo multa cernas , quæ su-

pra Vulgi longè captum, doctissimos quoque adhuc viros tantum non effugerint. Sed inter alia, Aphorismi de Morbis Epidemicis, & Peste, principia sua, quibus totum fermè innititur, clariùs exhibebunt: neque tamen illud primo fortè aspectu, aut placebit, aut fidem etiam apud Lectores, præsertim malevolos, aut otiosos, inveniet. Quem verò fugit, quam præterito nostroque Sæculo, nova quædam Naturæ facies, Vitrorum ope cunctis apparuerit; minima in justam magnitudinem excreverint, & quæ maxima reverà fuerint, non nunc ut minima cernuntur? Hinc fermè nulla in Orbe res tam exigua, quæ Hovkii Nostratis, non dico menti, sed ne aspectui quoque, se subtrahere potuerit: Hinc Batavo Leuinhokio præeunte, omnis Natura, quasi semel simulque fuerit formata, in semine conspicitur, Mundusque in qualibet sui parte, vita ac spiritu indutus agnoscitur: Inde etiam Florentiæ, Seni Galilæo primùm, stellæ fulserunt Mediceæ, futuris fortè Sæculis in Oceano navigantibus itinera non minus certa descripturæ, quam hodie in Terra ex chartis fiunt: Oculis nunc tandem creditur, neque tam rationibus, ac argumentis, quam sensibus ipsis, ac experimentis manu factis ducti, tanti Philosophi, nostra ætate, ac verè sapientes extirere. Si quis igitur Cœlestium motus,

in-

interque se situm ritè observans, cum eis quæ hìc in terris accidunt, sedulò ipse contulerit, forsitan Astrologus quoque brevi deveniet, sed sanus, neque sibi aliisve planè inutilis, noxiusve. Aeris quippe Tellurisque hìc magis, quam Hominum fortuna versatur; ex quo tamen, plurima mala, aut bona, ad ipsos redundabunt. Vide quæso, quæ Auctor ipse de maris fluminumque motibus scribens, de inundationibus Tiberis ad Romam, & Oceani in Batavia, ex Historiis desumpta, convenientia omnimodò cum hac sua cœlesti doctrina, & philosophia, in publicos usus produxerit. Liceatque nobis ex præterito iudicium etiam de futuris capere; at utinam quidem fides, ea in parte Operis, ipsi olim penitus defuerit! Sed nemo viam sibi monstrantem dedignatur, nemo sanus illi ea ratione meritò irascitur, quamvis aspera sit ista, & prærupta, aut cœno vel aquis obducta, ac profundior: Ex præparatò meliùs certè iter ingrediatur, quæque ad illud conficiendum tutiùs, atque minori incommodo conducant, si sapiat, monitus comparabit. Sed nolo diutiùs hoc Argumentum prosequi, cùm præ manibus liber erit, cujus denique ex præfatione, totius præiudicium capias; qua perlecta, ab reliquo Opere, si possis, abstineas. Vale. Pis. vii. Id. Mar. 1708.

C A L I S T O

TRAGURIENSI. S.

XLIII.

I Ndulfere precibus tua nuper ex parte oblatis, qui illi negotio Romæ præficiuntur, uti demum studiis adhuc in Italia, sed tamen alibi quam Liburni, cum id ipsis minimè placeat, vacare possis; quod ut & tibi, ac Publicæ rei olim benè vertat, ex animo precor: At sanè tua plurimum interest, ut vita interim probè, ac in futurum cum laude quoque, hisce in Regionibus, transacta, in patriam tandem revertaris, non minùs moribus probandus, quam doctrina auctior. Vale. Pis. vii. Id. Mar. 1708.

PETRO HIERONYMO

BARCELLINI.

XLIV.

TUA adeo mentem occupat Roma, ut penè nunc quoque apud vos intersem, neque adhuc à Barcellini mei Latere divulsus; cum non aliud

aliud ferè animo obversetur, quam in Reliquiis
 suis, Veteris majestas Imperii, inque sacris ædibus
 procerumque, nostrorum quoque temporum cul-
 tus nitorque : Cunctaque etiam denuò renovata,
 & tanquam de novo repræsentata tuis in Literis,
 amplis sanè ac facundis, nimisq; solummodò,
 quando de me loquuntur : In quibus autem non
 tantùm Barcellinum pro more familiaritèr doctè-
 que differentem cerno atque agnosco; sed & vi-
 deor etiam ipse, quod præsentì negatum, seu po-
 tiùs præreptum, qua occasione sciunt omnes, be-
 neficium, summi quoque Clementis aspectui ser-
 monibusque demum admoveri. Si vero carmina
 non penitùs displicuerint, haud id verbis, sed
 materiæ, seu veriùs Principis indulgentiæ tribuen-
 dum, quorum equidem summa, si non & unica
 laus fuerit, Pontificem aliquando, talemque præ-
 cipuè Pontificem, habuisse Lectorem. Et sanè
 benè ac sapientèr fecisti, quod etiam Isaaci Nerv-
 toni Equitis, Mathematicorum fortè omni Sæculo
 Principis, Opticam addideris, non tam quòd ejus-
 dem gentis, ac nominis fuerit, quæ sanè parùm
 referunt; sed quod optimo rerum judici, non
 possit non Summopere Auctor placere, adeoque
 publico magis prodesse, qui si quis alius inter re-
 centes, æternitati scribit. Interim inter alia pluri-
 ma, unum mihi præsertim valdè dolet ex discessu,

nimiùm profectò pro votis , negotiis aliò avocantibus , festinato ; (at quis unquam libens Roma discedit ?) Me multò minùs ea ratione , quam volebam , quam sperabam etiam , insignium eruditione moribusque Virorum , (qui vera ac vivèntia Urbis Orbisque Decora) interfuisse Colloquiis , ac Disputationibus , quæ fermè quotidie ibidem , magno suorum exterorumque commodo , ac communium Literarum , celebrantur ; nedum eorundem familiares , ac interiores excepisse sermones , quos noscere , noscique invicem ipsis , neque solummodò , ut Scientiarum Artiumque Præsides , & Exempla , sed ut amicos invisere , ac colere , maximè cupiebam . Quantum igitur credas , voluptatis perdiderim , quod non Conviva fuerim , uti scribis , vel ipse inter Convivas habuerim , Blanchinium , Santinum , Illustrissimos Abbates , Fontaninum , Bencinum , Vignolium , Cargofilum , Comitem Paci , Summam , ut rectè dicis , eruditionis , (& qualis quantaque illa) Romanæ , & ultimo loco inter Literarum proceres positum , pro comitate sua , ac modestia , sed non inter postremos , optimum Barcellinum : Oh quam victura in omne ævum nomina ! omnes verè Cives Romanos , veterumque illorum Majorumque suorum Studiis , æmulos paresque ! oh diem lætum ac beatum ! Symposiumque quale olim sapien-

piantium inter Græcos illos antiquos, cùm nondum
servierint ingenia quoque, sed liberi, liberè philo-
sophabantur: oh tempora, oh mores, jucundum
simulque doctum! at heu nunc amissum, priùs
quam cognitum! Interim Cunctos meo precor
nomine salutes, aliosque ejusdem notæ, si qui
fuerint adhuc, mei, Romæ memores; sciantque
si mihi revisendæ Urbis, quæ vel,

.... *Decies repetita placebit,*

copia unquam contigerit, id non tam Romæ,
quam illis, ideoque mihimetipsi dandum: atque
utinam inde iterum, unà vobiscum liceat, Vatis
vestri Severi Carmen repetere,

Hic meus est, dixere, dies!

Vale. Florentiæ 1708.

NOBILISSIMO VIRO

JOHANNI JOSEPHO

MARCHIONI ORSI.

BONONIAM.

XLV.

NON tantùm cum suprema mentis lætitia,
sed & quadam etiam, ut ita dicam, su-
perbia atque elatione, accepi evolviq; libros,
mandato tuo, Illustrissime Urse, mihi hîc nuper

Q

à do-

à doctissimo humanissimoque Gornia Medico red-
ditos, gentis Italæ, ac omnimodæ vestræ eloquen-
tiæ, vindices; neque certè minùs ejusmodi simul
eruditionis, quæ nobili summæque conditionis
viro convenit; quam & in me quoque optimæ
voluntatis, testimonium planè indicesque. At
ipse olim domi ab ineunte ætate veterum semper
Scriptorum admirator, recentiumque in hac quasi
magnorum ingeniorum patria cultor, nunc verò
Etruriæ, quæ posteriori ævo tantùm non linguæ
ingeniique unà domicilium, hospes jam supra-
triennium, atque ita pænè consuetudine domestica
vester, non potui quin multùm indignari Aliis,
sic in omni parte, seu sermo ipse, seu dicendi
lepòres, seu sententiæ, sive acutæ, sive sublimes,
spectentur, adeo vobis, minoribus, qui tamen
hærentem Capiti vestro pro meritis coronam de-
trahere velint, seque vobis, rebus ipsis ac recla-
mante Orbe, præferre nitantur. Quam verò ini-
què ac frustra, tuis modò ex Operibus, Dialo-
gisque priorum optimorumque, & facundia judi-
cioque æmulis, præsens ætas agnoscit, discentque
Posterì. Quin interim illi judicent de suis solum-
modò Auctõribus, atque invicem inter ipsos otiosi
committant: hac se tutò in palæstra exerceant,
neutiquam hìc quidem cæteris injuriam facient,
neque tam facilis in errores lapsus: & si aliquando
pec-

peccaverint ex malitia, ut Critici ferè ubique sunt Genus Hominum malignum; ab ignorantia saltem securi erunt. Sed in posterum desistant à iudicio in eos proferendo, in quos nullam habent potestatem, quorumque etiam instituta, aut non fortè semper optimè norunt, aut non satis feliciter ubique assequuntur. Importunus procul dubio fuerit, quisquis aut Cicerones expectet, & Virgilios, aut Petrarchas, & Filicaias; qui vel longam ætatem tulerunt, vel etiam ad posterorum iudicium provocare gaudeant. Non iidem gentibus mores, à quibus tamen multum dependet Scriptorum æternitas. Sunt sanè quædam ingenia, quæ suo sæculo placent; sed gratia eorundem brevi perit, neque postea faciliè in ipsis bibliothecis reperiatur. Novi magna nomina, quibus recitandis, ne aut malignus, aut ambitiosus esse videar, supersedeo equidem, quæque multò antea in ipsa Academia, & apud Populum inclaruerunt, quorum Opuscula, quæ deinceps excreverunt, blandientibus primò Amicis, mox ipsis sibi, in plurium Voluminum molem, vix sunt qui nunc quidem legant, atque nemo paucos forsitan intra annos lecturus sit. Et tamen inter illos erat, cui Tullius Pliniusque sordebant. Norunt verò Cives tui, exterique novimus; quæ nuper ipse in tuis omnibus præstiteris, quibus & unà suam An-

tiquitati pristinam gloriam, ac præsentem dignitatem servaveris Patriæ; cui ultrò plaudunt faventque æqui omnes, utpote in qua ipsæ litteræ, nec exiguo intervallo, veteris Reipublicæ, ac primis Imperii temporibus maximè floruerunt, ac deinceps post depulsam barbariem renascebantur, ac reflorescebant iterum; unde quoque Transalpinæ Gentes, cunctas artes, atque nostra lumina debemus. Hoc iusti gratique testamur Angli, neque alteris illis, vobis etiam iudicibus, qui plurimum ea dote, publico consensu præstatis, aut disciplinis, aut ingenio, aut Armis denique, belloque inferiores.

Si quid verò posthac ex meis adjunxero, id tibi, vir præstantissime, imputaveris, cujus in me beneficia non permisere, aut mihi ampliùs filere, aut in alio genere, licet longè imparem, penitùs ingratum aut inmemorem fore; nisi etiam & venia aliquatenùs detur, Utriusque Patriæ, tum Italiæ, tum Britannię, & vetera, & recentia sua Decora celebranti. Vale. Florentiæ. xi. Kal. Aug. 1708.

PETRO HIERONYMO

BARCELLINI.

XLVI.

UTinam ipse, jucundissime Barcelline, tam læto sermone uti possim, tibi gratulando restitutam salutem, quam tu in describendis doloribus usus fueris. sed me etiamnum metus ac quidam horror circumstant; & videor amico, & periclitanti quasi adhuc, assistere, & unà suis molestiis affici, suis angoribus laborare. Nondum enim ad priorem statum revocata mens, vires recolligit pristinas, atque in numeros audet prorumpere. Non illis locus inter voces, & fidiculas medicorum, quæ tamen scientiam ac remedia, proh Deum Hominumque fidem! vocant isti; mihi-que salus quasi continua, non alio magis placet nomine, quam quòd liber penè fuerim ab his eruditis periculosisque ineptiis, ac eorundem Doctrina, multo sanè labore, neque minùs multorum mortibus; quæ Experientia indigitatur, comparata: Hi quoque Heroes, hominum strage prius inclarescunt, magnique fiunt, deinde salutis arbitri, vitæ necisque potestatem in libera civitate ob-

obtinēt : at si quis tandem manibus eorum elapsus, morbum effugerit, seu natura ad ultimum, seu longa die, luem expellente, opibus mulctatus, pro majori saltem parte, alio dein remedio, contra eorum remedia, opus habet, & ipsa postea medicina, quasi novo morbo, difficilique admodum laborat; atque ad vires corporis, animique robur reficiendum, & aerem salubrem, multumque temporis, curis medicisque vacuum, requirit. At spero quod peccavit Julius, si quid demum restet infirmitatis, mitiores emendabunt feriæ Septembres; atque ad sanitatem certè multo plus conferet Montis Portii Castrum, rusque inter Colles suburbanum, quam tota Galeni Secta Scholæque. Multos interim tibi precor annos, sed non hoc calculo distinguendos. Vale. Florentiæ. Pri. Kal. Aug. 1708.

127

COLUMBINO BASSI

VALLIS UMBROSÆ ABBATI.

XLVII.

Mihi admodum dolet, Reverende Pater, te heri Florentiam, non etiam & me unà, hospitem nuper vestrum, vestrique semper cultorem futurum, invisisse; qui sanè gratus recorder amœnissimi secessus, ac secreti vestri Vallumbrosani; & tecum simul consuetudinis, cumque sanctis ibidem moribus viris, summa non modò cum oculorum voluptate, sed & animi etiam cum fructu habitæ. Erupit ergo, tardiùs licet aliquantò, in numeros, mentis affectus. Vobis interim mihi in excusationem, atque in exemplum præcuntibus; unde etiam & illos, uti æquum erat, & officii mei, meæque in vos perpetuæ, si ita fieri possit, vestramque domum gratitudinis testes, nunc demum, statimque ut exciderant, miserim: & oh utinam, ut certè cunctis, visa, Vallis Umbrosa, ita & descripta quoque, placeret! Sed id vel optare nimis temerarium, quum alteram Vallem Umbrosam facere, neutiquam quidem fuerit humanarum aut virium, aut Ingenii. Vale Florentiæ. xix. Kal. Septemb. 1708.

PE-

PETRO HIERONYMO

BARCELLINI:

XLVIII.

Quid ipse fenserim, Vir optime, quid imò & scripserim de amœno admodùm, ac Religioso Vallis Umbrosæ Recessu, breve hoc ac rude carmen, indicio simul erit, & fortè quoque, non equidem pari, ipsi argumento, atque ejus sublimitati, qualiquali Encomio. Interim summo perè placet, quod à tuis non multùm diversa, & ipse dederim: cùm Amicorum sit idem velle, atque nolle, & cogitationes quoque, si fieri possit, ut alia omnia, communes atque easdem habere. Nolui ergò quin statim, atque eodem pænè momento rescribere, quantum inde voluptatis, neque citò transituræ, aut perituræ hauserim. Tu quidem ad Libyam, & Ægypti arenas, sanctumque Antonium provocas; ipse te revoco ad mitiora loca, ad Solitudines Etruscas, ac Columbinum Abbatem. Veteres miramur, præsentium incuriosi, uti ille Politicorum Philosophus, atque alter ante Poetarum quoque: quum illorum vitam æmulentur recentes, atque horum certè vita magis
ad

ad cultum civilem accedat, & hîc noster in cœtu vivens, non sibi uni, sed pluribus profît, neque exemplo tantùm, sed & sermonibus etiam, & quotidiano inter plurimos convictu. Delibavi etiam pauca de utroque meo Itinere, tum Romano, tum Vallumbrosano, ex Epistola ad Amicum, atque in Angliam hodierno die transmissa; ubi & Barcellini inter eruditionis Proceres, nomen leges, memoriamque nominum, imò nominis, nunquam apud me interituri, servatam agnosces. Sed non amplius, ne modestiam onerem, quum veritatem, ac simplicitatem profitenti, respondere etiam debeat oratio. Vale. Florentiæ. xii. Kal. Septemb. 1708.

JOHANNI DOMINO

S O M M E R S.

XLIX.

SI fortè scire velis, mi Domine, quid Florentiæ faciat, quomodò tuus agat Henricus, sequens pagina, brevi quasi totum exhibens tabella, explicabit, quænam hic terrarum nuper egerit, rerum ejus statum hodiernum, consilia, & in futu-

R

tu,

turum quoque vota, suo quæ omnia Natali, de se, & ad se scribens, Antonini instar alterius, sed privati, suoque se planè metientis modulo, elucubraverit.

Accedit præteritis jam annis novus, ac supra quinquagesimum octavus; finì equidem ætatis, quam initio propior multò: sanè Scaldim ad flumen pugna, sub Auspiciis Annæ Reginæ, ac Præfecti Armorum Marlburii Ductu, speque exinde proxima pacis, totì Europæ, non minùs desideratæ, quam utilis ac penè necessariæ, neque Britanniis penitùs ingloriæ, memorabilis: Mihi verò, ut nec mala fortuna, quod lucro quoque computandum; ita nec bona admodùm, quod neque ipsum adhuc displicet, distinctus: sed per omnia ferè, idque mihi satis, in hac præsertim ætate, animo varios subitosque casus atque incerta rerum secum reputanti atque expendenti, neque pro honoribus opibusque anxio aut sollicito; similis triennio huic jam priùs placidè, quantum à patrio solo, ab Amicis, atque à Familia, remoto, contingere poterit, in Italia transmissò. Interim Itinere uno atque altero, & aliquoties carmine, levi neque operoso; atque ex eo quoque nomine, licet immeritò, inexpectatò certè, neque spontè in Arcadiam Romanam cooptatus; Curas modò fallere, atque ex publico onere, molestias, mentem-

temque unà vireſque reficere paululū libuit. Inde Romam medio Vere, inde & Vallem Umbroſam Etruſcorum, nondum exacta Œſtate, inviſeram traſcurremque; ut demum ante calores, Urbem adirem; atque in altero illo ſeceſſu, inter adſitos montes ac nemora, ipſos parumper, jam pro anni tempore nimios, minùs, imò ne quidem, ſentirem: & Utrumque pro votis ſucceſſit, nihilque in alterutro diſplicuit, niſi quod longior mora, ex negotiis, ac Legationis munere, non fuerit conceſſa. Oh Urbem, ipſis atque in ruinis, cæteris omnibus auguſtiorē! oh Urbem, & præſenti quoque cultu, cunctis etiam pulchriorē! Tu mentem monumentis antiquis allicis paſciſque, Tu oculos ex aſpectu templorum atque contemplatione, palatiorumque, totque ibi congeſtis artium miraculis, tabulis, ſignis, columnis, tum veterum, tum recentium, noſtrorumque etiam temporum, erudita & infinita quadam voluptate perfundis detineſque! Alteri ſanè placeat Majeſtas Sacrorum, atque illorum Princeps, ſupremæ non impar Dignitati: ipſe autem neutiquam omiſerim vera, ac ſpirantia Urbis ſæculique ornamenta, deliciasque meas, ſi non id nimis ſuperbum, Leonem Strozzi, Comitum Magalotti amicitia florentem, Tuſcum Equitem Maſſeum, Bianchinum, Cargofilum, Zacagnium, Vignolium, Fontani-

num, meumque Barcellinum, alteram quasi pristinamque Romam. Neapolis quoque in accessum venit, amplitudine ac pulchritudine sua, sicut in sinu maris placidissimi, frequentibus, ac amenissimis hinc inde Insulis surgentibus interpositi; soli contermini admirabili fecunditate, atque horrore etiam & cineribus Vesuvii, nimium sane vicini; Puteolorum Baiarumque reliquiis, tantum à Vatis, ac felicibus priorum posteriorumque temporum ingeniis celebratarum; villarumque ruinis, Marii, Luculli, Cæsaris, Procerumque Romanorum, Urbium instar; strato & nunc in parte freto ingenti insanientis Tyranni mole; ipsius denique Naturæ quaquaversum se ostendantibus miraculis, nobilis admodum atque memoranda. Nec ibi quidem te Maro Divine, Sacrosque Cineres insalutatos dimittam, Hederæque Lauro-rumque obliviscar unquam, quibus coronatur Urna, gaudentque (si ita de illo eloqui fas est) Manes, quasque semper æterna fronde in Vatis memoriam cultumque florere voluit sua quasi Rerum Natura. Hinc agrè, vixque mei compotem, abreptum, pulchra iterum detinuit per menses aliquot, Florentia; cum Urbis pœne hac anni tempestate incommodis, siccique Sydere, laborantem, recreare Vallis Umbrosæ, & Camalduli Umbræ; nec penitus displicuere Sylvæ horridiores,

res, ac abrupta, & minantia Alvernix Saxa Ruppelque; D. Francisci olim, quis credat, delicia, atque nunc ex Illo Nominatorum Sedes, vicinis ac remotioribus venerabilis. Ubique quoque, & in Urbe, atque Ruri, Cosmum Principem, faventem admodum sensi, multa cum comitate, illic à Legato suo, hic à Patribus exceptus. Inque grati animi, atque itineris testimonium, ac monumentum, & Hadriani Imperatoris Villam, oh mundi vices! jam quasi in solitudinem conversam; alteramque verè ex instituto, atque loco solitudinem, ac quidem, quod maximè convenit, religiosam, numeris aggressus sum; adnixus, si quid ipse potuerim, incassum fortè, illam tempori atque oblivioni eripere atque subtrahere; hanc ipsis urbibus, ac Regum Palatii pro veritate præferre; simulque describens, ea occasione extra conventum quoque, quod multis non placet, plurimis non licet; vitam ut mihi videtur, præsertim senescentis, beatam, innoxiam, non præsentia bona fastidientis, non pro futuro nimium anxii, ac metuentis; aliis interim utilis, minimùmque inutilis sibi; neque pigram planè, aut penitus otiosam;

.... *Et precor integra
Cum mente, nec turpem senectam
Degere, nec cithara carentem!*

Hæc

Hæc etiam, Veterum instar, in hortis, ubi nunc studeo scriboque; atque ita Natalem celebros, mihi solùm, non aliis, non amicis, non Principi eorundem optimoque, ipsi Comiti Magalotto cognitum; sine strepitu, sine salutantium pro more turba, sicque ut plurimum Adeuntium Lætitiâ: sic etiam, bono adjuvante Deo, futuri, seu plures, seu pauci, transeant hujusmodi dies, sub silentio, jucundi, securique.

Hæc mecum eodem tempore repetenti, non pauca ad Belbari etiam Dominum propius spectare videbantur; cui aliquatenus vel ulla demum in parte accedere, quamvis maximo sanè intervallo, summo Decoris, atque laudi, non tantum in hac præsentis vita, sed apud Posteris quoque, atque in omne insuper ævum fuerit. Vale. Florentiæ. xv. Kal. Sept. 1708.

PETRO HIERONYMO BARCELLINI.

L.

Tunc optime Barcelline, Henrici tui sic tandem oblivisceris, silentiumque adeo contumax ultra mensem servas adhuc? Non sic ego
Bar-

Barcellini mei immemor, atque itineris secum
 modò initi absolutique ad videndum unà fruendūque Tiburis Horatiani, & Villæ Hadriani deliciis. Me etiam multò magis, vel ipsæ Reliquiæ artium magnificentiæque Veterum, quam vel etiam præstantissima, audactè dicam, Recentium Opera delectant; quod meliùs ex subjecto Epigrammate, ut aliis testari, ita & tuo quoque permittere arbitrio liceat, qui soles & meas legere, & favere nugis. Ingenio meo planè, neque equidem primò diffusus, Justa reddere conatus sum, in alio Carminis genere, præclarissimo Vati Etrusco, cujus ergò, manes, mites placidosque precor, insolitos suosque numeros temerè tentanti: Neque hìc tamen lugubres pro more effinxi planctus, lachrymasque in turba cum cæteris effudi: Scis in Piorum Cœtibus, Martyrum memorias, Festis, ritibusque lætis coli; ex recurrente quotannis grato tempore, (jamque etiam dies appropinquat ab Academia, Socio suo Filiciæ destinatus) non mortem eorum, non funera defleri, sed potiùs Triumphos celebrari; atque hinc ipsorum ex terris discessum, minoribus equidem tristem, ac admodùm lugendum, inter eorundem Tropheæ numerari. Et quid quæso ævo præsentì magis gratum, quid futuris etiam utilius, quam magnos, & excellentes viros, justis suisque ornari laudibus,

&

& in Exempla posteris præponi, qui ita majorum vestigia pressius legendo, vimque virtutum, seu moribus, seu scriptis, formando exprimendoque, ad idem factorum Laudumque culmen, & consortium tandem assurgere, & pervenire queant.

Interim tua credo, ætate præterita, consuetudo cum nobilissimo Urso, dum ejus contubernio, in sua Nova Villa propè Bononiam, optimis utrinque studiis intentus fruebaris, & fortè eo tempore ex literis de me orti Sermones efficere, uti Vir ille, Italiæ, nostræque ætatis decus, libros à se pridem editos, jucundioris apprimè Doctrinæ, atque etiam valde reconditæ plenissimos; simulque Romanorum Superioribus optimisque sæculis ingeniorum, Italorumque vestrorum, sive olim viventium, sive etiamnùm superstitum, vindices, mihi quoque dono dederit, in quibus, usque ad calcem legendo, admirandoque totus sum futurus. Nam & ego quoque, ratione genioque ductibus, planè easdem vobiscum partes sequor, favoeque plurimùm, & quantum scilicet ipse possim, (ut à Seditibus Spectatoribusque in circo in amicos in stadio decurrentes decertantesque, votis saltem plausuque illos hortando juvandoque fieri solet) hujus Coeli Ingeniis, contra Transalpinam quamdam Gentem, cujus artes, atque sermonem non magis cæteris prævalere, quam vel
 ipsa

ipsa eorum arma Anglus optaverim. At quem hæc sint habitura exitum omina adhuc incertum; interim nos, & scientias quoque literasque Communes tutemur; ut vobis, non pares equidem; ita certè proximi, atque inde aliis omnibus, invident alteri licet, Superiores.

At verò quæ legeris, ne excusanda quidem sunt, nisi plura condonaveris epistolæ, nimium fortè de carmine, ac argumento trahenti, solitoque ea ratione, ac justò elatiori; præsertim cum vobis de Ingenii præstantia, vosque de antiqua dignitate, ac Literarum possessione deturbando, controversia adeo iniqua moveatur. Vale. Florentiæ. Pr. id. Jul. 1708.

PETRO HIERONYMO

BARCELLINI. S.

LI.

Tuum mihi modo munusculum, uti scribis, optime Barcelline, Florentiam detulit, civis meus, & amicus, qui nunc Patriam versus iter faciens, Italas secum Artes in Britanniam devehit; neque tam mole equidem, quam pretio operis, ac dignitate æstimandum: In quo etiam

S

Ar-

Arcadas, nunc quoque & meos, iterum lætus agnosco, atque ibidem renovatos, post tot sæcula, jam per septennium suum, sub Clemente demum, Capitolinos Agones, quibus & ipse nuper (uti nostri) inter alia Urbis Decora, interfui; atque Auditorum Saltem, quinimò & Admiratorum, unus in turba partem constitui: Vivas excepi voces, atque de laude ac præstantia certantibus, in illa Musarum certè Artiumque, sin minus Imperii sempiterna Arce sedeque, ore sanè manuque favi plausique. Vidi Opera simul Operumque præmia, illa, superiorum temporum vestigia, perpetuò adoranda posteris, sequentia; hæc, anteaactorum unà mercedem, & ad nova insuper Incitamentum. Agnovi etiam Judices, Marattam, Fontanamque, nobilissimis olim Artibus, Tabulis, machinisque stupendis conficiendis; mente manuque celebres; studiorum ita Exempla pridem, atque illorum denique, quum ipsis, suas partes, summus ille Artium atque Reipublicæ Parem permiserit, Arbitros atque Remuneratores: neque minùs trans Alpes, atque apud ultimos Septentriones, quam Domi, atque per Italiam, cognitos atque celebratos. Et nunc quæque à vobis longiùs remoto, grata recurrit memoria, ut eodem tempore, eodemque loci, ipso videlicet in Capitolio, mihi primum, ibi incognito, (Romam
etc-

etenim visurus ; non videndus veni :) Hospiti ,
 Extero , ac Britanno , mexque , mihi sanè , infir-
 mitatis conscio , adeoque nec famæ , neque gradus
 munerisque sublimioris , avido , aut satis capaci ,
 oblatis fuerint Arcadiæ vestræ Honores . Quod
 quidem paucis abhinc diebus , non tuis magis con-
 siliis , lenibusque imperiis , quam sponte mea , at-
 que pro officio , brevi carmine testatus sum : non
 equidem lingua adhuc , qua & ipsæ gratiæ lo-
 quuntur , Etrusca ; at verò quæ non minùs vestra
 est , veteris quippe Latii , atque Majorum ; qua &
 olim Populis , Victor ille Populus iussa dabat ,
 cùm & ipsa Britannia Latias inter Provincias , ne-
 que puduit , recenscebatur ; quæque etiamnum in
 Legibus Dominatur , Artesque omnes ac Scientias ,
 ambitu suo complexa , ad nostram usque notitiam
 derivavit , Nosque exinde easdem , per manus
 traditas , ad posterorum usus consignamus ; qua
 denique nunc fermè solum pro dignitate tractan-
 tur sacra , & quasi undique ad Deum acceditur .

Vides etiam ut Patriæ quoque meæ , aliquid ,
 parum licet , dederim , in laudibus Summi Ducis
 Marlburii , Germanici , Belgicique , meritisque
 proferendis : indignum quippe ratus , nec sæculi
 ipsius , neque nostræ Gentis gloriæ conveniens , si
 quando de Imperatore Britanno , nunc ubique
 terrarum , sermo habeatur , non & in eo quoque

legatur, qui omnibus communis sit sermo, &
quasi totius Mundi Patrius. Vale. Floren. vii.
Kal. Oct. 1708,

ILLUSTRISSIMO VIRO
G I S B E R T O
C U P E R O. S.

LII.

Literas, unà cum ad me datis, ad Illustrissi-
mos Fontaninum Romanum, & Bianchium
Florentinum, accepi reddidique, nobis quidem
omnibus gratissimas acceptissimasque, mihi vero
præsertim, quem & tam multa in tuis doces,
& de quo tam benignè tamque amicè sentis. Sed
Bianchius pro more hisce Vindemiarum feriis in
Villam se recepit, nec ante finitas, regressum in
Urbem meditatur: interim Gemmæ Bastidianæ,
mihi ab ipso, cùm tuas ea de re illi legendas de-
derim, dono datæ, formam sulphure expressam,
quod priùs equidem facere constitueram, hisce
demon inferui.

Legi

Legi nuper Germonii librum, qui in utrifque nostris occurrebat, contra Fontanini vindicias, cui brevè multis ille respondebit, atque utinam exemplum ab altero datum, non & ipse quoque sequatur: quanto tamen satius foret, neque pro animi tranquillitate minùs, quam ad famam, si argumentis invicem, non conviciis inter Doctos decertaretur, atque miti sapientia, quam nimio acumine, ac acerbitate ingenii inclarescere vellent? Nunc verò & ipsi Lectores, neque otiosi sedemus, at affectus quodammodò, inviti licet, scriptorum induimus, & à legendo, non tam doctrina, atque materia disputationis Instructiores, quod solum fieri debuit, quam & animo, ac pænè vultu, Commotiores, dissimilesque planè nobismetipsis, consurgimus. Et quas quæso aliquando ob causas, non cùm de Artibus, & Focis, ut ajunt, ubi de summa rerum, non cum de Juribus Patriæ, atque communi salute agitur, non cum sacra ab Impiis spreta, & conculcata, asseruntur atque vindicantur, sed ob fabulas nescio quas Philosophicas, & quæ varix variis ætatibus, pro sæculi hominumque genio, nascuntur cudunturque, Placentque ut novæ primum, ut novæ quoque quibusdam displicent, sed omnes citiusve tardiusve, suorum instar Auctorum, Intereunt, prætereuntque; quia etiam, sapiusque, pro Pudor! ob
Tri-

Tricas quoque Quisquiliæque Grammaticas Criticasque, in rixas, mutuaque in opprobria, mulierum tantummodò Argumenta, divertimur decidimusque: Obliti interim plerunque, non solùm quod civibus, inter quos ejusmodi Controversiæ non rarò oriuntur, quod Christianis, quales in Occidente cuncti, sed etiam quod bono Viro, quod bonis Moribus, in perpetuum conveniat. At multò facilius est Insurgere in Vitia, quam reprimere, & excindere; quæ quidem semper malè audiunt, neque minùs tamen, ut olim Romæ, uti & alibi, Mathematici, qui tamen jam quoque ubique, retinentur, prævalentque.

Sed si placet, ad mitiora tandem deveniamus, nisi cum Larvis, id est Mortuis, quod neque animi Generosi, neque civilis, luctandum sit. Vir in omni parte Doctissimus, Josephus Averanius, Benedicti Averanii Græcarum Literarum, ac Eloquentiæ modò Pisis, summo cum Juventutis Profectu, sui que nominis Celebritate Professoris, frater, & ipse etiam ibidem pari cum Laude, atque aliorum utilitate, Juris Legumque Professor, ac Interpres, summoperè cupit, atque me quidem Judice prudentèr admodùm, apud Batavos, Fratris, sui Orationes, Prælectionesque in Anthologiam, aliaque Opuscula, ubi Res cum Sermone certant, utrum illæ Dignitate, an hic Facun-

cundia verè Romana præster, Typis in Publicum dari. Ad Vos etenim toto sanè Orbe confugiant Literæ, & Literatorum Opera, ut inde in manus hominum pulchriora veniant, atque ita ipsis gratior aditus terras in omnes pateat, fiantque in perpetuum cum nitore, cumque Elegantia, Bibliothecarum studiorumque pars optima atque amœnissima : Ac pridem ejusdem Orationes Latine, Florentiæ editæ erant, & nuper eodem loci, quæ etiam Etrusco sermone ab ipso, coram Academia, non ut alibi, cæterasque apud Gentes, Puerorum Juvenumque fermè ; sed Hominum Dignitate, Ingenio, Literis, per cunctam Italiam, Operibusque, per Orbem Illustrium, in summum recentiorum sæculorum Vatem, Petrarcham, palam recitabantur : Maximo quidem subinde Utræque, cum plausu ab omnibus excepta ; sed nescio quæ nunc fato, sive quod Commercia penes Britannos (nos vero quasi penitè ab Orbe divisi) Batavosque, pro maxima parte sint ; adeoque cum aliis mercibus Literæ quoque, ac Literarum monumenta in dissitas Regiones perque cunctas Terrarum Oras advehantur disperganturque ; sive ex incuria Civium neglectuque, certè intra suas ferè Alpes, ac Maria detinentur quasi, ac delitescunt ; neque in majorem nunc Romano, Remotio-
toremque ab illo, Mundum, mittuntur, adpel-
lunt-

luntque; neque ubique, ut sanè merentur illa, noscuntur evolvunturque. Meque equidem fateor, Pietate in amicum jam mortuum, animique grati memorisque planè semper beneficii in me quandoque collati sensu inductum, quo Ipsi paulò ante Obitum placuit, ultimum illud suorum Operum, mihi, Cæli alterius homini, inscribere; velle etiam preces adjungere socias, ut hac arrepta occasione, & suorum commodis, simulque Publicis, Amstelodamenses Vestri velint consulere.

Roma præterito vere excedentem, ibique etiam multùm renitentem Romani Arcades, usque ad Florentiam comitèr profecuti sunt; suumque deinceps in numerum ordinemque, ex nimia certè Indulgentia, retulerunt: hinc ex recepto more, missum in Urbem Epigramma, quod nunc quoque Bataviam accedit, quæ & ipsa præterito sæculo, superiorique, quasi Musarum quoque Patria fuerat; cum secundi Basiis Infederint Amor Gratizque; Mauritiique Principis Triumphos, sequenti ævo, Carmine celebraverit Grotius, æquaveritque, atque in hunc pœne diem, idem civibus suis Decus, post Heinsum Utrumque, Barlaeumque, servaverit Brochusius. Intellexi etiam post reditum ex literis ad Eruditissimum Senatorem Philippum Bonarotam, quo vix alterum Rei Anti-
qua-

quarizæ Nummariæque, Unum si exceperimus, Peritiorē inveniemus, amici sui Maffæi Equitis, Gentē Etrusci, Domicilio Romani, atque jam edito volumine, ex quinque quæ apparantur, secundo, Gemmarum Antiquarum, unā cum annotationibus multa variæque eruditione repletis, nomen ubique Inclytum adepti; in quibus summa cum voluptate aspexeris, summa etiam cum Arte ac nitore, exprellos ritus Veterum, tum Sacros, tum Civiles; atque icones effigiesque Deorum, Cæsarum, Consulum, Virorumque, seu Gestis, seu studiis, Insignum; sibi in animo esse Villam Hadriani cum Architecto adire, ac deinde accuratissimè descriptam, quod tantoperè exoptas expetisque, in lucem denuò extrahere atque emittere.

Ad finem autem æstatis, decantatas ubique Vallis Umbrosæ solitudines invisi; neque cum Loco Imago Placens mente, ac memoria excessit: Meruere Patres, Virque Primorum sæculorum, Præses, meruere Sylvæ sacraque Musarum, atque umbræ caloribus intactæ, non penitus ab Hospite silentio præteriri: Cùmque à Te etiam ut meruit, æstimatus laudatusque fuerit, Fulmen illud Belli, uti Ipse loqueris; Marlburius noster, paucos quoque versus in nuperum ad Odenardam Prælium Victoriæque Scriptos; cui Insulas Flandrorum, Pacemque uti speramus; Sociis Totique Orbi uti-

T

lem,

lem, Perpetuæque proximam, grati memoresque in omne ævum accepta feremus, in accessionem aliorum misimus; cum Tibi soli imputare debeas, si prioribus nugis, quibus nimium favisti, & novæ insuper ultimæque accesserint.

Sed inter hos quasi Litterati Otii, Pacisque Etruscæ delicias, non silent Arma, Copiisque nostris levi admodum militum damno, non supra septem amissis; (ut sane nullo antè, Urbs Calaris Sardiniaque Regnum recepta) Minorica quoque Insula, cum Portu amplissimo Tutissimoque, arceque Santi Philippi munitissima cessit; quibus in Potestatem redactis, & objacenti Hispaniæ, Provinciisque Carolo Regi Parentibus, melius prospicitur, atque Gallia quasi a se divisa, conjunctio Navium, inde ab Oceano, hinc ab Interno mari prohibetur, aut multò certe difficilior redditur; & si Annona deficiat, brevis facilisque hinc in Africam Trajectus; quodque nobis prius defuit, ac maximo erit usui, si Bellum amplius prorogetur, statio classibus nostris, dabitur, Hyeme, secura, vicinior multum Hostibus, & ad captandas occasiones opportuna.

Atqui & Ipsa Italia, si à bello adhuc libera, non ita tamen in proximo ab impendentis eidem metu, cum nuper Florentia excedens, jam Romam advenerit, Armorum fortè Præfectus, sub
Le-

Legati Titulo, Tesselæ Gallus, si tandem manu certandum, eisdem materiem Ducemque Daturus: atque elapsum intra triduum, etiam Curfor Vienna, eodem iter direxerit, cum mandatis à Cæsare, Bellum aut Pacem secum ferens; Ultimam quidem ego optarim, tum communium studiorum, tum & ipsius Regionis causa, quæ cum à natura facta sit, adjuta etiam Incolarum industria, omnium pulcherrima felicissimaque, sua si bona norit; non alias omnium etiam miserrima reddatur; everlis unà quæ adhuc restant Antiquitatis Monumentis, & inde forsitan funditus perituris: sicque cum Urbibus, Publica atque Privata Ornamenta, ac eximia Artis Decora, Militum, *non addo Germanorum*, inculti, fieri, barbarique, ut plurimum, Generis Hominum, Præda fiant. Vale. Florentiæ. xvii. Kal. Nov. 1708.

ILLUSTRISSIMO VIRO
G I S B E R T O
 CUPERO. S.

LIII.

REcepi tandem ab Amico Nobili ex Britannia, huc usque quidem valetudine impedito, illam annotationum Christophori VVassii in Gratii Cynegeticon partem, quæ de Formidine, ac Venatu Siciliensi agit; quamque ab uno ex Domesticis qualiterqualiter Gallicè conversam, hinc demum Tibi, in obsequii pignus, lubens mitto: Cui si ullatenùs satisfacere, aut placere possit, novum sanè mihi beneficium, neque minimum, post mortem quoque, Optimus quondam, contulerit Præceptor; Atque utinam ei licuisset, quod sæpiùs mente agitabat, ipsum Auctorem, denuò recognitum, in publicum dedisse, ut textu atque Opere emendatiorem pleniorisque, ita & suis etiam commentariis, uberioribus multò, ac communi doctorem sermone elucubratis, illustratum: Neque enim solummodò criticè plurimum valebat, sed politiori ac omnimoda literatura penitùs imbutus, insignis quoque
 erat

erat Poeta ; cujus exemplo hic inductus , maximique insuper Scaligerorum Josephi , in Catullo , Comitibusque Poetis ; inque Lucano , Magistri vestigiis feliciter insistentis , Grotii ; [deque Grotio , à Cl. Clerico Vestro , meoque , observatum memini , hunc , neque rarò veros Veterum in Anthologia assecutum esse sensus , etiam cum à Magistris Codicibus suo tempore destituebatur planè] non illubenter certè crediderim , neque falsò forsitan , Optimos Vatum Interpretes , ipsos fore Vates ; utpote quibus communis quasi Genius , Os Divinius , ac supra cæteros , Vires , Animique Vigor . Vale . Florentiæ . iij. Kal. Nov. 1708.

A N T O N I O

MAGLIABECHIO. S.

LIV.

Nondum literas Cardinalis Turnonii , quas scribis , Taurini editas , vidi ; non etenim ibidem mihi cum eruditis , sed cum nostro solùm Legato Britannico commercium intercedit , qui cum militiæ nomen dederit , interque Belli præfectos

Etos numeretur, ab ipso quæ ad Summam Reipublicæ (atqui illa ferme tota in armis, quanta temporum infelicitate, quali studiorum pernicio, consistit:) expectaveris fortè, non ita, quæ ad rem Literariam pertinent. Hæc enim Leibnizios tuos, hæc Magliabechios requirunt, quibus ad ornandas Artes, scientiasque promovendas, neque consilia defunt, neque Vires. Vale ex ædibus meis. Flor. iv. Non. Nov. 1708.

PETRO HIERONYMO

B A R C E L L I N I. S.

L V.

TU, optime Barcelline, Temporis officique memor, ea in tuis præcipis, quæ & scire maximè omnium, magis verò ab omnibus præstari interfit, quum in hoc restituti Orbis, Generisque Humani vero Natali, suam Cœlites pacem annunciaverint optaverintque Terris; quæ nunc undique tumultuum plenæ Bellique, quod non tantum Principes populosque plurimos tamdiu occupavit, agitatque etiamnum; sed uti ex disputationibus, atque inter se invicem sine fine con-

cer-

certationibus nimium sanè constat, neque nunc quoque pectora sacris studiisque dicata, fugit. Hinc Patribus Laderchio Germonioque cum fratribus, aliisque prælia, & quantum ab ipsis, suo equidem genere, internecina. Ita à doctis, qui sibi quasi soli sapere videntur, & intra, atque extra Italiam, non minoribus ferè iris, atque animis, de imperio Literarum, quam de altero illo inter Gentes, cujus tamen exitu publica, ac communis Orbis Christiani salus, à plurimis contineri videtur, disceptatur contenditurque. Sed fortè initium Paci, iterum dabit, uti priùs Bello, Italia vestra; attamen spero non ita brevem Gentibus, uti ipsi paulò antè contigerat. Dignus sanè Pontifex, quem non ita Turba, ac Armorum strepitus interpellent discrucientque, atque sic otium studiis alendis promovendisque utile, ac pœne necessarium, ipsi discutiant, pacis ad artes nato, pacis artibus diu florenti. Præterit enim tempus, quo Roma, seu nomine, seu reverà, Martia fuerit; ex eo illi, alia Instituta, alii mores. Atqui ego pacem, & Urbis, & Principis causa precor, ut ita dilata adhuc opera perficiat absolvatque, atque adeo Antonini Pii, Eruditi, Pacifici columnam, ac monumentum, suo Principatu ex rudibus erutum, atque mihi postremum, inter miracula Romana visum, ipse eisdem dotibus, atque præ-

prærogativis instructus, atque insignis, eadem felicitate Ingenii, Imperiique regnaturus, tandem inter Urbis ornamenta, otium nactus atque quietem, erigat statuaturque; & si quid etiam præclarior, suisque temporibus, posterisque profuturum, animo meditetur, id ad finem optatum, non his saltem curis discerptus confectusque, non ut inter Arma semper, Fortunæ casibus in dies obnoxius, perducatur. Velim etiam si fieri possit, sed multò quidem illud difficilius, ut pacem quoque inter se atque concordiam, quos minimè omnium rixæ, ac controversiæ commendant, atque distinguunt, vel Literarum cultores, quæ sanè ab humanitate nomen suum gratiamque deducunt, bona fide colant. His certè tumultibus, ac certaminibus infinitis, multum moribus decedit, parumque aut nihil Scientiis acquiritur, quarum augmentis melius omnino fuerit, & pro aliorum, ac publicis usibus commodisque, proque sui etiam fama, gloriaque nominis, tandem ad extremum consulere. Summa interim votorum erit, ut Tibi, Vir Optime, leniter, suaviterque studia Literarum inter, ac pietatis officia, inque otio aliquando cum dignitate constituto, per plurima annorum spatia, inoffenso pede, decurrat ætas. Quibus unum in cumulum, nobis utrisque gratissimum adjicere juvat, ut scilicet Illustrissimus Fontaninus tuus,

cæterique nostri Romæ amici , & benè valeant ,
 simulque fama ex operibus , totque editis Doctrinæ
 monumentis , orta , apud bonos omnes , suo
 sæculo , diuturna ; apud Posteriores autem , semperiter-
 na , fruantur . Vale . Florentiæ Pr. Nat. Dom. 1708.

A N T O N I O

MAGLIABECHI. S.

HENRICUS DE NOVA VILLA.

LVI.

R Eddo literas , huc Tibi , Vir Illustrissime ,
 nuper ex Germania quidem missas , in-
 quibus tot novæ res Litterariæ continentur ; quæ
 certè nobis utrisque , Pacis ac studiorum amanti-
 bus , multò quam Bellicæ illæ alteræ , quæ quasi
 tamen nunc ubique , utramque paginam , magno
 verè sæculi malo ac miseria faciunt , sint gratæ
 magis , magisque Tempori sanè Festo convenien-
 tes : quod Tibi , & Tui , & communium studio-
 rum causa , atque in hunc , & in plurimos annos ,
 lætum faustumque precor , ut cum Fama in futu-
 rum non poteris ipse majore , hic saltem quam
 maximè diuturna gaudeas . Vale . Ex ædibus
 meis . Florentiæ Pr. Nat. Dom. 1708.

Illustrissimo, ac Doctissimo Viro,

DOMINO HENRICO
NEWTON,

APUD M. ETRURIÆ DUCEM

Potentissimæ Anglorum Reginæ Alegato.

D. GUIDO GRANDUS. S.

LVII.

CLarissimi Angliæ Mathematici Johannis V Vallisii doctrinam, de hyperbolicis quibusdam spatiis *plusquam infinitis*, adversus inanes scrupulos illi nuperrimè à Gallis oppositos vindicare aggressus sum, ut non modò nominis Anglici decus, sed veritatis ipsius vis exposcebat; demonstravi enim, nullam V Vallisii hallucinationem imposuisse, cùm spatia illa *plusquam infinita* appellavit, sed necessaria, evidentique consecutione ita meritò censenda ab omnibus esse, quippe non modò infinita, sed qualibet infinita dumtaxat quantitate infinities majora, quidquid in contrarium adduxerint Regiæ Parisiensis Academiæ Mathematici in monumentis Academiæ illius anni 1706. ; quæ
fi

si maturius in manus meas incidissent, longè antea VVallisianæ doctrinæ apologiam adornassem, cum jamdudum rem ipsam satis perspectam, & adamussim apud me demonstratam haberem.

Porro si vindicias has, brevissimas illas quidem, sed reprimendæ Gallorum Geometrarum temeritati pernecessarias, in publicum exire permisero, easdem dumtaxat tui Clarissimi Nominis umbra protectas exire patiar, congruum quippe judico, ut qui totius Anglicæ Nationis doctrinam, humanitatemque non minùs virtutibus tuis nobis repræsentas, quam Regni ipsius florentissimi, atque invictissimæ Regnantis majestatem, auctoritate officii tui nobis præsentem exhibes, etiam Auctoris Anglici, qui Gentem vestram adeo illustravit, apologiam tuo sinu primus amantissimè excipias, tuoque præsidio tuearis; Verum id injussu tuo ne attingere verear, propriæ pusillitatis, tuæque magnitudinis cognitio prohibet; itaque Operi huic opportunos ab Illustrissima Dominatione tua nutus expectabo, cui interim, cum optimo recentis anni auspicio, faustissima omnia precor, meæque semper observantiæ memorem cupio. Vale. Pisis Idib. Januarii 1708.

D. GUIDONI

GRANDIO. S.

HENRICUS DE NOVA VILLA.

LVIII.

Quid me precor ordine Vulgi detrahis, & ponis non regione mea? Quanto melius ei, hoc sane tempore, & hac præsertim occasione, quam alteri cuicunque convenit, cujus nomen eadem jam pagina, cum VVallisio nostrate cumque Grando, Victuris istis nominibus, tuo demum beneficio conjunctum, unà legetur vivetque. Sin autem Itali vestri in hoc Gallico, ac eorundem penè cum Universis Bello, socia minùs Arma nobis adjunxerint; Tu tamen interim, quod multò majus, quodque nulla unquam tacebit ætas, Anglorum Ingeniis contra communes quasi, atque in hac certè parte absque controversia inimicos, suppetias fers; & pietate inductus, VVallisianos tandem manes ulcisceris, ac Hostem tumulto submoves. Ut nobis benè facias, priùs Tibi ex consuetudine venit; hinc pridem conciliante optimo nostro Comite Magalotto, jam credo sentit Armachanus Marshius, cumque eo
To-

Tota Philosophorum, sociorum Tuorum, in hoc
 veræ, neque solum nomine tenus, sapientiæ sta-
 dio decurrens decertansque Londini Cohors, quod
 lumen affuderis nuper, quas Vires addideris, illius
 de sonis, deque Auditui, minimè vulgaris, aut usus,
 aut Eruditionis, Dissertationi! Haud ipse equidem
 Mathesin vestram laudando Par, imò ne quidem
 satis admirando, cujus summa utilitas, tum in
 maximis, tum in minimis quoque rebus, omni
 die, atque omni etiam momento cernitur, atque
 elucet; & sine cujus auxilio, atque opibus, non
 tantum non commodè, nedum pro dignitate Hu-
 mani Generis, sed ne vivere quidem datur? Mihi
 verò hìc planè deficiente, in partes aliquando ve-
 niet, Archipræful Ille Doctissimus, atque nostro-
 rum mathematicorum Princeps, Nevvtonus Eques,
 Tibi etiam communium studiorum litterarumque
 commercio conjunctissimus; cumque nostris ho-
 minibus, cuncti quoque cunctorum sæculorum,
 (consentientibus eisdem, atque Gallis posthac,))
 adeoque ipsa Temporum Æternitas, magni scili-
 cet vestri instar Argumenti, non ullis circumscri-
 pti, aut conclusi finibus; cujusque modo Patro-
 cinium tam justè, tamque feliciter in te suscepe-
 ris. Vale. Florentiæ. vii. Kal. Feb. 1709.

ILLUSTRISSIMO COMITI
LAURENTIO
 MAGALOTTI.

LIX.

Lætum mihi nuper, Illustrissime Comes, neque minùs tamen difficile negotium injunxeras, Munera Publica, Indolemque quodammodo describendi, Illustrissimi quoque Domini Someri, Magni equidem Viri, sed & mihi simul Amicissimi, ut inde decerpta, inferi possint, Arcadum Vitis, brevì in Urbe edendis; atque inde metus admodùm justus incesserit, ne aut mihi metipsi viderer, sub Opere deficere; aut aliis fortè, res supra veritatem augere, atque extollere. Quantum autem ad rerum veritatem spectat, quæ sanè primas ubique tenere debet; saltem à parte tua, Nobilissime Laurenti, atque ea quoque ratione, vel à Sapientibus, vel ab ipso Populo, parùm impræsentiarum timendum habeo; quum & ipse priùs, de eodem his nostris minimè dissimilia, imò magis magnifica, Senatori Gravissimo, Vatumque nuper Principi, Vincentio Filicaiæ suggesseras, in Argumentum Carminis, (quam
 verò

verò illud varium, quam sublime, quam iustum, atque omnibus denique numeris perfectum, atque absolutum!) pari ab ipso, fide atque eloquentia compositi.

Et certè Joannes Dominus Sommers, Baro de Evesham in Anglia, is erat, cujus fidei, plures per annos, ultra septennium scilicet, ancipiti admodùm difficilique tempore, Gulielmo Auria-
co tunc Rerum in Britannia potente, ipsa quasi Respublica, sub Cancellarii nomine credebatur; & quo non alius etiam deinceps, eodem semper tramite insistens, communisque Patriæ commodis intentus unicè invigilansque, facundia magis gratiaque apud Regni Ordines in magno Gentis Concilio, valebat pollebatque. Nuper verò etiam secretioribus suis consiliis, à maxima, neque minus omnium à retroactis Sæculis Reginarum, Anna, felicissima potentissimaque, admotus præpositusque; tum domi, tum foris, recti negotiorum agendorum Ordinis, atque administrationis Reipublicæ, prudentis, stabilis, adeoque in longum duraturæ, qualis demum olim apud Majores, Elisabetha Imperante fuerat; non equidem spem solummodò, sed certam quoque fiduciam præbet. Neque id tam mirandum, quum pri-
dem, atque initio, Literis tum communibus, tum reconditis, rerum multarum Usus, bonis semper
Ar-

Artibus, jam quoque plurimum experientiæ ad-
 cerit, ex utraque fortuna, pari cum æquitatis
 constantiæque laude exercita, inter tempora pri-
 mum ambigua; inde periculo plena, mox autem
 latiora, deinceps adversa multum, ad postremum
 verò plus sanè composita, & feliciora, attamen
 non rarè quoque, pro partium hinc inde studiis,
 paululum fluctuantia, acquisitum atque compara-
 tum: neque minùs reticendum, ut acerrimo quo-
 que Ingenio, (quod vix Unius inter veteres de-
 cus erat) mitis etiam sapientia accesserit. Quin
 id Reipublicæ, quin id & sibi benè vertat; ut sic
 tandem Nostra Britannia, sua Bona norit; sicque
 ipsi quoque, aliquo saltem modo, conveniat,
 Summi Vatis, illud, ad Optimum Principem scri-
 bentis,

Præfenti Tibi maturos largimur Honores.
 Vale ex ædibus meis Kal. Mar. 1709.

J O H A N N I

CLERICO. S.

AMSTELEDAMUM.

LX.

EX tuis præterito mense Amsteledami exaratis, Amplissime Clerice, lubens lætusque video, te & mei adhuc non immemorem esse, meque etiam nolle, Italosque nostros nescire, quæ & ipse, quæque alii trans Alpes, Laudatissimi Viri, quotidie erga publicum, atque in commune litterarum commodum facitis. Quod verò etiam editionem Prælectionum Academicarum Cl. Benedicti Averanii procuraveris, haud dixerim, utrum in eo, amicis communibus, Magliabechio, Salvini, cæterisque, an Scholæ Pisanae, an studiis quoque ipsis, de quibus Vir ille optimus simulque eruditissimus, neque rerum scientia, quam facundia clavior, non parùm meritis est, majorem gratiam retuleris. Et certè is erat, in quo nihil aliud sui culpandum habuerint, præter nimiam, noxiamque non rarò publico, atque studiis modestiam. Fidem dictis conciliabunt, quæ hic unà legas, neque nunc primùm in Amici gratiam.

X. com.

composita. Sed quod demum amplius atque illustrius, quam tuum de ipso, Vir Præstantissime, & tot monumentis ingenii in Orbem datis, & undequaque sparsis, Artis criticæ magister, testimonium Judiciumque dari possit, quo conjunxisse dicitur cum styli elegantia rerum quoque Delectum? Ea Aristotelis, ea Ciceronis, ea Grotii, Bignoniani, & innocentis admodum Triumviratus; neque adeo multorum, aut omni sæculo, Laus. Solum itaque nunc superest, ut opus ipsum quam emendatissimum, quale ab illo processerat, in manus hominum, atque ad Posterios deveniat; neque Typographorum errores, ipsis etiam Auditoribus, præsertim jam fato functis, summa quamvis injuria imputentur, aut lectoribus molestiam tædiumque afferant. Responsum quale mitto quæsit ex parte D. Deuaulx Liburno nuper ab Amico Anglo accepi, sed neque adhuc plenum, utpote in negotio, & ex natura rei, atque à diuturnitate temporis, ambiguo satis, & perplexo. Et ab litibus sanè ipse, ut à Bello abstinendum puto, nisi provocet necessitas: Dubius etenim illis, non minùs quam huic; nec semper qualis speratur, aut quandocunque velis, exitus datur. Damna interim utrinque certa, & si non, sanguinis, at sanè nummorum, quod multis vice sanguinis, aliquibus verò præ ipsa vita æstimatur, effusio. Vale. Flor. Apr. ult. 1709. JO.

JOHANNI JACOBO

SCHEUCHZERO: S.

LXI.

TUO certè latus ex munere, Amplissime jucundissimeque Scheuchzere, at toto demum perlecto volumine, admodùm lætior; quàm & doctum insuper & Lepidissimum, (quæ non semper unà conveniunt) mecum omnes libentèr agnoscent. Quam nova, quam mirabilia, in scenam introducis! Qui mutis quoque Piscibus, Vocem sermonemque das, & quasi loqui parùm fuisset, philosophantur quoque. Queruntur, in Foro postulant, vincunt; deque incredulis, deque Philosophorum sectis Placitisque, ipsorum Magistrorum sententiis, quam bellè Ludos faciunt, quamque veros non minùs, neque id semel, Triumphos agunt? At quid mirum, si mirabilia edant Pisces, in montium jugis, & intra ima Telluris viscera reperti? Si denique Alpes nunc demum eis Vice Oceani Fluviorumque sint; pro fluctibus, & undis Terræ strata, & metallorum sedes: quodque longè cætera excedit, par novo, atque inaudito hætenus Argumento, scriptor?

Marmore Homines, & coloribus rerum figuras expressimus; Manuumque nostrarum monumenta per quamplurima sæcula durarunt: sed quantum Artem, natura superat! Quid enim quæso ad Lucium Tuum, primi atque Ante Diluviani Orbis Incolam, vel ipsæ Pyramidum moles? Et non jam ille solummodò in mensa, atque Ferculis placet, confabulatur etiam nobiscum simul cum sociis; quique adeo, non tam inter Dapes amplius, quam inter convivas recensendi annumerandique; solumque displicet, quod tantus Orator, tam citò desinat. Vale. Flor. Maji vii. 1709.

PETRO HIERONYMO BARCELLINI. S.

LXII.

MUltò equidem Ipse satius duxi, Tuis, Præstantissime Barcelline, Factis, atque re ipsa, quam verbis respondere: præsertim cùm ultimum id in se susceperit, qui mihi illas detulerat, Doctrina, Moribus, & in utrumque officiis, utrique nostrum meritò acceptissimus, R. D. Theodorus Carli. Et ille heri quoque me pro solita sua be-
ni-

nignitate domi conveniens compellansque, certior
 rem reddidit de optima, Optimi Barcellini, valedi-
 tudine; quam ineunte prius anno, quam nunc
 ferè medio, quam omni denique tempore, Tibi
 ex animo constare optaverim. Gratulorque insu-
 per Tibi atque Urbi, jam partam Vobis Pacem,
 utinamque firmam illam, neque in ulla parte va-
 cillantem. Et fortè non longè quoque aberit illa,
 tamdiu exulans, ab Orbe Christiano, victoribus-
 que non minùs quam victis utilis, certè omnium
 votis expetita, ac forsitan duratura etiam, si non
 nimium properetur. Vobis sanè conveniebat, Pa-
 ceta citò concipi, citò impleri. Alter quasi enim
 ferè ad Portas Hannibal. Agitato verò tamdiu
 Orbe nostro, Tempore planè opus est, atque mo-
 ra quadam, ut subsidant iræ, & concilientur ani-
 mi, bonaque fide inimicæ dudum coalescant Gen-
 tes: neque tantum ut impræsentiarum quies resti-
 tuatur, sed & causæ etiam turbandi, atque ite-
 rum concutiendi totam Rempublicam: recidan-
 tur, & in quantum humana prudentia fieri pos-
 sit, in perpetuum, aut saltem in sæculum tollan-
 tur. Inde cætera inter bona securitas etiam stu-
 diis redibit Honosque. Non enim magis ultima
 Hyems Terræ Fructibus, quam Arma semper In-
 geniis obsunt nocentque. Parumque absuit, quin
 illa utrisque penitus exitia fuerint. Jam autem
 mi-

mitiorum temporum spes ubique affulget: At mihi nuper ex Helvetia missus ab Auctore Libellus, cui Titulus, Piscium Querelæ, & Vindiciæ; nova sanè atque læta, uti vides operi materia, qualeque minimè ex Alpibus certè quis expectaverit. Jam dies festi appropinquant, quum animum sacris peractis, paululum relaxare, atque jucundioribus etiam oblectare, adeoque & nostris quoque lusibus indulgere parumper, & vacare liceat. Ac mihi incivile equidem videbatur non paria quasi appellanti retulisse, atque provocanti, nec bono viro adeo conveniens, bonisque itidem Artibus faventi, officio non minùs quam ingenio cessisse. Vale. Florentiæ Pr. Id. Maji 1709.

PETRO HIERONYMO

B A R C E L L I N I. S.

LXIII.

CAve, Vir optime, ne nostros ex Helvetia pisces, inter Plinianos istos, in Aere quasi Volantes, aut in Alpium fortè summitatibus, ut tibi videtur, Natantes, recenseas: Hi etenim Scheuzeriani, ejusdem primò cum illis, sed multò
al-

altioris originis : Quippe qui inter metalla, marmora inter pretiosiora reperiuntur, omnes ad minimum Noachidæ fuerint, & Veteris Mundi Reliquiæ. Charta autem hæc, unâ cum eorum concione, pulchra quidem illa, erudita, atque admirabili, (ideoque non mutos in posterum, non Idiotas, cum plebe Philosophorum, cumque indocto vulgo, vocaveris.) Historiam quoque Gentis Arcanam exhibebit, & quæ cuique Patria olim, ac jam quoque sedes contigerit. Perlectam demum, neque hæc quoque delicias, credo, non parcus, non invidus, Amicis negabis, cum volueris, Florentiam remitte.

Quantum verò ad Pacem inter Gentes constituendam spectat, utque ita à Bello tam diuturno atque gravi, tota quasi Europa hinc inde decertans, emergat tandem ac liberetur, liceat regere, quod initio de Romana-Germanica nuper ipse dixeras, Pax est, & non est Pax. Daphnes sic quidem iterum renovatur fabula, & penè capra ex manibus elabitur præda. Vale. Florentiæ :
Kal. Jun. 1709.

J O H A N N I

C L E R I C O . S .

LXIV.

Recte admodum sentis, Vir amplissime, nihil mihi unquam gratus accidere posse, quam occasionem nancisci, atque utinam sæpius, quum non aliud in publicum conferre queam, exprimendæ saltem optimæ erga literas, atque Litteratos voluntatis, & insuper cultus mei, ipsum præferim erga Clericum, summi perpetuique. Inde igitur læto equidem vultu animoque acceptis relectisque literis, à Te modò Amsteledami datis; Magnum Etruriæ Ducem, Amici cujusdam, interioris admissionis, interventu, certiolem reddidi, quid Batavi Eruditi, quid ipsa Jurisprudentia, quid Universa demum Respublica Litteraria, non minùs in sui atque Medicei nominis Gloriam, quam & in publica etiam commoda ab ipso postulaverint, atque ut ita dixerim, à solita optimi Principis benignitate quodammodò expectaverint quoque, ex nova & accuratiùs repetita collatione Pandectarum, cum illo longè omnium nobilissimo, si non & Autographo etiam, à Justiniano

Im-

Imperatore pridem, seu in illam Italiæ partem, quæ magna antiquitùs Græcia dicebatur, seu in proximum Italiæ Illyricum, transmissio, Mediceo Codice. Atque eodem certè animo à Serenissimo Cosmo exceptum, quo majores sui olim, quo & ipse jamdudum, eorundem semper premens vestigia, cuncta præstare solet, quæ ad studia promovenda, ad utilitates publicas spectent: unde satis abundèque Orbi constabit Bibliothecam Mediceam, non tam Principum, atque Florentiæ, propriam, quam toti Europæ, atque Doctis denique omnibus omniumque Gentium fore communem. Iter ergo ingrediatur, Florentiamque accedat, cum illi vobisque commodum videbitur, seque Operi demum accingat maximo præstantissimoque, inque ultima sæcula sub Cosmi Tertii auspiciis ituro, Brenemannus Vestras, securus in hac parte Indulgentiæ Gratiæque Principis, sicque prodeant tandem, cedantque deinceps in usus Jurisconsultorum, veræque sapientiæ, cum Ulpiano, Professorum, novo Ordine, suoque demum, Papiniani, Paulique, cæterique Veteres, Legum, Artiumque verè Romanarum, Magistri, non uti priùs, quasi solummodo Torti, & indignè, parum docto, ac barbaro poenè sæculo habiti; discerpti quippe, ac malè multati, à Græculis illis, aut Imperitis, aut Malevolis, atque ad ferendas per-

petuandasque Lites, & ad Lucra ex Incertis Ambiguisque captanda, quam formandæ Jurisprudentiæ Universalī, adeoque Humani Generis, omniumque quasi Populorum usibus accommodatæ, (consentientibus etiam Bonis, atque Eruditis quamplurimis) multò equidem aptioribus. Hi sanè novi Byzantini Quirites, non minùs à Prudentia, quam ab Eloquentia Veterum, descivisse ac degenerasse videntur. Quam verò juvabit, post tanta sæculorum intervalla, lacera dudum membra, corpori iterum, pristina unà cum Anima spirituque, reddita contueri, Menteque, molem indui? atque ita exinde in integrum, quantum per tot vulnera, atque Ævi injurias fieri possit, quasi restituto, ordinem, compagem, Lumen denique redire suum? Sicque quadantenùs, non tantùm jurisprudentiam, qualis pro dignitate esse debuerat; sed & Juris quoque simul Historiam ex Factis, & Controversiis qualibet Ætate Ortis, & juxta seriem temporis dispositis (uti ipse optime observas) longè quam antea plenior, perfectiorque, qualis reverà fuerat, nunc demum possiliminio, ut forensi more loquar, per vos Batavos, Florentes olim Imperio Romanorum Socios, jamque studiorum eorundem Adiutores, ad extremum adispici. Id hætenus inter immensos aliorum labores, Juri perficiendo defuit, atqui postremò in
De-

decus atque laudem, Initi modò sæculi nostro-
rumque temporum, servatum, cessururumque.

Interim mihi credo brevi, at spero tamen,
non ante Hyemem exactam, aut Pacem Orbi
Christiano, si votis sit locus, restitutam redditam-
que, relinquenda multum meritò dilecta Floren-
tia, atque Italiæ Amœnitates, ad exercendum in
Patria Munus, mihi nuper à Domina mea Cle-
mentissima collatum; ut ita per Gallias iter susci-
piam, si quietem senex Ludovicus, quam Bellum
amplius trahere malit; at si, ut ita dicam, Fatis
urgentibus, tantos post motus, & Tumultus un-
dique, Europam nondum componi, neque in fu-
turum quiescere securè dabitur; grande certè pre-
tium itineris, deflectendo iterum per Germanias,
& salutato Clerico, cæterisque apud Batavos Do-
ctissimis Amicissimisque Viris, laturus. Vale.
Florentiæ iij. Non. Sept. 1709.

PETRO HIERONYMO

BARCELLINI, S.

LXV.

Juvenis ille Burnetus, quem meritò laudas, optime Barcelline, ut bonis Artibus, ita bonis etiam Moribus instructissimus est: Inde ergo aegrè quidem me pridem habuit illum febris in Urbe laborasse: Tu vero tandem recreabis, reficiesque jam lecto levatum, ac viribus restitutum, tua consuetudine sermonibusque. Tu novæ cultum, Tu veteris illi ruinas Urbis Dominæ monstrabis: doctas inter delicias, inter antiquitates Romæ versanti, non pristini doloris, non meminisse ægritudinis vacabit. Securus interim ab erroribus, quibus obnoxii ferè semper peregrè euntes, quod & nuper Ficoronus noster magno exemplo docuit, dum Te Duce lustrabit vanescentia diu vestigia æternæ, quæ dicebatur Urbis, reliquiasque magnitudinis, atque Artium, Imperantis olim Populi id expertus loquor, summæ Eruditionis, atque summæ unà Comitatis Barcellini, cum in Urbe præterito modò anno, maxima cum animi voluptate, neque minori studiorum fructu ver-
sa-

farer, & alibi quoque, atque per plures annos, sanè in perpetuum memor futurus, seu me diutius Florentia, deliciae meae teneant; seu Patriae tandem, & Patriae quoque hinc discedens, invitus reddar. Dumque hic apud nos suavissimus adolescens manebat, eruditissimis certè Viris, scis ipse, quot quantique in hoc Domicilio Musarum Etruscarum in omni Literarum genere floreant, acceptissimus erat: Neque Gratiae quicquam praesto, licet Ipsi sequentis elegantissimi Epigrammatis debitor fuerim.

Alter Neutonus docuit quid corpora possint,

Ast animi Vires qui docet, alter adest.

Illum comitatur etiam, scriptis Clarissimus, Massonius, cui Roma multum olim debuit, pro suo Horatio, Ovidio, Plinioque, quos nova vita, atque luce donavit; nunc & ipse multum quoque Romae debiturus, quod ibi Barcellinum viderit noveritque, suum meumque. Vale. Florentiae
iij. Non. Sept. 1709.

ALPHESIBOEO CARIO

ARCADIÆ CUSTODI,

ARGESTES MELICHIUS ARCAS,

*Apollinem, atque Musas omnes faventes, atque
propitias precatur.*

LXVI.

C Armen nuper, ab Argeste vestro Melichio, ad Arni ripas compositum, quo nullum latius Flumen feliciusque irrigat fecundatque Arcadiæ solum, adeoque non sanè vobis, aut alienum penitus, aut prorsus indignum, præsertim quum & de præstantissimis, qui magno certè numero, & amplissimis latifundiis ea regione habitant, Pastoribus, deque antiqua etiam Evandri Urbe, capite adhuc ac sede populorum primaria; quamque nunc iterum, sub Alnano Melleo summo Pastorum Principe, feliciore fato Arcades obtinent occupantque, etiam agat, in officii simul ac gratitudinis testimonium, atque pignus perpetuum, Alphesibœo Cario, cui proxime post Principem ipsa Respublica, Gentis secreta, Acta, & Historia optimè creduntur, & summa fide ac felicitate administrantur, munus equidem exiguum mitto, quodque multò magis, meritòque displicet doletque.

Nec

Nec Musis, nec Apolline dignum; planèque
 impar Vobis, qui Musis ac Vatribus pro Imperio,
 & dignitate cunètis quin etiam volentibus præsi-
 detis. Id equidem dedi summo affectui, summo
 quin itidem dolori: inde ergo tantummodò æsti-
 mandum erit; inde verum, si quod illi compe-
 rat, unicumque pretium; cùm ea propter, in eo-
 dem, nec eloquentia, neque Ars, ullas sibi partes
 vindicare potuerit: Scitis id olim quoque Ovidio
 vestro, ab Italia etiam Exulanti, accidisse, neque
 tamen minùs tristitia sua, pietatis saltem in Pa-
 triam, si non ingenii nomine; & suæ ætatis homi-
 nibus, & sequentium, placuisse. Vale ex floren-
 tissima totius Arcadiæ Colonia, Veteres prope
 Fesulas, quarto, post relatos ex Sylva Parrhasia
 Codicillos.

CLARISSIMO, DOCTISSIMOQUE VIRO

HENRICO NEVVTON

Serenissimæ Regiæ Magnæ Britanniae
in Etruria Ablegato

ANTONIUS MARIA SALVINUS.

LXVII.

PLacent, imò perplacent versus Eligiaci tui, quos prope Arni ripas enthec quodam calore fudisti. Pleni leporum, gratiarum, amœnitatum. Animi tui pulchritudinem, magnitudinemque graphicè exprimunt, ac repræsentant; qui tam humaniter erga nos nostraque affectus es, ut summis laudibus in Coelum vehas, & stylo tuo immortalitate dignissimo, ea consecres ad memoriam seculorum sempiternam. Habet certe quo honestè superbiat Florentia, pulchriorque sibi, ac præclarius videatur tantum Virum nacta laudatorem. Ego vero, qui minimus, atque humillimus inter cultores tui nominis sum; egregia commendatione versuum tuorum, quibus ne mirifice augere, atque ornare voluisti, videor mihi esse pulcherrimus ac beatissimus; Fortis Eloquio, qualem
me

me prædicas, esse vellem, ut præclara ingenii tui, animique decora, qualia revera sunt, sub oculis ponerem, & non interituris scriptis posteritati commendarem. Interim, quod impræsentiarum possum, gratias humanitati tuæ, maximas atque immortales habeo, atque ago pro proluxa tua erga me voluntate, ac benevolentia, qua me prosequi amas; Nihil enim in me aliud, quod hæc tua beneficia promereatur, ac provocet video, quam quod Tui Tuorumque similitum, Musarum scilicet sacerdotum, cultorem atque amatorem me maximum esse profiteor. Vale ex ædibus nostris. v. Id. Oct. 1709.

PETRO HIERONYMO

B A R C E L L I N I. S.

LXVIII.

Nobili Anglo, imò nobilissimo, D. Carolo Beaufortio, hinc nimum propter, si nos solos spectemus, atque ex suavissima consuetudine, commoda ac voluptatem, discedenti; Romanamque versus, quæ ut Flumina Oceanus, cunctos ad se undique trahit, excipitque volentes, cras ituro; carmen rarius adhuc, imperfectum

Z

sanè

sanè & impositum, sed quale mæsto, atque ploranti conveniat, brevique fortè Italiæ atque unà Musis valedicturo, munus Barcellino meo, exiguum certè, soloque in Vos cultu conspicuum; ac quasi donationem Mortis causa inter Vivos, seu Legatum potiùs, paulo ante legitimum tempus repræsentatum, ut solito denuo, atque forensi more loquar, in manus tradidi consignavique. In cujus quoque complementum, utque eo nomine magis gratum acceptumque sit, addidi alterum posthumumque Volumen Orationum, summi nuper Viri, summique Amici, Benedicti Averanii; quæ forte Judicio, Copia, Majestate, proximè ad Tullianas vestras accedunt; in quantum Academia, Fori vices subire possit; & in umbra scriptæ, atque pulvere scholastico, æmulari valeant illas, in Senatu Orbis Domino, & coram Quiritibus Populoque, eo tempore, ipsius quoque Senatus Domino, habitas. Sed diù est, ex quo desit veteris eloquentiæ regnum, quum omnia, una potuit; nunc verò satis est, nostri ævi disertis placuisse, quos hodie non tam frequentes reperias, extra Doctorum Cœtus, atque Academiæ spatia; exclusa sanè jampridem Foro, Aula, & fermè Publico quoque, latina Facundia; atque ita sæpiùs in manus adolescentium, quod benè rei Literariæ saltem vertat, & for-

fortè nonnunquam etiam eorum, quorum ideo non magna est copia, quibus hæc innocentia magis, placida, mitiaque arrident studia, cum innoxia voluptate venire. Certè carmine vincimus, & licet iudex fuerit ipse, inque eo genere de se quoque benè sentiens, Etrusco multùm cedit Romanus, simul cum eis etiam, quod non immeritò, in non minima parte ipsius felicitatis pono, neque tibi minùs, seu Pietatis, seu Eloquentiæ ratione placebit, leges concionem, hodiernæ ac Etruscæ facundiæ specimen exemplumque, in illa Academia nobilissima, publico decreto, ab Antonio Maria Salvino, summa utriusque laudati viri, laudantisque cum admiratione, cœtusque frequentissimi illustrissimique plausu, habitam exceptamque. Interfui & ipse, inter dolorem gaudiumque medius, illinc ob Amicum, acerba adeo atque præmatura morte interceptum, hinc autem victurum eidem Nomen perpetuumque, ex iusta, pia, ac erudita laudatione expectans, auguransque; quam nunc quoque ex cunctorum voto in publicum datam, quasi novam, recentem, neque priùs auditam cognitamque, iterum lego, relegoque; & spondeo quoque idem & Tibi, atque aliis eventurum, quum quod optimum reverà sit, non possit non semper, atque omnibus placere. Vale.

Florentiæ. xiiij. Kal. Nov. 1709.

G I S B E R T O

C U P E R O. S. D.

LXIX.

Litteras, Illustrissime Cupere, tuas Daventriæ 20. Augusti datas, ab ipsa demum Roma, medio ferè Octobri, hic Florentiæ communibus sanè amicis, mihiq̃ue omnimodò gratissimas, accepi. Quantum autem ad Orosium spectat, non poterit non plurimum placere doctis in hac Urbe viris nova editio, non solum quod locupletior multo perfectiorque futura sit ex suo Laurentiano codice; quamquod etiam in se, curam ejusdem Cl. susceperit Clericus, a quo non nisi optima expectamus omnes. Sed de Ormesta nihil in manuscripto legitur, aut ab aliis hic scitur, quos inter eruditissimum Salvinum consului; at cunctos latere videntur incognitæ, ac barbaræ vocis Origo, & sensus: nisi fortè pridem, juxta Cl. Salvinum, scriptum fuerit, Orosii Magna Historia; sed sicut ipse dicit, ariolari est.

VVasius ille meus, Terentii Comœdias, à se cum plurimis manuscriptis fidelitèr collatas, suisque notis, commentariisque plenioribus auctas,
ede-

edere parabat, sed nescio quo casu, totum intercidit opus, ne vestigiis quidem, inter chartas, tanti laboris relictis. Dignus sanè is erat, qui pro amore suo, cultuque in litteras humaniores, æquiore felicioreque sorte, ac fortuna uteretur; sed neque tamen inter infimæ notæ munera, illud quod Oxonii sustinuit, refertur; cum qui eo gaudeat, unà Academia celeberrimæ Architypographus audiat, atque paulo ante ipsam, Samuel Clericus, Vir orientalibus litteris, atque amœnioribus quoque instructissimus, prout Biblia Polyglotta, & alia ejus Opera testantur, summa cum fama ac laude, eodem munereungebatur.

Hic equidem pauca in litteris aguntur; defunt Mæcenates quippe plerunque, & Patroni, quique vestris in partibus, quasi vicē Patronorum sunt, ipsi quoque Bibliopolæ, quorum impensis curaue Eruditorum Opera in sæculi lucem, & in manus hominum veniant. Argumento esse possunt Benedicti Averanii Prælectiones Pisanz, quæ Amsteledami jamdiu Obstetricem manum expectavere. Infelix interim Italia quæ sibi, suisque commodis, ac laudibus ita non raro deficit. Vos Batavi olim auxilia misistis veteri Imperio, nunc Italorum etiam studiis: ita socii de illis benèmeriti in omni tempore, sive Armis, sive Artibus insistendum fuerit. Sed suis litteris frater
de-

defuncti, quæ sint ipsius, quæ publicà quoque vota, melius explicabit. Interim illas in antecessum misi, quum unà mihi alterius orationes posthumæ defererentur, quæ mari quandocumque opportunum videbitur, ad vos deferentur, eloquentiæ hodiernæ, at Veteris optimæque instar, non ignobile monumentum. Vale. Florentiæ. xiv. Kal. Dec. 1709.



EXCELLENTISS., ATQUE ILLUSTRISS. DOMINO,
HENRICO NEVVTON,

Serenissimæ Britanniarum Reginae ad Celsissimum
 Etruriæ Principem Legato. S.

EXCELLENTISS., ATQUE ILLUSTRISS. DOMINE.

LXX.

QUI inter ardua Reipublicæ negotia bonis
 unâ literis inservire satagis; hisce S. Ignatii
 reliquiis vacare ne recuses, quæ tua potissimum
 ope in publicum jam prodeunt. Pro Tuis, Vir
 Illustrissime, in rem litterariam beneficiis gratias
 per me agit Bibliotheca Bodleiana, quæ inter pre-
 tiosa veterum Scriptorum monumenta Manuscrip-
 tum à Te donatum gratissimè conservat. Si quid
 Illa habeat Tuis studiis quoquo modo profuturum,
 Id Tibi perlubenter offert, minimè dubitans, quin
 novam indies daturus sis gratitudini materiam.

Excellentiæ Vestræ

Æd. Chr. Oxon. Cal.

Jan. A. D. 170 $\frac{8}{9}$.

Cultor. Humillimus
 Carolus Aldrich.

AM-

AMPLISSIMO DOCTISSIMO VIRO

CAROLO ALDRICH.

HENRICUS NEVVTON. S. P. D.

LXXI.

MUltum equidem Oxoniensi Academiae debeo, si qua mei, Alumni olim fui, adhuc inter ipsos, memoria maneat superstes; neque Tibi quoque parum, Vir praestantissime, qui eandem, Epistolarum editione denuo renovaveris; Literisque demum tuis, adeo in me benevolis, honorificis adeo, plurimum etiam auxeris. Atque illarum sane, quod unicum mihi superest Exemplar, Romam brevi transmittam, ut & Vaticanae, post Mediceam, Bibliothecae, fiant accessio, neque minus grata, quam utilis. Atque utinam ipse aliquid, pro officio conferre valeam, in usus, vel ornamenta, nostrae etiam Bodleianae, quod indicio testimonioque esse poterit, cultus mei obsequiique sinceri perpetuique, Vos erga, atque simul in Britannia Literarum studia; de quibus cum apud Exteros, ut saepius accidit, sermo oritur, unum ferme intelligitur, unum solummodo nominatur Oxonium. Vale. Florentiae iij. Non. Dec. 1709.

JO-

J O H A N N I

CLERICO. S.

LXXII.

EX Brenemanni vestri, Juvenis, cùm multa eruditione, tum facillimis moribus præditi, literis, non illibentèr scio, percipies, vir præstantissime, simul ipsius in hanc urbem adventum, quamque comiter deinceps ac benignè, ab optimo Principe admissus receptusque fuerit. Quoad libros sanè, & doctrinæ monumenta, & intra & extra Italiam peccatur, vitio fortè Bibliopolarum utrinque: nam apud vos æstimantur admodùm Italorum ingenia; & quæ certè apud Batavos quotidie eduntur, non tam elegantia characterum typorumque, (quæ summa est) quam varietate argumentorum, quam utilitate operum, præstant placentque. Hæc omnia quidem nobis, saltem optima, compendiò exhibet Bibliotheca Selecta; cui Ficoronus, Roma etiam sua plaudente, cumque ipsa, cunctis eidem, atque rei Antiquariæ benè volentibus, inseri gaudebit; quaque mihi etiam huc ab Amstelledamo, sed semel in anno, atque sæpè tardiùs advecta, Transalpinæ nostræ

eruditionis, apud communes amicos, Indicis partes lætus ago. Munus demum tuum, Menandri ac Philemonis reliquias; (sed heu Græcorum, recentiorum verò, piis fraudibus, doloque malo, reliquias tantùm!) legere avidiùs incipienti, intervenit Illustrissimus Antonius noster Magliabechius, & secum abstulit: brevis equidem illa interposita meis deliciis, sed non & inutilis ideo, publicam in rem, & studiis, mora; quum nihil poenè intersit, ab ipso ille, an à cunctis fermè aliis per urbem eruditis legantur; ea est viro memoria, ea cum litteratis omnibus consuetudo. Brevi quoque ad magnum se opus accinget Brenemannus, comite laborum optimo Salvino: ut ita in posterum, non ut antea, Centones solùm Tribonianos, sed ipsa Jurisconsultorum scripta atque opera, verèque Civilem, Romanamque sapientiam, non à Græculis Byzantinis interpolatam adeo, miserèque in hunc usque diem vexatam, lectoribus bona fide repræsentet. Interim spem etiam das, prioribus litteris, postremisque heri redditis, quibus Italos, Majorum laudibus ad patria faciendam, accendis excitasque, legendi Orosium novo ineunte anno; quem Cl. Clerico, atque inde bonis litteris, studiisque communibus, faustum precor, atque felicem. Vale. Florentiæ. Prid. Æræ Christi. 1709.

ILLUSTRISSIMO VIRO

DOMINO HENRICO

A NOVA VILLA

SERENISSIMÆ REGINE BRITANNIÆ ABLEGATO
EXTRAORDINARIO.

S. P. D.

A C A R N A N.

LXXIII.

R Ecepisti Vir Magne, affectu haud vulgari
 Piscium querelas, & vindicias, admisisti
 miutos suorum Jurium defensores intra Musei Tui
 Limina, imò quod, magis est, in causa eorum
 judicasti. Tribuo multum impenso Tuo, erga
 literas favori, multum subactò Tuo judicio; pa-
 rùm fortè tædio, quod novorum undique affluen-
 tium, & nil nisi incostantem ævi hujus conditio-
 nem monstrantium mole obruto Tibi suboritur,
 quod ex veteri Mundo nova adedè facilè admittis.
 Accipe nunc Illustrissime Nevvtone, aliud hujus
 genetis, quidem opusculum vegetabilia spectans,
 quorum defensionem ipse in me suscepi. Accipe,
 lege, Judica, & Auctorem porrò ama. Tiguri
 d. 8. Jan. 1710. A a 2 JO.

JOHANNI JACOBO

SCHEUCHZERO. S.

LXXIV.

Herbarium tuum Diluvianum, & titulo ac opere speciosum, Vir præstantissime, nuper Mediolano excepi, Querelis Vindiciisque Piscium, re ipsa, atque argumento, pænè coævum; par sane eruditione, & Figurarum Iconumque varietate ac elegantia, neque certè minori, me quidem erga, eruditissimi Auctoris benignitate comitateque. Volebam quoque & ipse pridem ex Magni Ducis opibus aliquid etiam conferre, sed dum longiùs trahebatur negotium, sentio doleoque admodùm, jam tempora agendi præterisse, unàque modum, referendi gratiam muneri tuo, optimum, Tibique etiam, ut ex tuis postremis, optatum; adeoque utrique nostrum, ex æquo, summeque placiturum. Interim verò, quod unum superarat, Exemplar alterum, quo Famæ Auctoris, atque operis utilitati, latius spargendis, simulque commodis ex vera Philosophia provenienti- bus, consuleretur, in manus tradidi Comitis Magalotti.

Unius

*Unius insedit pectus cui totus Apollo,
Et sapere, & fari, magno concessit Alumno,
Consiliisque simul Regum, studiisque praeesse.*

Quique omnium primus, præterito sæculo, in lucem & publicos usus, neque minùs in exemplum suo ævo ac futuris; acta & observationes, circa res Naturales, Academix hic quoque Leopoldinx, quæ Vulgo audit *Del Cimento*, protulit ediditque: à qua demum postea, Celeberrimæ illæ Academix Regiæ, Londini, Luterix Parisiorum, ac Berolini, (quarum prima, ultimæque, Socio Scheuchzero, sive suo Acharnane, gaudent superbiuntque) quasi à fonte suo derivabantur, ut ab Homero, Vates. Pergas igitur, ut incæpisti, Vir Magne, Mundi nostri origines, ex Reliquiis prioris, fractique Orbis, investigare feliciter demonstrareque, Religionem cum Philosophia conciliando, alteramque alteram confirmando, illustrandoque. Idque omne, stylo, pro more, amœno gratoque condire, sic Eloquentiæ litando: & quid majus, utiliusque, quam, simul, & jucunda, & idonea dicere vita? Vale?
Flor. xv. Kal. Mar. 1710.

PETRO HIERONYMO

BARCELLINI, S.

LXXV.

PArùm interest, ut ex tuis, Optime Barcelline
 nimium liquet, utrum quis senex fuerit, an
 Juvenis, quum utrinque amici nostri ex orbe,
 atque Turba discedunt, nisi quod accedens primis
 annis, & quodam ætatis vere florentibus fatum,
 paulò acerbius quodammodo, & tantum non
 præcipitatum esse videatur; & præsertim nup-
 rum Nobilissimi Caroli Beaufortii, seu non illud
 prius prævisum, adeoque dilatum à medicis, seu
 quod vere dolendum, quodque simul indignatio-
 nem cunctis movere possit, intempestivis noxiis-
 que remediis, acceleratum, potius atque accersi-
 tum fuerit. Quod quæso quid aliud est, quam
 Virgilianum illud in medium proferre?

Ferrumque armare veneno.

Disputatum olim, utrum à morbis, an à Medicis
 plures interierint, & à partibus Medicorum erat
 Rex Carolus Secundus, qui cum Londini deces-
 serat Medicus, & Arte, & Scriptis celeberrimus
 VVillisus, atque eodem forte tempore decre-
 scant

bant in Urbe funera, id ipse in argumentum suæ sententiæ trahebat. Propriæ sunt quidem nonnunquam Artes Urbibus, quibus aliæ alias superant: an autem Roma illa medendi unquam præstiterit, non quæro. Veteres unum memorant Celsum, Vos nunc Lancisium jactitatis. Te vero interim, Mi Amice carissime iis esse viribus, ea salute frui optarim, ut Tibi nequaquam Medico, vel medicina opus fuerit. Vale. Flor. xv. Kal. Apr. 1710.

G I S B E R T O

C U P E R O. S.

LXXVI.

Literas medio ferè Januario à Te scriptas, Vir Illustrissime præstantissimeque, & ipse, & optimus senex Antonius, nostri simul atque status apud vos Literarii, memores; lubenter equidem legimus, aliosque deinceps amicos communis nobiscum voluptatis compotes quoque fecimus. Ficoronus nuper scripsit, se brevi opus suum, in Bataviam Tibi transmissurum, partem verò ejus extremam, in qua sua inserit (ut in altera, quæ
in

in Monfalconio displicuerunt) ipse in dies Roma aduectam, à Liburno expecto. Interim ab Urbe accepi, Museum Kircherianum, seu potius Bonannianum, ab ipso Patre Bonanno editum, plenum sane figuris elegantioribus, partim ad rem antiquariam, partim ad res naturales, spectantibus. Sed oh quam nostra hic supellex Medicea, Romanam illam, & numero, & magnificentia axcederet, neque minùs fortè, quam Palatia Principum, Civium ædes; parùm quoque abest, quin dixerò, quam vel Roma Vetus, & Tua Romam Hodiernam! Sed læntè procedit opus, ut semper fermè publica, ferè instar Laurentiani Mausolei, quod aliud forsitan sæculum requireret, antequam ritè absolvi, dedicarique possit. Sed non sunt omnia à nobis anticipanda, relinquendum, & aliquid industriæ ac voluptatibus posterorum. Interea vero cùm Pax cunctis optata, grataque advenit, quæque in propinquo esse dicitur, videbimus etiam, an qui tantum armis nuper præstiterint, paria non etiam postea facturi sint in Literis. Gallica, & Civilia Bella, (qualia sunt inter verè Christianos omnia) Tempora Augusti sequebantur : atque eadem Ætas, fortissimos tulit Heroum, & clarissima Mundi Ingenia. Vale. Florentiæ. xv. Kal. Apr. 1710.

NOBILISSIMO, ATQUE ERUDITISSIMO VIRO

HENRICO NEVVTON

POTENTISSIMÆ ANGLORUM REGINÆ,

*Apud Regiam-Celsitudinem COSMI III. M. Ducis Etruriæ,
nec non apud Serenissimam Genuesium Rempubicam,*

A B L E G A T O.

GUIDO GRANDUS FELICITATEM.

LXXVII.

INcredibile sciendi desiderium, & inexplabilem,
abstrusa quæque, magisque profunda riman-
di, cupiditatem humanæ menti summus Naturæ
Conditor indidit, ut ad Auctoris sui cognitio-
nem, non solum officii sui debito sollicitante,
gratique etiam amoris stimulo urgente, sed am-
plius objecti ipsius sublimitate ineffabili invitante,
quodammodò excitaretur. Huic genio præ omni-
bus indulgentes, imò fræna laxantes, acutissimi,
ac præstantissimi Mathematici, assiduo, & ope-
roso studio in id maximè incubuerunt, ut ordine
perspicuo rationis suæ vim gradatim promoven-
tes, ex primis, planissimis, ac cuilibet faciliè obviis
veritatibus, quarum notitiam ab ipso Deo Opt.

Bb

Max.

Max. nostris animis insertam accepimus, ad alias magis arduas detegendas sibi viam munirent, eo successu, quem pauci licet pro merito intelligant, plerique tamen in dies sentiunt, & omnes jure mirantur. Nam, ut cetera omittam admiranda Theoremata, quæ se ab ipsis Geometriæ nascentis exordiis prodiderunt, velut de æqualibus triangulis, & parallelogrammis in eadem basi, atque in iisdem parallelis, ad quàmlibet dissitum interval- lum obliquè excurrentibus: de spatiis quantumvis exiguis ad quamvis lineam applicandis, adeoque ad perimetrum majorem quolibet dato redigendis &c., quæ nunc, ut nugæ, & crepundia ætatis illius despiciamus: manet adhuc inconcussa adversus omnem reluctantis imaginationis conatum, adversus inanes Scepticorum cavillationes, & Pseudophilosophorum impetus, priscis olim temporibus demonstrata, cujusvis magnitudinis infinita Divisibilitas: manet tam certa, & evidens, quàm adhuc intellectui nostro incomprehensibilis, quæ ante omnem hominum memoriam olim detecta fuit, nonnullarum quantitatum Incommensurabilitas, quam si quis ignoraret, hunc non hominem, sed pecudem potius dicendum Plato censebat: manet adhuc numquam non celebranda, æquè ac semper stupenda illa Asymptotorum affectio, quam, adolescente jam Geometria, Conici Scri-

Scriptores deprehenderunt, nunc autem Mathematici recentiores, non ad unam, aut alteram curvam, Hyperbolam scilicet Apollonii, & Conchoidem Nicomedis, dumtaxat restringi, sed innumeris prorsus novis lineis facillimæ descriptionis, nonnullis etiam antiquis eadem lege continuatis, ut Nicostrati Quadratici, & Dioclis Cissoïdi, convenire demonstrarunt. Verùm hæc nulla sunt, si cum illa felici non minùs, quàm audaci Geometriæ, virilitatem suam jam adeptæ, aggreffione conferantur, qua scilicet innumeros terminos in unam summam finitam colligere, immensæ longitudinis solida, & superficies, terminatæ, ac undique circumscriptæ sui generis areæ coequare, infinitarum quantitatum proportionem, & gradus distinguere, & infinitè parva magnitudinum elementa reperire, atque in varias classes distribuere docuit. Neque verò ad sterilem, & otiosam dumtaxat speculationem hæc pertinere, non etiam externis hominum usibus, quibus civilis vita maximè indiget, inservire quis arbitretur: nulla quippe adeò abstracta, & ab omni materiæ commercio remota cognitio in Geometricis assignari potest, cui vel nunc, vel aliquando, fructus aliquis ex his, quæ apud vulgus in pretio esse solent, non sit referendus, sive inde per se ipsum pendeat, sive mediis aliis notiis ejusdem, aut al-

terius Scientiæ, quam prior illa cognitio perfece-
 rit. Profundioribus utique Geometriæ speculatio-
 nibus, & abstrusioribus Analyticæ Calculis, tum
 Mechanicam, tum Opticam, tum Astronomiam,
 tum Nauticam, tum Geographiam, tum Archi-
 tecturam, ac cæteras denique Scientias, & Artes,
 Reipublicæ commodis, & utilitatibus prospicien-
 tes, auctas hodie, locupletatas, & ad faciliorem
 methodum redactas accepimus, novisque semper
 incrementis, recentiorum Mathematicorum bene-
 ficio, magis ac magis in dies perficiendas spera-
 mus. Quocirca summa sollicitudine omnino cu-
 randum est, ut profundiores Geometrarum Theo-
 riæ, quas perse jucundissimas, & de universo ho-
 minum genere tam benè mērentes experimur, assi-
 duè promoveantur, habitoque inter veras, &
 (siquæ irrepsērint) falsas delectu, his confutatis
 confirmentur illæ, atque ab objectis fortasse scru-
 pulis vindicentur. Hinc, cūm Clarissimi, inter
 præcipuos inclytæ Nationis tuæ Mathematicos,
 Joannis VVallisii PLUSQUAM-INFINITA spa-
 tia, quæ primus ipse inter hyperbolas infinitas al-
 tioris ordinis, summa cum omnium admiratione,
 detexit, à nonnullis Regiæ Parisiensis Academiæ
 Geometris nuper in dubium vocari, tum apertè
 rejici animadverterem, operæ pretium facturum
 me existimavi, si rem totam [quæ maximi est in
 scien-

scientiis nostris momenti, ob connexionem, quam cum methodo recentiorum Analyſtarum Scientia hæc Infiniti ſortitur] iterum examini ſubjicerem, & ad lydium Geometriæ lapidem exigerem, de tam celebri controverſia deliberaturus : cùmque VValliſi veſtri partibus multiplex ab ipſa veritate ſuffragium accedere deprehendiſſem, irrogatam Viro graviffimo injuriam propulſandam, inultam immortalì ejus Nomini labem abſtergendam, ejusque doctrinam ab omni fallaciæ ſuſpitione hoc libello purgandam, Te potiſſimùm hortatore, conſtitui. Novos addidit operi ſtimulos ipſamet Illuſtriſſima Regalis Societas, à Sereniſſimo Rege Carolo II. ad naturales Scientias promovendas fundata, dum me, obſcurum, ac peregrinum hominem, inter ſocios ſuos ultrò conſcribendum cenſuit, meaſque, in Armachani Præſulis ſyſtema ſonorum, ſpeculationes, Illuſtriſſimo Præſide Iſaac Nevvtono Equite aurato, Mathematicorum noſtri ſæculi Principe, necnon Doctiſſimo Haulxo, in Univerſitate Oxoniënſi Profeſſore Aſtronomiæ Saviliano, ſummè probantibus, ejusdem Academiæ actis inferi, & inter philoſophicas Tranſactiones edi mandavit : cui quidem honori, ut aliqua ex parte me gratum oſtenderem, nihil opportunius, & huic propoſito accomodatius occurrit, quàm ſi prælaudati VValliſi, qui Regiam ipſam Societa-

tem

tem tantoperè illustravit, famam ab illata calumnia defendendam hac Geometrica Disquisitione susceperem, quam, meo nomine, eidem Amplissimo Academicorum Cœtui communicandam, Tibi offero, Vir Illustrissime, atque Eruditissime, ut mei simul erga Te obsequii monumentum aliquod apud posteros maneat, nulla temporis injuria intercidendum. Nihil attinet, ut in Virtutum tuarum, hoc qualecunque venerationis testimonium suo veluti jure exigentium, uberrimum campum excurrere orationem meam permittam, cum ipso etenim præsentis Tractatus titulo amplissimi hujus argumenti fecunditas decertaret, meque in spatia PLUSQUAM-INFINITA laudum tuarum abduceret, ac dolorem denique nostrum, ex imminentis jacturæ timore conceptum refricaret, dùm à Prudentissima Regina, meritorum tuorum sat conscia, eximiis honoribus auctus in Patriam revocaris, omnium, quibus Eruditio, Doctrina, Facundia, Elegantia tua, cum summa Humanitate conjuncta, perspecta est, amorem tecum, & desideria simul asportaturus. Unum igitur superest, ut Te, qua licet fiducia, supplex exorem, ad libellum hunc benigna, qua soles, fronte excipiendum, ejusque Auctori, quibus ipsum dignaris, benevolentiae, & gratiae tuæ officia jugiter continuanda. Vale. Pisis, Pridie Kal. Februarii 1710.

CON-

CONSTANTINO

RONCAGLIA. S.

LUCAM.

LXXVIII.

Quam humanitate tua Reverendissime, & Illustrissime Domine, obstrictus teneor, quam neque pluribus curis, neque doloribus ex morbo vacuus, mea interim minimè legere distuleris, hominis equidem exteri, neutiquam ullis prius officiis, neque vel solo aspectu cogniti, quodque etiam pro eadem benignitate, Italos quoque tuos, brevi insuper spondere lectores, dignatus fueris; mihi multò facilius est sentire, quam exprimere. Si verò hæc nostra non ipsi penitus displicitura sint, id totum pendebit, ab eruditione, à prudentia, à comitate optimi Roncagliæ: sanè priori multum, alteri plurimum, omnia autem ultimæ debeo. At forsitan aliquid etiam indulgendum scribenti, animo negotiis instantibus non rarò impedito occupatoque, atque certè ab impendentibus ex munere, nunquam satis vacuo; adde, quod plurima ad amicos raptim data, pro occasionibus, & ne officio deessem; quæ tamen
fin-

singula, stylo curæque multùm detrahunt : Atqui interim intra mea limina, vel saltem ipforum, tutò ea in posterum latere posse credebam : & inde erat, quod plura fortè minùs cautè calamo excidebant, quæque ore paulo liberiore prolata esse videantur ; sermonum ferè adinstar, qui inter suos, familiaresque, remotis arbitris, haberi solent. Nunc verò, quum procedente tempore, in numerum molemq; quandam excreverint, meusque hinc in Britanniam discessus quoque urgeat, postulantibus demum amicis, aliqua delibavi, ex quibus aliquatenus, cum vobis, tum civibus meis, aliisque etiam, (si tantum assequi valeam) constare possit, quantum à me Italia jure æstimetur, quantum Filicaia Vates, quantum Averanii, Salvinique Fratres, aliique plurimi, Patriæ vestræ communis, nostrorumque temporum ornamenta ; atqui minimè omnium prætereundus alter, quem ne modestiam legentis onerem, hic fortè satius fuerit intelligi, quam nominari ; quique ex operibus, cunctis innotescet, sicque meliùs à Posteris nominabitur. Vale. Florent. xviii. Kal. Mar. 1710.

E I D E M. S.

LXXIX.

QUòd Optimi Constantini Roncagliæ Nomen inter mea legatur, id & mihi olim maximo Decori erit, & unâ Officiorum suorum, meique erga ipsum Obsequii, & Gratitudeis, apud alios etiam, quod maximè in votis erat, aliquali testimonio. Adeoque in extrema parte Voluminis insertum vides, ut quum demum incoeperit Opus, sub auspiciis Illustrissimi Sommeri, ita in tuo Reveritissimo Nomine, feliciter quoque desinat; sicque exitum liber omnimodò parem initio consequatur. At spero vestris impressum denique typis Lucensibus, minori saltem tuo incommodo, Vir præstantissime, quam pridem manu exaratum, legeris, jam morbo, atque morbi reliquiis liberatus; ut ita in futurum, & Tibi, & studiis, adeoque Publicæ Rei, unicè, atque optimè, vacare possis. Vale. Florentiæ, Non. Apr. 1710.

DIECI LEZIONI

COMPOSTE

*Sopra il Quarto SONETTO della prima parte del
Canzoniero del Petrarca,*

RECITATE

NELL' ACCADEMIA DELLA CRUSCA

DAL DOTTOR

BENEDETTO AVERANI

FIorentino

Professore di Lettere umane nello Studio di Pisa,
e Accademico della Crusca.

ALL' ILLUSTRISSIMO SIGNOR

ENRICO

NEVTON

INVIATO STRAORDINARIO DI S. M.
DELLA GRAN BRETTAGNA

All' A. R. del Serenissimo G. D. di Toscana, e
alla Serenissima Republica di Genova.

IL-

ILL^{MO} SIGNORE

SIGNORE, E PADRONE COLENDISSIMO.

IL piccolo dono di queste mie Lezioni, che io le dedico, ben volentieri, e di buona voglia viene a presentarsi alla magnificenza di VS. Illustrissima, sicuro d'essere accolto benignamente, e dalla autorità sua illustrato, e difeso dalle calunnie potentemente; poichè in lei si vedono a maraviglia risplendere quelle qualità, che si ricercano in coloro, a quali si deono simiglianti doni offerire. Si vede il diletto, che tra le Cure più gravi la sua mente scirva dell'ozio vile, dalle arti belle si prende: si vede, che nelle Muse ogni suo riposo, ogni sua gioia, ogni delizia ripone, e non contenta dell'eloquenza Latina, ama, e coltiva ancora l'Italiche lettere, e le orecchie dà sovente a poeti, e dicitori Toscani: si vede l'autorità, che non solo per sì eminente grado di Oratore di grande, e gloriosa Reina; ma molto più anche per le sue virtù egregie, e singolari, per la cortesia, per la prudenza, per la modestia, e lealtà, e piacevolezza si è procacciata; sotto l'ombra della quale sperano queste mie fatiche ritrovare sicuro porto, e quella luce acquistare, che mai per se medesime non conseguirebbono, massimamente vedendo in lei mirabilmente fiorire grand' erudizione, ed eloquenza, che sono le armi con le quali solamente si

possono difendere. Imperciocchè non tanto la Potenza, o la Dignità, o la Grandezza, quanto la scienza, e la facondia sono valedoli a render vana la rabbia dell'invidia, che l'altrui onorate fatiche col suo pestifero fiato cerca d'atterrare. Queste due doti fra l'altre preclarissime illustrano la persona di VS. Illustrissima, e la rendono degna del grado, in cui l'altrui sovrano accorgimento la collocò. Ben vide quell'alta Reina, che quelli, che si inviano a Principi grandi messaggieri, ed interpreti della mente de' loro Sovrani, deono aver congiunta la cognizione delle cose coll'eloquenza: e perciò non senza ragione gli Antichi finsero, che Mercurio Messaggero de' gli Dei, fosse dell'arti nobili, e dell'eloquenza inventore; ed Omero fonte d'ogni dottrina dà sempre l'ufficio d'Ambasciadore al facondissimo Ulisse, che possedeva eloquenza simile alle nevi vernali, che in gran copia dal Cielo discendono, e in breve ricoprono la faccia della terra; e Vergilio Latino Omero introduce per ambasciadore l'eloquentissimo Iliaceo, e il Tasso Alete dalla cui bocca uscieno

Più che mel dolci d'eloquenza i fiumi.

Tali elegger si vogliono quelli, che debbono appresso Principi stranieri la mente de' Principi loro esporre, e conviene che sieno non solamente per titolo; ma per dottrina, ed eloquenza veri Oratori, e tale è la sua persona, nella quale si unisce e scienza singolare, e non volgare facoltà di bene, e acconciamente ragionare, dalle quali
sue

sue belle doti mosso vengo a dedicarle la presente Opera, e confido nel suo patrocínio, e la prego, che le piaccia con quella benignità accogliere, e difendere queste mie Lezioni, con cui, quando nella Accademia nostra si recitavano, l'ascoltava, ed insieme con le medesime dedico a lei me stesso, e mi professo.

Di VS. Illustrissima

Umiliss., e Obligatiss. Servitore
Benedetto Averani.